

- أنا إتعوّدت على كده لأن كل فترة المرحومة لازم تروح المستشفى
و أنا ما كنتش هقعد جمبها كان لازم أستمر في حياتي و شغلي .

و دخل في هذه اللحظة سكرتيه و قدم إليه كارتاً لشخصٍ ينتظره
خارجاً فقال :

- خليه يتفضل .

وقد وقفت لشعوره بأنه يجب أن أنهى المقابلة قبل أن يطردني خارجاً
قائلاً

- طيب سؤال أخير لما خرجت من عند رضوى سافرت على طنطا و
الا رحت فين؟

- مع أني مش ملزم أجابك إلا أني هقولك إني رحت عند ياسر
إتغديت معاه هو أصرّ لما عرف إني في مصر أنزل أروح له ؟ سؤال ثاني ؟
و نظر إلى ضيفه القادم قائلاً :

- أهلاً أهلاً يا وليد بك إتفضل نوّرت المعرض

وعندها آثرت أن أنصرف عندما رأيت خلفي شخصاً مريب الشكل
شكرته على مقابلته و انصرفت و لكن بعد أن خرجتُ من مكتبه تذكرتُ
أمراً ففتحت الباب مرةً ثانيةً مادّاً رقبتني إلى الدّاخل بين فتحتي الباب
وسألته وعلى شفتي ابتسامةٌ بلا أي معنى .

- معلش نسيت أسالك حاجة يا فتحي بك هو المحامي الجعّر اللي
اتجوزته رضوى كان إسمه إيه ؟

- (متأففاً) إسمه حاتم .. حاتم صديق .

شكرته و تذكرت وقتها الكارت الموجود في حقيبتها و إنصرفت سريعاً
لألحق بقطار السادسة مساءً وفي ذهني عشرات التساؤلات و خاصةً

عندما ألحَّ عليّ مرةً أخرى، ذلك الهاجس الذي أشعر به كلما تذكرت أوراق المحضر والمعاينة و أشياء رضوى و كان هناك جرسٌ ما يدق في رأسي.

بعد يومين من تاريخ تلك المقابلة فوجئت بياسر يقتحم عليّ مكثبي وخلفه سكرتيرتي تنظر إليّ في هلع وهو يصيح في عصبية واضحة :

- أنا عايز أعرف إنت إيه اللي بتعمله ده؟ شغال وكيل نيابة نازل سين وجيم في اللي راح و اللي جاي إنت إيه خلاص مبقتش تميز! ما قلنا لك إن علاء هو القاتل و مش أنا اللي قلت! لا دي كل التقارير، إنت ليه مش عايز تفتنع، عايز تثبت لنفسك إيه؟ قدر يضحك عليك إنت كمان و إنت...

(مقاطعاً موجهاً كلامي للسكرتيرة طالباً منها أن تنصرف وما أن خرجت حتى صحت بدوري أنا الآخر وبصوتٍ أعلى)

- إنت أساساً آخر واحد تنطق! إنت أصلاً من المشتبه فيهم ! تقدر تقول لي يا محترم كنت بتعمل إيه عند رضوى يوم السبت الصبح ؟ أو كنت فين وقت ارتكاب الجريمة؟

- و إنت مالك كنت فين و الا إيه اللي وداني لرضوى يومئها، و إنت مين أصلاً عشان تشكّ فيّا ؟ إنت بدأت تخرف يا أحمد مش من حقك أصلاً إنك توجه ليا إتهام زي ده .

- حق إيه يا ابو حق ! أنا المحامي بتاع علاء ولازم أسأل و أعرف كل حاجة و متنساش إني هقول كل الكلام ده في المحكمة و إن مجاوبتش بكيفك هتجاوب غصب عنك .

.....

- أنا بحذرك يا أحمد إنت مش عارف هتودي نفسك فين!

- و ده اعتبره تهديد يا حضرة الضابط؟ عارف صويتك ده معناه إني ماشي في الطريق الصبح محدش عارف غيرك كنت عندها بتعمل إيه ولا عمك المحترم اللي جه يهددها قبل وفاتها بيومين و يساومها على العقد و لازم تتجاوب أحسن لها و إلا! حتى وقت أما غطس ومحدش عرف كان فين وقت ما مراته كانت بتموت و أساساً البيه ابن أخوه كان غطسان هو الثاني وقت الوفاة ولا ليه كل الكلام ده متقلش في التحقيق اللي إنت أساساً عملته و ده غلط و إنت لا جبت سيرتك ولا سيرة عمك .

- إنت بتخرف ها ؟ أكيد بتخرف ! و لا إنت داري بتقول إيه و هو يا حيوان لو أنا عايز أقتلها و أسرق العقد....

- (مقاطعاً) غريبة إيه اللي جاب سيرة العقد دلوقت ..؟ أنا مفتحتش سيرته ! مالك ارتبكت ليه ؟ لعلمك بقى أنا الوحيد اللي عارف فين مكان العقد وبالعقد ده أنا هثبت براءة علاء.

- خليك في أحلامك و إبقى قابلي لو عرفت تعمل حاجة، و أعلى ما خيلك إركبه ولعلمك أيوة كنت عندها يوم الوفاة.

- غريبة ! (و بدأت أتفرّس في ملامح وجهه جيداً وكأنني أراه أول مرّة) تصدق يا ياسر إزاي مكنتش واخذ بالي من النقطة دى فاكّر لما كنا زمان الناس كانوا فاكرينك انت وعلاء إخوات أول مرة ألاحظ إنك فيه شبه كبير أوي من علاء

لم يرد و إنما خرج سريعاً من الغرفة وهو يسب ويلعن وكاد أن يكسر الباب و بعد انصرافه تأكدت من أن لديه ما يخفيه و يجعله ينضم إلى قائمة المشبوهين.

بعد انصراف ياسر بساعة كان لدي موعدٌ مع وكيل النيابة ليطلعني على قائمة الاتصالات التي خرجت من و إلى هاتف رضوى المحمول والهاتف

المنزلي وذلك قبل الوفاة بأسبوعين كما طلبت، وبالفعل وصلتُ إليه لأجد هذه القائمة في انتظاري و أخذتها و انصرفت عائداً إلى منزلي وبعد أن تناولت غذائي صنعت لنفسي فنجاناً من القهوة و أخذت القائمة وفردتها على المنضدة أمامي متطلعاً إلى جميع المكالمات الصادرة والواردة قبل الوفاة بأسبوعين و أمام كل رقم تاريخ الاتصال أو الورد و أيضاً اسم المتصل وعنوانه، أخذت في إحصاء الأرقام المتكررة كاتباً في مذكرة صغيرة جميع الاتصالات و أوقاتها و بعد جهدٍ مضني لحوالي الساعتين كنت قد حذفت جميع الأرقام الغير ذات أهمية والفردية منها وبعد إحصاء الأشخاص لخصتُ المكالمات فيما يلي : أن هناك رقمً اتصل بها حوالي خمس مرات خلال الأسبوع الأخير قبل الجريمة و كانت هذه الاتصالات خارجةً من هاتفٍ أمامه اسم : حاتم محمود صديق و أمامه العنوان وهو المحامي الزوج الأول، و أوقات هذه الأرقام دائماً كانت في الصباح، أما المكالمات الصادرة لهذا الرقم فكانت حوالي ثمانية مرات أغلبهم في أوقاتٍ بعد الثانية عشر ليلاً وكان متوسط كل مكالمة حوالي عشرة دقائق وكانت هذه المكالمات صادرةً من منزلها إلى محمول حاتم صديق أما الرقم الذي أثار انتباهي كان هاتف رامي المحمول ! فقد ظهر اسمه بالكامل في قائمة المكالمات الواردة إلى رضوى والتي لا تقل عن واحدٍ وعشرين مرة لا تتعدى كل مرة دقيقتان، ودائماً جرت هذه الاتصالات في أوقاتٍ متأخرة ولم يخرج من هاتفها المحمول أو المنزلي اتصال برامي إلا مرتين فقط ، في الصباح وفي يوم واحد والاتصالان كانا يوم جريمة القتل أحدهما كان في الثاني عشر والنصف ظهراً و الآخر بعدها بسبع دقائق و استمرت المكالمة حوالي الاربعة دقائق والمدهش أن هذه الاتصالات كانت صادرةً من المنزل إلى هاتف رامي المحمول بعد مكالمة علاء

لرضوى من طنطا فهي تلقت إتصالاً أولاً من هاتف فتحي سليم المنزلي إلى هاتف المنزل وكان هذا بالطبع علاء الذي كان يخبرها فيه بعدم قدرته على المجيء اليوم و انتظاره في طنطا وكان هذا الاتصال حوالي الثانية عشر إلا أربعة عشر دقيقة ثم يصدُر من هاتف منزلها مكالمةً إلى هاتف رامي ثم مكالمة أخرى بعد دقائق مرةً أخرى إلى محمول رامي، أما الاتصالات الصادرة من هاتف المنزل إلى هاتف رامي المنزلي فكانت حوالي الاربعة وثلاثين مرةٍ خلال الأسبوعين، بالطبع سيكون من الصعب تحديد المتصل سواء كان علاء أو رضوى ؟ ثم يأتي بعد ذلك أكثر من عشرين اتصالاً وارداً إلى محمول رضوى و إلى المنزل من هاتف منزليّ بإسم سعد البنا، متوسط كل مكالمةٍ حوالي النصف ساعة و كذلك ورود خمس عشرة مكالمةٍ من محمول سيدةٍ باسم سهى محمد عمران والعكس صحيح فبعد كل مكالمةٍ من سهى يصدر اتصالٌ من منزل رضوى إلى منزل سعد البنا وتوقعت أن تكون زوجته هي سهى عمران فيجب الاستفسار من علاء عن علاقة رضوى بحاتم صديق بعد الطلاق وما نوع هذه العلاقة و أيضاً علاقتها بزميله رامي وما سرُّ كل هذه المكالمات الهاتفية بينهم وكذلك من تكون سهى عمران وسعد البنا، طرأت في ذهني فكرة، ففتحت محضر المعاينة ومنها أخذت عنوان وهاتف حاتم صديق الموجود بـكارت في حقيبة اليد و اتصلت بمكتبه وتحدثت مع سكرتيه شارحاً من أكون وطالباً منه تحديد ميعادٍ مع حاتم غداً لأمرٍ هامٍ جداً.

كنت أجلس في انتظار السماح لي بالدخول إلى مكتب حاتم صديق منتظراً خروج الشخص الذى لديه؛ وجدت أن الوقت يمر أمامي سريعاً فلم يتبقَّ إلا أسبوع واحد و تحال أوراق القضية إلى محكمة الجنايات ما لم

- لا مكانش بينا أي علاقة بعد الطلاق تقريباً بالمعنى المفهوم زى مايكون كل واحد طوى الصفحة دي من حياته، لغاية أما قابلتها صدفة في عيادة طبيب الأسنان، لأن طبيينا كان مشترك، وتقدر تسال الممرضة و ده كان بعد أما إتجوزت بفترة، وقتها إبادلنا السلام فقط ومتكلمناش كثير سألتها عن حالها وعن حياتها و هي سالتني عن شغلي و هل إتجوزت و الا لأ.

- (مقاطعاً)بس يا أستاذ حاتم بعد تحليل المكالمات الصادرة من محمولها لقوا إسمك في مكالمات كثير خارجة من عندها ليك زائد إنهم لقوا كارت باسمك في شنطة إيدها.

- (ناظراً إليّ ببرود) ما إنت قاطعتني قبل ما أكملك، قلت لك أنا قابلتها بعد أما اتجوزت وكان صدفة و كان كلام عابر وبعدين هي طلبت مني أرقام تليفوناتي عشان كنت غيرتها الفترة اللي فاتت عشان كانت عايزة تستشبريني في مسائل قانونية وقتها إديت ليها كارت باسمي، فيها حاجة دي ؟ دي حاجة تبرأني مش تتهمني.

- أعذرني يا أستاذ حاتم إنت عارف كل واحد مننا بيعمل اللي يقدر عليه و أنا بدور على خرم إبرة لموكلي، ممكن سؤال تاني ؟ أنا لما قابلت فتحي سليم جوز أمها قال سوري يعني إنك حضرتك كنت السبب في نشوء خلافات مادية بينها وبين والدتها الله يرحمها.

- دا راجل كداب وطمع الدنيا كله فيه وحاسس إن الناس كلها زيه أنا مكنتش باخد فلوس منها زي ما كان بيعايرني دايماً، أنا الحمد لله معايا اللي يكفيني وقبل اما أتجوزها كمان كنت مستور جداً المرحومة كانت فلوسها خاصة بيها هي و شوف حسابها في البنك قد إيه، أنا معرفش مينين

جاء الكلام ده ؟ أيوة كان فيه خلافات بينا كتير وبعدين سبب الطلاق كان عدم الإنجاب مش خسرانها قضية مش عارف إيه، أنا إيه اللي هيخليني أمد أيدي لمراتي و أنا أصلاً عندي مكتبي اللي شغال كويس جداً.

- طيب ممكن أعرف إيه كان سبب خلافكم المستمر؟ يعني هل سبب الخلفة ده كان السبب الوحيد؟

- لا مش السبب الأصلي المرحومة في بداية زواجنا كانت رقيقة جداً و لما بدأ الحمل يتأخر بدأت العصبية تتسرب ليها شوية شوية، ولما كشفنا أكثر من مرة وعرفنا و إتأكدنا إن من المستحيل إنها تخلف بقت زي المجنونة، عصبية في كل تصرفاتها معايا ومع غيري، بقت تثور و تتخانق معايا لأتفه الأسباب، لو إتأخرت شوية برا تظن إني كنت مع واحدة، لو سافرت في قضية، تقول إني هتجوز، و كل شوية إتهامات باطلة ودايماً تعيط وتقول إنها مش حاسة بالأمان معايا لغاية أما طلبت بنفسها إني أنا اللي أطلقها، مع العلم إني كنت رافض الكلام ده نهائياً في الأول لكن حياتنا بقت جحيم! المهم فعلاً حصل الطلاق وكل واحد فينا راح لحاله، أنا اتجوزت و خلفت و الحمد لله و لما إتكلمنا في العيادة عرفت إنها عايشة حياة مش سعيدة، ومش لاقية السعادة في الدنيا، و انها حست إنها كانت في نعمة و إنها اللي إتبطرت عليها و إتمنت ليا الخير في حياتي الجديدة وبعدين قالت إنها عايزة تكلمني في مسائل قانونية إدتها الكارت وقلت لها إنها تقدر تشرفني في أي وقت في المكتب، لأن اللي بينا كان عيش وملح، و الكلام ده كان من حوالي شهر على ما اعتقد.

- وجاتلك المكتب ؟

.....

- لا، كان كلامنا بعد كده في التليفون بس وكانت المسائل اللي عايزة تسألني فيها إنها كانت عايزة تسجل قطعة أرض في المعمورة و إنها كانت عاملة توكيل لجوزها وكانت عايزة تلغية في أقرب فرصة وده كان تقريبا اللي قالته في آخر حوار بيني وبينها.

دارت كلمة إلغاء التوكيل في رأسي لتزيد الظلام الذي يدور حولي فها هي عقدة أخرى تلف حول رقبتني أنا و إذا قال هذه الشهادة في المحكمة لزادت الشكوك حول علاء، قمت من أمامه ماداً إليه يدي مودعاً قائلاً:

- أنا آسف لو كنت ضيّعت وقتك بس سؤال أخير عشان بس أحس إني عملت كل اللي عليا. (تركني أتحدث و ابتسم وهو يمدّ يده ليصافح يدي الممدودة إليه ثم أخذ ورقةً من على مكتبه ليكتب فيها اسماً وعنواناً دون أن يتحدث إليّ وناولني إياها وهو يبتسم)

- أسئلتك نفس أسئلة ياسر تقريباً و كنت هزعل لو كنت مشيت من غير ما تسألني السؤال ده، عموماً الورقة دي فيها اسم طبيب أطفال في باب اللوق كنت عنده أنا ومراتي وبنتي كنا بنكشف عليها يوم السبت اللي حصلت فيه الجريمة وفضلنا عنده من الساعة ثمانية لغاية احداشر ونص وتقدر تساله.

- لا مش للدرجة دي يا أستاذ حاتم ألف سلامة لبنتك إسمها إيه؟

.....

- رضوى

ابتسمت وشكرته و انصرفت وخرجت من المكتب فالسلم فالعمارة و أنا أجزّ خلفي ذيول الخيبة التي تزيد يوماً بعد يوم، فهذه المقابلة لم تسفر عن أي شيء في صالح علاء، بل على العكس أثارت سؤالا غريباً، لماذا طلبت رضوى أن تعلم إجراءات إلغاء التوكيل الذي عملته لعلاء؟

كنت أسير بسيارتي على غير هدى، و خطر لي أن أذهب إلى المصنع مرةً أخرى لأقابل رامي، الذي أظن أنه لابد من أن يكون لديه تفسيرٌ لأسباب تلك المكالمات في تلك الأوقات المتأخرة وعلمت من الأمن على بوابة المصنع أن رامي موجود وطلبت منهم أن يطلبوا منه أن يوافيني في الاستراحة بالمصنع و انتظرت طويلاً إلى أن جائي شاحب اللون وفي غاية التعب والإرهاق .

-خير يا أستاذ رامي مالك! شكلك تعبان أوي كده ليه ؟ آسف لو كنت أزعجتك و أخذتك من شغلك .

-لا أبداً معلىش أنا اللي إتاخرت عليك خير كنت عايزني في إيه ؟

-سلامتك، الأول مالك؟ (و أخرجت علبة سجائري ماداً إليه بسيجارة)

إتفضل

فضحك رامي قائلاً:

-سيجارة إيه بس يا أستاذ أحمد ده أنا لو خدت نفس هموت، إنت ناسي ما أنا قلت لك أنا عندي ضيق في التنفس ومقدرش أشم أي روائح دخان

أطفأت سيجارتي سريعاً معتذراً إلى رامي و أردفت:

-طيب نخلينا في موضوعنا كنت عايز بس استفسر منك على حاجة معينة، دلوقت النيابة أخرجت الاتصالات إلى تليفونات رضوى قبل الوفاة و لقينا أرقام كثير ومنها أرقام واصلة ليها منك وغالباً إثنين بعد نص الليل وكل مرة ما بتكملش ثلاث دقائق وبرضه لقوا إتصالات من تليفون رضوى ليك، استنى قبل ما ترد، أنا مش بحقق معاك لا سمح الله بس بعمل بروفة

على الأسئلة اللي يمكن أقولها لو استُدعيت للمحكمة و لازم نكون عارفين هنقول إيه.

- (هَبْ واقفًا) محكمة إيه! و أنا إيه اللي هيوديني للمحكمة ما أنا قلت، اللي أعرفه قلته في التحقيق و النيابة، لزمته إيه بقى المحكمة ؟ تليفونات إيه واتصالات إيه اللي إنت جاي تقول عليها أنا مكنش بيني و بين المرحومة حاجة تخليني أتصل بيها أوقات متاخرة أوي كده أو حتى في أي شيء يشبهني.

- (أمسكت يده لأمنعه من المشي قائلاً) :أقعد بس متفرجش الناس علينا و اهدى كده لأ كان فيه اتصالات واسمك و رقم تليفونك في القائمة .

- (يجلس ويضع يده على راسة متذكرا) اه، استنى، استنى، أيوة افتكرت علاء كان دايمًا أوقات ياخد الموبيل بتاعي عشان يكلم مراته ويطمّن عليها، كان يقول إنها بتوحشه، أيوة، أيوة، أنا افتكرت كان أغلب المكالمات دي في وردية الليل فعلاً تقريبا زي الميعاد اللي إنت بتقول عليه.

-طيب وليه هي كانت بتتصل بيلك؟

-كانت بتعوز علاء وكنت بندهله.

-وهو مفيش تليفون في المصنع ؟ ولا حتى مع علاء؟ أو حتى يكلمها من موبيله .

-تليفون المصنع بيبقى في أوضة المدير وبتبقى مقفولة بالليل وعلاء كان دايمًا بيقولي إن موبيله بايظ وكنت بديله موبيلي عشان كده

-طيب حاول تفكر يا أستاذ رامي يوم السبت اللي حصلت فيه الجريمة لقينا مكالمة صادرة من بيت رضوى تقريباً إتناشر و نص و كانت المكالمة دي ليك إستمرت دقائق تقريباً

-رضوى اتصلت بيا أنا ؟ (مندهشاً) لأ مش فاكر طبعاً

-لا إفتكر، المكالمة دى خرجت ليك و الإتصال ده تم بعد أما علاء كلمها من طنطا بربع ساعة، تفكر إيه السبب؟

-أيوة، أيوة، افكرت... دي أصلها كانت بتقولي إن علاء كلمها، أيوة صح، صح، إفتكرت، كانت بتقول إن علاء كلمها وقالها أنه مش هيقدر يجي النهاردة من طنطا وقالها تكلمني وتخليني أعمله أجازة حتى تقريباً المكالمة ما قعدتش نص دقيقة.

- غريبة الكلام ده، لأن قبل الوقت ده بفترة كبيرة علاء اتصل برضا مسؤول الأمن بتاعكم اللي في المصنع وبلغه أنه مش هيقدر يجي يوميه و إنك تعمله أجازة و إنت بنفسك قلت إن رضا هو اللي بلغك مش رضوى زائد إن المكالمة فعلاً كانت نص دقيقة لكن بعد شوية خرج من عندها مكالمة استمرت حوالي أربع دقائق، تفكر إيه السبب اللي خلاها تكلمك تاني ما دام قالت لك على المفيد؟

وبدأ في بلع ريقه بصعوبة، وحاول أن يخفى توتره الذي ظهر واضحاً في هذه اللحظة و امتدت يده إلى جيبه العلوي ليخرج علبة تناول منها حبة صغيرة وضعها تحت لسانه قائلاً

- يا أستاذ أحمد أنا مش عارف إنت شاكك فيا كده ليه أو بتسالني أسئلة زي ما أكون متهم لا سمح الله، علاقتي بالمرحومة بسيطة جداً، صراحة أنا كنت دايماً بستلف منها فلوس و اللي كان بيديهاالي علاء بنفسه لأنه كان يقول إن المبالغ الكبيرة اللي بطلبها كان يجيبها من رضوى وعشان كده كان بيطلب مني إني أكتب له وصولات أمانة و أنا اصريت

على كده و أنا على عكس ما إنت عارف أنا مش بصرف الفلوس دي على منكر ولا على حاجة، لا اوقات بتزق لظروف خاصة بيا ويوم ما قابلتوني قدام البيت كنت محتاج فعلا فلوس جدا و كنت حاطط امل على المرحومه و لما ملقتهاش حسيت انى واقع فى مشكله وقتها ، أنا على العكس يمكن أكثر واحد إنضريت من وفاة المرحومة، بالعكس حياتها كانت تهمنى طبعاً، ياريت تترتاح وتريح نفسك ومتجيش تاني هنا وتسال عني، الناس كلها بدأت تتكلم (وقام من جلسته في هذه اللحظة معلناً انتهاء المقابلة) المشوار بعيد عليك وكل يومين تيجي وتفضل تسألني والناس زي ما قلت لك مابيطلوش كلام وخصوصاً إنهم هنا كلهم واقفين مع علاء ولما يلاقوك بتدور عليا بالشكل ده هكون في موقف مخرج جداً، لعلمك بقى يا سيدي المكالمة الأولى مكنتش سامعها عشان كنت فوق جنب المكن وطلبت منها إنها تتصل كمان خمس دقائق على ما أكون نزلت تحت أو دخلت مكان أعرف أسمعها فيه ولما نزلت و كلمتني فضلنا نتكلم فعلاً شوية بسأل على صحة أمها وبرضه عشان قالت لى أعمل أجازه لعلاء أما بخصوص مين اللي قالي الأول هي و الا رضا أنا مش فاكِر إبقى اخطف رجلك و روح إسألها لو مش مصدقني (وتركني و انصرف و أنا لازلت جالساً دون حتى أن يصافحني)

خرجت من المصنع ذاهباً إلى سيارتي فوجدت كهلاً عجوزاً بجوارها يقوم بتنظيفها فمدت يدي بتلقائيةٍ لأعطيةٍ أي فكةٍ في جيبي ولكنه صدّ يدي قائلاً:

- عيب يا أستاذ أنا عارف إنك محامي المهندس علاء ربنا يفك سجنه ويرد غيبته أنا عم سيد الخفير بتاع المصنع (نظرت إلى محدثي في تمنع، إذ هو كهلٌ في أوائل الستين من العمر يرتدي بدلة بنية اللون وكانت نظراته توحى بطيبة قلبه)

- أنت إيه رأيك في اللي حصل لعلاء ده يا عم سيد تفتكر يقدر يعمل كده فعلاً؟

- والله يا بيه الراجل بقاله معانا فترة كبيرة و عمره ما صدر منة شيء وحش والله! أخلاق و ابن ناس ومحترم ولا العيبة تخرج من بقه وعمره ما يقدر يعمل الحاجات البطالة اللي بيقلوا عملها دي، منهم لله الظلمة ولاد الكلب، ربنا ينتقم منهم.

- طيب إنت إيه رأيك في المهندس رامي زميله؟

- والله يا بيه هو في حاله راخر بس عصبي شوية ومع إن ربنا باليه إلا إنه أوقات بيتخانق مع دبان وشه وما بيقدرش إنه إنسان مريض و يمكن أي نوبة تجيب أجله لا قدر الله زي ما رحنا بيه ديك النهار على المستشفى لما تعب وكان بيتخانق مع سواق في المصنع كان بيورد قطع غيار، ياما قلت له يهدي من خلقه شوية، تعرف إنه طلق مراته بسبب عصبيته دي ؟ كان هيومتها مرة! و خرج من النيابة بالعافية لما اتنازلت عن محضر الضرب مقابل إنه يطلقها، وبالك المهندس علاء كان بيروح لها ويفضل يتحايل عليها وخدها معاه النيابة لغاية أما اتنازلت، مش بقولك ابن حلال وبكرة برضه ربنا هيوقله ولاد حلال زيك كده عشان يخرجوه من المشكلة اللي هو فيها.

- طيب قولي يا عم سيد مين كان الخفير هنا بليل يوم السبت اللي طلب فيه علاء إنه ياخذ أجازة يعني يوم الجريمة اللي حصل فيها قتل مرات علاء ؟

- كنت أنا برضه يا بيه منا ببدل ورديتي كل أسبوعين، مرة بتبقى الصبح ومرة بالليل وفاكر اليوم ده لأن الاستاذ رضا قالي إن الاستاذ علاء مش جاي ول و نسي يبلغ المهندس رامي أبقى أبلغه أنا وقتها، لكن الأستاذ رضا بلغه قدامي في التليفون لما رد أخيراً عليه، وكان متضايق أوي

لأنه كان عايز يشوف مش عارف ماتش إيه، وجينا على بالليل وقالى أنا يا عم سيد هروح على قهوة أم حنان اشوف الماتش ولو حصل حاجة إتصل بيا و هاجي.

- وبعدين

- - بعدين إيه؟

- يعني خرج ورجع إيمتى و إنت شفته لما جه؟

- يا بيه ما أنا بقولك أهو الماتش إشتغل من هنا وحصل عطل بعدها يجي بربع ساعة و أتصل بيه أنا و شعبان الميكانيكي كان تليفونه مقفول وكان لازم يجى عشان يفتح لنا المخزن لأن المفتاح بيبقى مع رئيس الوردية بس وشعبان عايز قطع غيار والمصنع واقف المهم طرت بالعجلة يا بيه على قهوة أم حنان ملقتوش رجعت وقلت لشعبان يتصرف لأنى ملقتش المهندس وكان يوم!

- ها وبعدين؟

- وبعدين يا بيه لقيته جاي حوالى الساعة اتناشر ونص وبينى وبينك كان نفسى أمسك زمارة رقبة وقلت له يا بيه انت خرجت من هنا والمصنع خرب من هنا و اتصل بيك تليفونك مقفول و اجيلك على القهوة ملقكش ده برضة كلام يا بيه؟ مردش غير قالى لقيت التلفزيون وحش رحت لقهوة تانية ومكملش كلام وسابني ومشى ومشفتوش تانى إلا تانى يوم الصبح و إحنا بنمضي عشان نروح.

- طيب يا عم سيد كان لابس إيه افكر والنبي و افكر كان شكله عامل إزاي وهو راجع كان تعبان مجهد ملخبط مثلاً ولا كان طبيعي؟

- كان لابس أفروال الشغل يا بيه وتصديق يا بيه والله بجد عندك حق كان راجع تعبان ولما سألته تانى يوم مالك فيك إيه و إيه اللي أخرك كده قال إن علبة الدوا بتاعته خلصت وفضل يلف عليها لحد ما لقاهما وحتى إدانى إسمها أهو في ورقة أهى أبقى ألف له عليها (ويخرج العجوز ورقة مطوية من جيب جاكته العلوى ونظرت اليها في لا مبالة دون أن أقرأ ما فيها) أكمناها شحة شوية ربنا يشفيه ويشفي كل مريض يا بيه

- شكراً يا عم سيد إنت وضحت ليا حاجات كتير أوي كانت غايبة عني ربنا يكرمك.

- على إيه بس يا بيه أنا تحت أمرك في أي وقت ولو طلبتني للشهادة والله لأقول كلمة الحق في حق الراحل اللي ربنا يفك سجنه ده.

كنت اعتزمت في ذلك اليوم أني سأتوجه إلى شقة علاء في المساء وبعد خروجي من المصنع كان عليّ أن أتوجه إلى مكتي لأحيل أغلب القضايا إلى أحد الزملاء فلم يكن هناك قضايا كثيرة ولم يكن أغلبها ذو أهمية تذكر فحاولت أن أضع كل وقتي في قضية علاء، كنت أشعر داخلي أن هناك خيوط كثيرة تريد فقط أن تتجمع و لكن لازلت حائراً، كانت الساعة تشير إلى الثالثة عصراً وبعد أن خرجت من مكتي توجهت إلى أحد المطاعم القريبة لأتناول غذائي وبعد أن تناولته جلست إلى أحد القهاوي المنتشرة في هذا المكان قبل أن أتوجه أخيراً إلى شقة علاء.

لم أجد مكاناً في القرب لأضع فيه سيارتي مما جعلني أدور حول المنزل عدة مرات حتى وجدت مكاناً وتركت فيه السيارة و توجهت إلى منزل علاء سيراً على الأقدام، كنت أتمنى أن أجد أية أوراق تفيد موقف علاء في القضية سواء كان العقد أو إيصالات الأمانة أو أي شيء قد يحسن من موقفه وعندما اقتربت من باب المنزل شعرت بأن هناك من

يراقبني داخل أحد السيارات الموجودة لم أهتم كثيراً فربما كان مجرد هاجسٍ لا أكثر، و أخرجت مفاتيح علاء و جربت عدة مفاتيح حتى فتحت باب المنزل الخارجي، دلفت إلى الداخل سريعا و أغلقت باب المنزل الخارجي ورأني، و قبل أن اخطو عدة خطوات وجدت القط الغبي مرةً أخرى ولكن بمجرد أن رآني هذه المرة، فرّ إلى أعلى سريعاً فعدلت عن فكرة إغلاق الباب وفتحته مرةً أخرى فربما نزل هذا القط إلى الشارع وتاه، صعدت على السلم حتى وصلت إلى شقة علاء، أخرجت المفتاح ودخلت و أضأت النور كان كل شيء كما هو مبعثراً، وشعرت أن تفتيش الشقة من الشرطة كان زائداً عن الحد المسموح طبقاً لتعليمات ياسر نفسه، أو هو الذى فتش ؟ الله أعلم، كان كل شيء تم العبث به، كانت الفوضى في شتى أنحاء الغرف، كنت أسير على براويز وصور مقطوعة ومفارش وملابس حتى وصلت أخيراً إلى غرفة النوم وهناك بجوار الدولاب الذي برزت أحشاؤه إلى الخارج كان يوجد صورة قديمة تمثل طفلاً يبكي معلقةً على الحائط وبجوارها مكتبةٌ بها عدة أرففٍ من الكتب، امتدت يدي الى الرف العلوى منها لأزيع الكتب من مكانها لأجد خلفها الخزانة تماماً كما أخبرني علاء مثبتةً داخل الحائط في مكان لا يخطر على بال أي شخص من الذين قاموا بالتفتيش، وتوجهت مرةً أخرى إلى المطبخ لأحصل على المفتاح المخبأ في ظهر الثلاجة بواسطة مغناطيس، أخذته و عدت مرةً أخرى إلى غرفة النوم وكان لا يعلم هذا المكان سوى رضوى وعلاء، و إن كنت قد اندهشت لكل هذه الاحتياطات الغامضة التي قاموا بها لإخفاء الخزانة ومفتاحها، فربما شعرا أن هناك من يريد أن يصل إلى العقد بأي طريقةٍ كانت؛ فتحت الخزانة بهدوء لم أجد بها أية أوراق أو مجوهرات أو مبالغ مالية فلم أجد سوى دوسيه أخضر اللون أخذته و جلست على

نظرت إلى المكان من حولي متذكراً ما حدث لي في الفترة السابقة ولماذا أنا هنا، فوجدت بجواري على الأرض الدوسيه الأخضر وعدة أوراق مبعثرة على ملاءة تلطّخت بدماء طازجة، كنت تقريباً أشعر أنها دمائي، و استدركت العجوز:

- فوستاك بينزل على السلم كثير و لما ناديت عليه مردش خفت لا يكون حد من المغفلين فتح الباب وسابه و هرب فوستاك، فنزلت عشان أجيبه لقيت شقة رضوى مفتوحة والنور منور ولما دخلت أشوف مين لقيتك مرمي على الأرض وراسك بتنزف قمت ألقك بدل ما تروح فيها وتريحنا، جبت شنطة إسعافات كانت عندي و ربطت لك الجرح لغاية أما تروح مستشفى ضروري لأن راسك هتفتح تاني ولازم تخطيها و للأسف أنا معنديش إبر غير التريكو و يارتنى خيطها لك قبل ما تفوق، قول لي بقي إنت اللي جيت هنا ليه؟

- أنا مش فاكّر أي حاجة ... أيوة، أيوة، أنا كنت هنا بدور على ورق مهم لعلاء كان شايله في خزنته وهو اللي إدانى مفتاحه، أيوة صح، من فضلك ناوليني الدوسيه اللي تحت رجلك ده (حاولت أن أقوم و لكنني تأوّهت مجدداً)

- إستنى، إستنى، على مهلك إتفضل أهو، وناولتني إياه.

- شكراً يا مدام جينا على اللي عملتيه، لولاكي كان زماني فضلت أنزف لحد ما مت.

وتحاملت على نفسي وجلست مرة أخرى إلى السرير وفتحت الدوسيه، وجدت وصل أمانة آخر باسم رامي زميل علاء بحوالي مبلغ تسعة آلاف جنيه، و شيك على بياض باسم حاتم صديق، وتوكيل عام لعلاء بإدارة أملاك رضوى، و وثيقة تأمين مشتركة للطرفين بمبلغ مليون جنيه، وعقد بيع



سيارة وشهادات ميلاد ، فقط وهذا كل ما كان يوجد في الدوسيه قمت بصعوبة مرة أخرى لأرى إن كانت توجد أي أوراق بالخزانة فلم أجد .

- فيه ورق ناقص! مش معقول الورق ده بس اللي كان في الخزانة.

- ورق إيه دور عليه كويس أنا جيت ولقيت كل حاجة كده زي ما سبتها هيكون مين سرقتك يعني أنا ولا فوستاك؟

- لا أنا مقصدش، أقصد أنا كنت جاي أدور على ورق معين لصالح علاء وكنت متأكد إنه في الخزانة دي (بحثت أسفل السرير وبجواره و اما هي فلم تتزحزح من الكرسي الجالسة فوقه والموجود امام السرير ولما تعبت من البحث جلست مرة أخرى ناظراً إليها في فضول فأردفت قائلة :

- دور زي ما إنت عايز أنا متأكدة إنك مش هتلاقي اللي بتدور عليه، لأنني شفته.

- مش هلاقي إيه ؟ وليه بتقولي كده ؟ إنت تعرفي إيه بالظبط ؟ و إيه اللي شفتيه ؟

- شفت اللي كان هنا وسيح دمك ونزل بسرعة على السلم لقيته خارج من البيت أنا شفته من ظهره من الشباك ولما ناديت على فوستاك مردش قلت ده أكيد حد بيع حاجة وساب الباب مفتوح أو غلط في العنوان لأن مفيش حد أصلاً دلوقت في البيت، فخفت يكون ساب الباب مفتوح ونزلت زي ما قلت لك و أكيد أخذ الورق اللي إنت كنت جاي تدور عليه (قالت هذه الجملة ثم امتدت يدها إلى عصاها الأبنوسية لتستند إليها لتتجه ناحية باب الغرفة ويتبعها قطعها)

.....

- مين بس قولي لي أوصافه إيه؟ أنا حسيت إن فيه حد كان مراقب البيت، مين بس يا ربي كان مستني إني أدخل و أجيب الورق ده (تذكرت مدى غبائي في أني ساعدته عندما تركت باب العمارة على مصراعية فقط ليخرج القط دون رجعة و طبعاً لم أجسر على مصارحة العجوز بذلك)

- و إنت لسة لغاية دلوقت متعرفش مين اللي عمل فيك كده وخذ الورق؟

- مين ؟ قولي لو تعرفي أي حاجة من فضلك.

- طبعاً مفيش يا مغفل غير علاء أنا شفتة من ظهره وا ...

- (صارخاً بهستريا) إنت معنديش غير علاء! مفيش غير زفت علاء! كل الناس عندك علاء! قال وشفتيه قال! ده إنتي أساساً ما بتشوفيش تحت رجليكي شبر (أخذت الدوسيه والأوراق تاركاً المرأة في اندهاشها من تصرفي وصراخي بوجهها متجهاً إلى باب الشقة هابطاً السلم لألعن ذلك الحظ العاثر الذي جعل العقد يقع أخيراً في يد من يبحثون عنه لاعناً نفسي ألف لعنة مرة أخرى لأنني تركت الباب مفتوحاً.

توجهت إلى مستشفى في الجوار وكنت على علاقة قرابة بطبيب هناك فوجدته، و قام بالكشف على جراحي وتضميده وخیاطته بحوالي سبع غرز أصبحت تزين موخرة رأسي التي كادت أن تخلو من الشعر وقد حسدني الطبيب لأنني ذو حظ ممتاز لأن قوة الضربة كادت أن تقتلني و لحسن حظي كما يقول واصر على كلمه من حسن الحظ لم أصب إلا بارتجاج في

المخ أدى إلى تجمع دموي في مؤخرة الرأس قد يؤدي إلى الشلل في المستقبل وصداع شديد سيستمر فترة، و ألواناً زاهية في عيني ستظل تتراقص أمامي لمدة أربعة أيام، و ربما نزيه داخلي في جيوبي الأنفية مع انسداد دموي في القرنية، ستؤدي حتماً إلى حدوث انفصال شبكي في أقرب فرصة حتما مع طعم دماء في فمي سيستمر قرابة الأسبوع، و... ألفاظ كثيرة معقدة، و بعد أن سمعتها من الطبيب اندهشت من قوله حسن حظي فربما كان من حسن حظي لو مت أفضل! و أخبرني أنه لا بد أن أستريح في السرير لمدة أسبوع كامل دون أي مجهود و إلا، وطلب مني أن تبلغ الشرطة عن هذه الجريمة و وعدته بذلك و أني في طريقي للإبلاغ، و قبل أن أتركه تذكرت شيئاً ما فأخرجت ورقة من محفظتي كنت قد كتبت فيها اسم الحبوب التي وجدت في السيارة محل الجريمة و أعطيتها للطبيب مستفسراً عن نوع المرض الذي تعالجه هذه الحبوب.

- ده حبوب اسمها إيزوريديا يا أحمد ودي علاج لحالات النهجان الشديد الناتج عن المجهود أو التوتر ومنظم لضربات القلب، و يعمل على تنظيمها أصل ميتافيزيقية الحبوب دي بتعمل على توسيع مجرى...

- (و قاطعته قبل أن يلقي عليّ محاضرة في المواد الفعالة والطب البديل) طيب الحبوب دي بتتاخد إزاي بتبلع ولا بتشم ولا إيه..؟

- لا طبعاً دي حجمها صغير جداً عشان كده بتتخط حبة واحدة تحت اللسان.

وتركت الطبيب بعد ان شكرته مرة أخرى وبدأ ناقوس يدق في رأسي بشدة و لا أدري هل هذا الناقوس من تأثير الضربة التي أصابتنني أم بسبب شيء ما يدق في ذهني.

ذهبت بصعوبة إلى بيتي فلم أعد أحتمل الرنين المتواصل داخل رأسي وبعد أن أخذت حبتين مسكنتين مما اعطاهم لي الطبيب، دخلت إلى سريري مغلقاً هاتفي المحمول لاعتنا كل من حولي و كل شيء والقضية و علاء والمرأة المحبولة، و حتى فوستاك لم يسلم من السباب، وكل من صادفني في هذه القضية الملعونة

أفقت في اليوم التالي على رنينٍ مستمر للهاتف المنزلي، ولا أدري لماذا كل مرة أنسى أن أغلقه هو الآخر قبل أن أنام فأفقت على الرنين المتواصل دون انقطاع فوجدت محدثي ممرضاً في المستشفى العام يبلغني أن علاء أوصاه بالاتصال بي لأنه نُقل إلى المستشفى على إثر مشاجرةٍ افتعلها معه أحد السجناء.

ارتديت ملابسني على عجل فكان عليّ أن أتوجه إلى النيابة أولاً لإخراج إذن الزيارة في المستشفى، و الاستفسار عن سبب المشاجرة وعن تطورات القضية؛ فوجدت أنها مشاجرةٌ بسيطةٌ بين السجناء في العنبر و هذا ما رواه لي وكيل النيابة و علمت أنه قام باستجواب الشهود في القضية وطبعاً اتت كلها في غير صالح علاء ومنهم الجارة ورامي نفسه أتت أقواله متضاربة عند استدعائه للشهادة صباح اليوم، وظهر شخصية سهى عمران صديقة المجني عليها و التي ركزت في مجملها أن رضوى كانت دائمة الشكوى إليها من زوجها، و أنه تبدل بعد الزواج و أصبح شخصيةً مختلفةً تماماً عن علاء الذي عرفته من قبل، و أنه أصبح دائم العراك معها، و أخيراً فإنها رغبت في إلغاء التوكيل في أيامها الأخيرة ولكن القدر لم يسعفها لذلك، وفي الأيام الأخيرة أبلغتها أنها أصبحت تشكّ في علاء

بطريقة جنونية، بعد ان علمت أنه على علاقةٍ بسيدةٍ تدعى نسمة، و أنه على اتصالٍ بها من فترة .

أخذت صورةً من أقوال الشهود، و وضعتها في حقيبتى وتوجهتُ سريعاً إلى المستشفى العام، وعندما قابلت الطبيب المعالج أبلغني أن علاء مصابٌ بالإجهاد الشديد كنتيجةٍ للإرهاق وسوء التغذية، وضعفُ عام هذا بالإضافة إلى إصابته بجرحٍ قطعيٍّ في رأسه كنتيجةٍ لأحد المشاحنات، وعندما لاقيت علاء أخيراً كان وجهةً فعلاً في غاية الشحوب، رابطاً رأسه بضمادة، تقريباً بنفس شكل ضمادتي و كم كان شكلنا يوحى بالسخرية، شرحت له كل ما حدث و أنني كنت السبب في ضياع العقد عندما أكد لي أنه كان فعلاً في الخزانة، و أصيب بخيبة أملٍ كبيرةٍ من الأحداث التي وقعت، و رويت له مقابلي مع جارته وكيف أنقذتني، و ما أكّده الشهود، و أن كل الأقوال بدأت تصبّ في غير صالحه، وكان عليّ أن أستفسر عن أشياء كثيرة:

- قولي يا علاء، إنت آخر مرة شفت العقد ده كان إمتى ؟ وهل فيه أي حد تاني غيرك يعرف طريقه ؟

- آخر مرة كان اليوم اللي رجعت فيه ملقتش رضوى في البيت بصيت في الخزانة قمت لقيته لكن ملقتش وقتها الذهب بتاعها وقلت يمكن يكون في مكان تاني زي الدولار مثلاً لأنها كثير كانت بتسيبه برا، أما العقد عمره ما خرج من الخزانة أبداً، وشكّيت إنها هربت لما ملقتش الذهب موجود في الدولار، لكن أما هديت وقعدت قلت إنها مستحيل تكون هربت وسابت العقد، أكيد كانت هتاخده معاها، لكن رجعت وقلت أكيد نسيته.

- إنتو سجلتوا العقد ده يا علاء هل فيه أي حد يعرف موضوع التسجيل ده؟
- احنا سجلناه من فترة بسيطة ومحدث أصلاً عرف إننا سجلناه حتى أمها متعرفش.
- تعرف محامي اسمه حاتم صديق، طبعاً اللي كان جوزها الأولانى، تعرف إن كان فيه أي علاقة بينهم بعد الطلاق، فلوس مثلاً أو أي شيء تاني؟
- لا معرفش ومفيش أي شيء يستدعي وجود علاقة بينهم من الأصل، إنت عرفت منين حاجة زي دي؟
- النيابة فرغت كل مكالمات التليفونات بتاعة المرحومة ولقينا مكالمات صادرة ليه و آخرهم كان قبل الوفاة بأسبوع أو عشر أيام ولما قابلته وقلت له، قال إنها كانت بتستشيريه في مسائل قانونية.
- يعنى ملقتش غير ده وتستشيريه ؟
- طيب هل في أي علاقة بين رضوى و رامي زميلك؟
- يعنى إيه علاقة؟
- لا مقصدش، أقصد، إزاي رامي اتعرف على رضوى ؟
- الراجل جه معايا البيت أكثر من مرة وشاف رضوى وقعد معاها عشان كانت جايالة عروسة ومحصلش نصيب ورامي كان دايماً بيطلب فلوس كل وقت عشان مشاكل خاصة بيه مع مطلقة الاولانيه وكنت بديلة إلى هو عايزة وشوية شوية طلباته زادت، وبصراحة بقيت بحرج منه ومن طلباته اللي ما بتخلصش ويصعب عليا أني اقوله لا وخصوصاً لما عرفت



أنه بيتعالج بالفلوس دى في مستشفى خاص فقلت عشان أزقهه مني أقوله إنها فلوس رضوى لأنى شطبت بس لازم يكتب ليها وصلات أمانة لأن الصراحة عمره ما رجع سليم ليا وبرضه مرفضش و كتب فعلاً الوصلات دى القديمة والجديدة وبرضة مدفعش وبدل ما يسكت لا ده بدأ يطلب تانى وتالت لأنه على استعداد أنه يكتب أي وصل ومرة طلبت منه إنه يدفع الفلوس اللي عليه لأنى كنت مزنوق وهعمل عمرة للعربية، إتخرج ميت حجة و لما قلت له أنه لازم يدفع اللي عليه فوراً أو رضوى هتبلغ البوليس إترعب وقالى أنه هيتصرف في أقرب وقت لكن والله ما كنت هعمل كده لا أنا ولا رضوى. أنا قلت بس اخوفة عشان يحل عني.

- والكلام ده حصل إيمنى؟
- قبل الوفاة بتلات أيام.
- طيب قولى هل سبق وكنت أوقات بتكلم رضوى من مويله؟
- لا طبعاً ما كنت أكلمها من مويلي أحسن.
- طيب يوم الوفاة قلت انك كلمتها من عند فتحي سليم وقت الظهر تقريباً و ده فعلاً اللي النيابة لفته من تفريغ المكالمات، المكالمات دى كانت قبل ما تكلم رضا بتاع الأمن و الا بعد أما كلمته ؟
- كان بعد أما كلمت رضا بفترة كمان.
- طيب كنت عايز تقولها إيه ؟
- أبداً كنت بظمن عليها لأنى اتصلت بيها يومها بالليل على البيت وملقتهاش وكنت بقولها إن أمها تعبانة أكثر من كل مرة ولازم تيجي تزورها لأنها عايزة تشوفها و طبعاً ده محصلش لأنها كانت في غيبوبة بس مكنتش

عايز أخضّ رضوى على أمها و ألحيت عليها في المجيء و قلت لها إني مش هقدر أوصل للقاهرة النهاردة و هضطر إني أبات، بس.

- يعني مطلبتش منها إنها تبلغ رامي على موبيله إنه يعمل لك أجازة ؟
- لا طبعاً ما أنا قلت لك أنا قبلها اتصلت برضا في الشغل وقلت له يقول لرامي إني مش هقدر أجي يعمل لي أجازة و إنه يتصل بيا لو مش رايح لأن كان فيه يوميه مش عارف ماتش إيه وهو ميقدرش أنه يفوت الماتشات فخفت لأحسن ميروحش وسبت لرضا نمرة الموبيل بتاع رضوى لأنه كان معايا وقتها ونمرة فتحي سليم كمان.

- و إنت ليه مكلمتش رامي على طول وقلت له الكلام دا؟

- لأن اللي كان معايا قلت لك كان موبيل رضوى وكان بدأ يشحط ويفصل شحن ومالوش شاحن زيّه أصلاً، وكنت حافظ نمرة الشغل ومنه السويتش حولني لمكتب الأمن وكان رضا اللي وقتها في الوردية هناك فقلت له الكلمتين دول، إيه كل الأسئلة دي يا أحمد، و إيه علاقة اتصلت برضوى وقلت لها إيه، و إيه اللي جاب سيرة رضا دلوقت؟

- لأن اتضح إن فيه مكالمة خرجت من عند رضوى لموبيل رامي بعد أما كلمتها ولما سألت رامي قال إن رضوى اتصلت بيه عشان بس تقوله إنك مش جاي ويعمل لك أجازة.

- لا طبعاً كذاب، و إيه اللي هيخلي رضوى تتصل بيه أنا مجبتهاش أساساً سيرته ؟

- عرفنا إنه كذاب وكل كلامه ملخبط في التحقيقات، قولي بقي إيه موضوع بوليصة التأمين والشيك على بياض بتاع حاتم صديق؟

- البوليصه دى أنا ورضوى عملناها، فكرة جت على منحها وحبث تنفذها مش عارف ليه قالت لازم نعمل تأمين على حياتنا بمبلغ كبير قال عشان اللي يموت فينا قبل الثاني، الطرف الثاني ياخذ مليون جنيه، ولما جه ياسر وفتش البيت لقي في درج التسريحة صورة من آخر دفعة دفعناها، وفضل يلف ويسأل لحد أما جاب صورة من الوثيقة وطبعاً مش هقولك عمل فيا إيه عشان أعترف إني قتلتها عشان آخذ مبلغ التأمين منه الله، إبقى إنت روح كده لشركة التأمين يا أحمد و اقرأ شروط الوثيقة وهتفهم إن الوثيقة دى مينفعش أصلاً أبلّها و أشرب ميتها، يعني مليش فايده أصلاً فيها، وشوف الشروط اللي ماضيين أنا و رضوى عليها، أما بخصوص الشيك بتاع حاتم فحاتم كان دايمًا بيخلص على فلوس رضوى وكان السبب في إنه شطب على أغلب ميراثها من أبوها الله يرحمه وهي اللي كانت بتقول الكلام ده ليا، أنا معروفوش شخصياً و مرة من المرات آخذ الشبكة بتاعتها كلها عشان يفتح مكتب ليه في وسط البلد وعشان رضوى تأمن نفسها على أي حاجة وافقت إنها تديله الشبكة ومبلغ كمان معاه مقابل إنه يكتب ليها شيك على بياض وفعلاً سلمته مبلغ كبير و الشبكة كمان وفعلاً المكتب نجح وقدر يقف على رجله و رد جزء من المبلغ ليها في الأول قبل ما يحصل الانفصال لكن لسبب في راسها إنها عمرها ما سلمته الشيك ولا هو طلبه منها حتى لما إداها بقية المبلغ قبل الطلاق مباشرة و فضلت شايله في الخزنة .

- تعرف إن رضوى كانت عايزة تلغي التوكيل اللي عملتهولك؟

- تلغي التوكيل !!! لا طبعاً منين جبت الكلام ده؟

- سهى عمران صاحبة رضوى قالت كده في التحقيق وبرضه لما قابلت حاتم بلغني إنها كانت بتسأله على إجراءات إلغاء التوكيل، وسهى قالت إن كان فيه خلافات مستمرة بينكم .

- سهى دي أصلاً عمرها ما ارتاحتلي مش عارف ليه لا كنت بطيقها ولا بتطيقني أما الخلافات اللي بتقول عليها كانت هي بتكون السبب الرئيسي فيها، سهى كانت بالنسبة لرضوى مثلها الأعلى وبتحب تقلدها في كل حاجة وسهى كانت دائماً بتملا راسها بكلام فارغ زي ما تكون هي اللي ممشياها والتوكيل نفسه أنا معملتش بيه أي حاجة ولا كنت هستفيد من وراه بمليم وياريتة كان اتلغى من زمان منا كنت تاعب قلبي و أجرى هنا وهنا و أحصل فلوس ليها و أحط لها في حسابها اللي في البنك وشوف الأوراق ولا عمري سحبت شلن من فلوسها بالتوكيل، رضوى نفسها عرضت عليا إنها تلغي التوكيل لأنها حست إني تعبان و شاييل طاقة فوق طاقتي، الكلام ده كان من فترة كبيرة لكن أنا رفضت، بسيطة روح البنك وانت تعرف.

- سهى دي جوزها اسمه ...

- (مقاطعاً) تقصد طليقها دي إتجوزت و إتطلقت ثلاث مرات لأنها أصلاً شكاكة أوي زي ما رضوى كانت بتحكي لي عليها و آخرهم واحد اسمه مسعد أو سعد البنا وطلقها من شكها المستمر فيه.

- قولي يا علاء، إنت على علاقة بواحدة ومتقولش علاقة يعني إيه، يعني ماشي مع حد؟

- إنت إيه أسألتك الغريبة دي يا أحمد؟

- متجاوبش على سؤالي بسؤال (وقد قمت بالصراخ محتدًا) خليك كده كل أما أسألك حاجة تقعد تلف وتدور غباءك ده هيوصلك لحبل المشنقة من غير مقاطعة، لا إنت عايز تقول كنت فين وقت الجريمة ولا مع مين ولا عايز تريحنى في الوقت اللي كل الأدلة ضدك من أول الجارة اللي اتعرفت عليك ليلة القتل ومصرّة على إنه إنت ولا عن غيابك في المستشفى اللي محدش عرف كنت فين وقتها و لا إنت راضي تتكلم، سيبك من الاتصالات والكلام الأهل ده اللي إنت فاكرك إنه هيبورك على الرغم من إني ماقداميش غيره أسند عليه، النيابة عندها كومة دوافع تدينك و أنا و لا كلمة هقولها هتقنع المحكمة والبركة فيك!

- (و قد أرخى رأسه صامتاً إلى الارض) محدش فيكم مقدر العذاب اللي أنا فيه، محدش حاسس بالنار اللي جوايا، حياتي كلها انتهت أنا مبقاش عندي أي رغبة في الحياة، ولا عايز أعيش، و ميهمنش لو رحت أصلاً للمشنقة، أيوة أنا و رضوى كنا على خلاف في الفترات الأخيرة، أيوة كان فية مشاكل، أيوة مكناش مرتاحين في عيشتنا، بس كنت بحبها و لا أقدر إني أنذيتها، كل الكلام ده قلته في التحقيق ومحدش صدقني أحسن لأنني فعلاً مستاهلش إني اعيش ولا حتى أستاهل ضفرها (و بدأت الدموع تلمع في عينيه) ولما بقعد مع نفسي بعرف قد إيه كنت حقير وزبالة.

- إيه، كنت بتخونها وعلى علاقة مع واحدة صح؟

- أيوة يا أحمد، أيوة على علاقة بواحدة وده اللي رضوى إتأكدت منه قبل وفاتها، وكانت مخاصماني في الأيام الأخيرة لدرجة إنها طلبت الطلاق، و أكيد كانت عايزة تلغي التوكيل عشان كده، عارف أنا مفرقش أي حاجة عن اللي قتلها، كفاية إني أذيتها في مشاعرها، كفاية إني جرحت

كبريائها، أنا في عذاب يا أحمد، في الزنزانة عذاب، و هنا عذاب، و وجع الضمير ما بيفارقنيش لحظة واحدة، أنا كل أما أنام بشوف صورتها قدامي وهي مجروحة بسبيي.

- (و قبل أن يفيض في مشاعر الحب كالعادة) إسمها نسمة صح؟

- أيوة صح عرفت منين؟

- لأن سهى الله يكرمها قالت كده في النيابة، قالت إن رضوى اشتكت ليها إنك على علاقة بواحدة اسمها نسمة، للأسف يا علاء كل يوم موقفك بيزيد سوء عن اللي قبله و أنا مش لاقى أي شيء أبني عليه دفاعي.

- عارف، أنا عارف، وعارف إنني مستاهلش أطلع براءة، عارف ليه؟ لأن الوقت اللي كانت أمها بتموت اتصلت بواحدة كنت أعرفها قبل ما أتجوز في طنطا و اسمها نسمة وكنت على علاقة معاها لغاية أما إتجوزت وبرضة استمرت علاقتنا حتى بعد جوازها، جوزها تاجر من إسكندرية ومتجوزها على مراته، ودايماً مسافر، و لما أنا إتجوزت رضوى في الأول حاولت أقطع العلاقة دى ومكنتش بشوف نسمة كتير لغاية أما كلمتها من شهرين وبدأت الإتصالات ترجع تاني بيني وبينها، و كنت صراحة مشتاق ليها جداً ولما رحت طنطا كلمتها من عند فتحي سليم وطلبت إنني أشوفها وفرحت هي جداً وقالت لي أروح لها على البيت لأن جوزها كان مسافر ومش هيوصل قبل يومين كمان و رحت فعلاً وقابلتها و كنت عندها من الساعة سبعة إلا ربع لغاية الساعة اتناشر إلا تلت وقتها سبتها ونزلت على المستشفى عشان أطمئن على أم رضوى

- أنا مستغرب من كلامك يعنى إنت في الوقت ده كنت معاها وعندك شاهد إثبات أنه شايفك و إنت مش عايز تتكلم، بسيطة تيجي هيا تقول كده وموقفك هيتغير .

- لأ طبعاً! إنت بتهزر يا أحمد ؟ هتيجي تشهد على نفسها وتفضح نفسها وتقول الكلام ده! تقول إني كنت في حضنها وقت الجريمة ولما كان جوزها مسافر! عمرها ما هتقول كده، ده مش بعيد لو نكرتني من أساسه وبعدين أنا محبش افضح حد وثق فيا.

- الله يخرب بيتك يا علاء! أسكت! أسكت! إنت بتفوّر دمي إديني رقم تليفونها وعنوانها ومالكش دعوة يا أبو إحساس إنت.

- متحاولش! عارف يا أحمد (و أرخى رأسه مرة أخرى و أحسست أنه سيبدأ مرة ثانية في اجترار الذكريات و بدأ الصداع يدب في رأسي مرة أخرى) أنا مرّيت بظروف زي الزفت في السجن عمري ما كنت مصدق إني ممكن أتهان و انضرب و تنجرح كرامتي بالشكل ده، منه لله ياسر هو سبب كل البلاوى اللي أنا فيها دي، حتى و أنا جوا السجن مسلمتش من أذاه، باعتلي بلطجي لغاية عندي إسمه وزه، وبيقولي ياسر بيه يبسلم عليك يا ابن الـ.. وقام متخانق معايا من غير حتى ما ألحق أدافع عن نفسي وشوية لقيت نفسي هنا.

- علاء بالمناسبة، إنت سبق إنت ورضوى أي حد منكم اشتكى بأى مرض في القلب أو بياخد أي أدوية لعلاج القلب؟

- لا محدش أبداً ليه ؟

- هتعرف، هتعرف قريب أوي، أنا بس كنت عايز أتأكد.

وتركته و انصرفت بعد أن كاد أن ينشب بيني وبينه مشاجرة بعد أن أمسكت بتلابيبه و أصررت على أن يكتب لى عنوان وهاتف نسمة.

رجعت لمقابلة وكيل النيابة مرة أخرى شارحاً له كل شيء توصلت إليه مع علاء ومقدماً إليه عنوان وهاتف نسمة طالباً منه إحضارها للشهادة في القضية فربما قلبت شهادة موقف علاء كله رأساً على عقب وبعد خروجي من دار القضاء كنت قد عزمت في الصباح على أن أذهب إلى مشوار غاية في الأهمية و كان من المفترض أن أقوم به بمجرد قيامي وهو مقابلة ياسر، وعندما ذهبت إلى القسم اقتربت قليلاً من باب المكتب الموجود به ياسر وركلت الباب بقدمي بقوة ودخلت إليه بعد أن جفل من طريقة دخولي تلك ولما رأيته لم أعطه فرصة للحديث و إنما صرخت في وجهه ما الذي يفعله أو كيف وصل إلى هذا المستوى من الدناءة، ولكن ببرود على غير المعتاد منه أجلسني أمامه قائلاً:

- مالك فيك إيه بتصوت على عمرك كده ليه؟
- يعني ما انتاش عارف (و بدأت في الصراخ مرة أخرى) تقدر تفهمنى إيه الهبل اللي إنت بتعمله ده ؟
- وطي صوتك! إيه إنت قاعد في زريبة ؟ لولا إن إحنا أصحاب وباقي على العيش والملح كان زمانك مرمي في الحبس!
- عيش و ملح و أصحاب إيه! علاقة الصداقة والزمالة والعيش والملح بتاعتك دى إنتهت من اللي حصل إمبراح و أنا فاهم و إنت فاهم.
- بطل صوت زي النسوان شوية وقولي إنت متهبب جاي عايز إيه دلوقت؟

- عايز تفسير!!!

- تفسير إيه يا ابو تفسير؟ إنت حمار مش فاهم أي حاجة ولا عمرك هتفهم! عاملي نفسك ناصح عايز تعمل نفسك محامي عُقرا! يا اخي روح اتلهي وياريت نلخص ونجيب من الآخر إنت عندك حاجة عايزها و أنا هشوفك إنت برضة ليك نصيب واللي إنت عايزه هتأخده، شفت برضه أنا باقي على العيش والملح إزاي، أقعد، أقعد بس و إهدا وقول تحب تأخذ كام؟

- كام ؟ يعنى إيه كام؟ تقصد إيه؟

- يعنى تأخذ فلوس كام يا متر وتجب العقد اللي إنت عارف إننا قالين الدنيا عليه وبرضه متعملش عبيط وتقول عقد إيه أظن البطحة اللي على راسك دي مفكرأك كويس!

- للدرجة دي وصلت بيك الوقاحة! أنا كان عندي شك إنه إنت اللي سلّطت حد يعمل في كده بس كنت برجع و أقول مش ممكن و..

- (مقاطعاً) و النبي بطل هبل وكلام أفلاطوني مالوش لزمة! وقاحة إيه وكلام فارغ إيه، مبقولك خيلنا نجيب من الآخر وخلّص، الراجل إلى جالك امبارح و مسى عليك، هاه مسى عليك ملقاش العقد معاك ولا في الخزنة اللي أنا حفيت عشان أعرف مكانه وعرفت إن علاء مخبيه، و أكيد هتقنعه إن ده دليل براءة ليه و أكيد هيقولك، و فعلاً إنت وصلت لكن مكش العقد هناك، أو يمكن قدرت إنك تخبيه في مكان تاني، قول، قول بس يا أحمد و أنا هراضيك بمبلغ لو قعدت طول عمرك تشتغل مش هتشم ربعه،

- أنا مش ممكن أنزل لأسلوبك الواطي ده، و إذا كان العقد مش معايا دلوقتي إنما معايا حاجات تانية كثير هتقلب القضية، وتجب ناس مكناش شاكين فيهم لحبل المشنقة.

وتركته سريعاً قبل أن يلفق لي أي تهمة، و خرجت من القسم و أنا أتساءل إذا لم يكن العقد وصل إلى ياسر، فأين ذهب العقد؟

عند وصولي إلى المنزل ظلّ التساؤل يلحّ عشرات المرات في رأسي التي لا زالت تدق وتضيء أين اختفى العقد؟ أخرجت جميع اوراق القضية وقرأتها مراتٍ ومرات، هل لهذا العقد صلة بالجريمة؟ أو بمعنى اصح، هل قُتلت رضوى خصيصاً من أجل هذ العقد المختفي، أم كان للعقد دورٌ ثانوي في القضية ؟ حاولت أن أفسر كل شيء من البداية:

أولاً باختفاء العقد تؤول قطعة الأرض المتنازع عليها إلى فتحي سليم زوج الأم الذي لا يعلم إلى هذه اللحظة أنه قد تم تسجيل عقد البيع الإبتدائي و أصبحت ملكية الأرض لرضوى نهائية ،فلو اختفى العقد الإبتدائي كما يظن كان شيئاً لم يحدث وتظل الأرض من نصيب فتحي سليم لورثه من زوجته، أما لو علموا بالتسجيل فلا جدوى من البحث الهيستيري عن العقد أو حتى قتل رضوى، اللهم إلا إذا كان الدافع هو الانتقام وطريقة القتل بالصورة التي حدثت لا تشير إلى الانتقام.

كان أمامي ورقة تشير إلى كل المشتبه فيهم علاء - رامي - ياسر- فتحي سليم- وقد حذفت اسم حاتم صديق من القائمة ونظرت إلى جميع الأسماء لحصر الدوافع التي تجعل أياً منهم مشتبهاً فيه وتخيلت ما السيناريو الذي حدث فكان كالتالي:

أولاً علاء فلو تخيلنا أنه عاد من طنطا و استدرج رضوى بحجة توصيلها إلى طنطا ثم قتلها ومحاولة دفنها في قطعة أرض بناء ولكن أحدهم رآه وهرب وعاد سريعاً إلى طنطا ولا يوجد لديه حتى الآن حجة غياب مقنعة يعترف بها القضاء أما عن دوافعه فهي الميراث، و وثيقة التأمين التي سأل فيها الشركة ومحاولة إجبار نسمة على الشهادة و قول الحقيقة و زعزعة شهادة الجارة، و سهى وبذلك قد يمكن إحداث فرق في سير الاتهام.

والمتهم الثاني في القضية هو رامي زميل علاء، فهو شخص عصبي المزاج متوتر دائماً بشهادة أغلب الأشخاص، دائم الاستدانة من علاء، كان على علاقة برضوى بشكلٍ ما و لا أحد يعلم حقيقتها، يوم الجريمة أيضاً اتصلت به رضوى لسببٍ غير مفهوم و ربما لهذا السبب قد يكون ترك المصنع بحجة مشاهدة المباراة وذهابه سريعاً إلى شقة علاء وجلسه فترة من الوقت هناك ثم نزولهما سوياً و ارتكابه للجريمة كما سبق و عودته سريعاً إلى المصنع، ويؤكد ذلك حجة عدم وجوده عندما حاول خفير المصنع البحث عنه و إغلاق هاتفه ثم العودة إلى المصنع أو ربما إلى شقة علاء مرة أخرى للبحث عن وصلات الأمانة أو حتى المصوغات التي اختفت هي الأخرى، و دخوله للمنزل بسهولة فربما قد قام بعمل نسخة من مفاتيح علاء دون ان يشعر الأخير بذلك، فلو كان الدافع لذلك هو حب المال مع احتياجه المستمر له، هذا بالإضافة إلى أنه لم يبرر سبب تغيبه عن المكان الذي قال أنه سيتواجد به وقت المباراة وطول هذه الفترة عن المعتاد وعدم اعترافه بحقيقة علاقته مع رضوى ؟ ولكن لو كان هناك فعلاً علاقة، فلماذا لم تعطه رضوى إيصالات الأمانة الخاصة به من الخزانة ؟ اللهم إلا اذا لم تكن تعلم أساساً مكان المفتاح فلو لم تكن تعلم لكانت

هى السبب فى بعثرة محتويات الشقة لبحثها عن الإيصالات، أو المفتاح ولما لم يجدها سوا فى أى مكان نزلت وركبت السيارة مع رامى وحدث ما حدث فيجب سؤال علاء عن رضوى و هل كانت تعلم مكان المفتاح أم لا؟

أما ياسر بالاضافة إلى دافع العقد هناك دافع الانتقام لأنه قد حاول الارتباط بها مرتين ولكنها رفضت الزواج منه فظهر بشخصيته العدوانية بعد ذلك، وطريقته فى تعذيب علاء وإجبارة على الاعتراف بما لم يفعلها ومحاولة إصاق التهمة به بشتى الطرق وياسر بالاشتراك مع عمه، حاولا الحصول على العقد فأتصور أنه ذهب وقت الجريمة إلى رضوى و أخبرها بحالة أمها الحرجة وعندئذٍ نزلت سريعاً معه فى العربة الزرقاء ثم قتله لها وسرقته لمفاتيح المنزل وعودته إليه مرة أخرى للبحث وعندما لم يجده كان على ثقة من ان علاء يخفى العقد فى مكان ما بداخل الشقة وعليه فقط أن يصبر وسيظهر العقد على يد أى مغفل كان، فكان عليه فقط أن يأمر أحد مجرميه بمراقبة المنزل، وكان على يقين بأن المغفل لن يكون إلا المحامى الخاص بعلاء و عليه فقط أن يراقب تحركاته و وقت دخوله لمنزل علاء وفعلاً أعطاه المغفل كل ما يتمناه ولكنى كنت أظن أنه سرق العقد من بين يدي وهرب به إلا أن لقائي الأخير به بدّد هذه الفكرة، وبمساومته لى بهذه الطريقة، جعلني أتأكد أن العقد لم يصل إليه و إلا كان قد أنكر الأمر برمته ويبقى سؤال هام، لن نعرفه أبداً، ما الذى كان يفعله عند رضوى يوم الوفاة صباحاً؟

اما المتهم الرابع فهو فتحي سليم ذاتة فهو لم يكن لديه أى حجة غياب، فلم يكن بالمستشفى، ولم يتم التحري عنه أصلاً أو يأتى ذكر

اسمه في التحقيقات فهو أتى في الايام الاخيرة إلى رضوى للمساومة على العقد و حدث خلاف بينهما وربما هدها فيها بالقتل لو لم يظهر العقد وربما كان شريك ياسر في الجريمة، وفي الوقت الذي كان فيه ياسر يقوم بارتكاب جريمته، كان هو في الشقة يبحث عن العقد في كل مكان، هذا بالإضافة إلى السيارة الزرقاء المسروقة من طنطا وهي التي ارتكبت بها الجريمة.

تساؤلات كثيرة لا أجد لها أية إجابة وعندما أعود إلى قراءة محاضر المعاينة وجرد حقيبة السفر أجد فيها ملابس منزلية - بلوزتين سوداوين - بنطلون وجيب أسود - شاحن موبيل - حذاء بني اللون - شبشب - ملابس داخلية - عدة أقلام ملونة - عدة مكياج - فوطة واشياء من هذا القبيل بمعنى إن بترتيب هذه الاشياء لا يوجد فيها أي اثر للهروب بل على العكس فتشير ألوان الملابس السوداء إنها كانت على سفر وتأكد من وفاة أو إن أمها في طريقها للوفاة وبجرد حقيبتها الشخصية وجد صورة من البطاقة الشخصية - نظارة طبية - سلسلة بها محمد رسول الله - كارت باسم حاتم صديق و.... بقية الجرد

وعندما أعدت قراءة محاضر الجرد، و محاضر المعاينة، و محضر الدورية الراكبة التي اكتشفت الجثة، و اتصال الشاهد، وهروب الجاني فور شعوره بالشاهد، كان هناك شيء ما صغير، لا يزال يلح على ذاكرتي في ما قرأته شيء تافه ولكنه كان في غير مكانه الصحيح وكلما اقتربت من معرفة هذا الشيء يتلاشى، فعندما يخطر شيء ما على ذاكرتك وتحاول أن تتذكره جيداً يهرب أسرع كلما حاولت أكثر أن تتمعن فيه.

ربي لماذا كل هذا الادلة تشير إلى طنطا؟ السيارة المسروقة والمستشفى وسر غياب علاء وفتحي، بل ونسمة أيضاً من طنطا، و على الرغم من شخصية رضوى الوديعة في الصورة المعلقة في صالة علاء، كان أمامي عدة متهمين ولكل منهم دافع معين يميزه عن غيره على الرغم من إجماع الأدلة التي كانت تشير إلى علاء بشهادة الجارة ذاتها.

وهذه الجارة ذاتها كان الاتهام كله يقوم على شهادتها، لماذا لم انتبه لذلك من قبل ؟ فالقضية تقوم على شهادتها وهي من تحرك الأحداث من البداية، هي الشخص الوحيد الذي زعم انه رأى علاء يصطحب رضوى وهي الشخص الوحيد الذى وجدته إلى جواي بعد واقعة الاعتداء، تمعنت في الأمر، هل هناك صلة ما تربطها بياسر؟ فربما تكون هي التي سرقت العقد و احتفظت به لتعطيه لمن سيدفع أكثر، و الأدهى، لماذا لا تكون هي أساساً من قتلت رضوى و السلاح دائماً موجوداً في يدها ولكن في هذه الحالة يلزمها شريك آخر... آه ولكن هل سيستطيع؟؟

أما بالنسبة للسكين المستخدم في ارتكاب الجريمة فقد قال الطبيب الشرعي أنه ربما كان هناك نوعين من الأسلحة التي ارتكبت بها الجريمة، الأول طُعن به طعنتين قاتلتين في القلب و الصدر بعمق نصل بلغ الاحد عشر سنتيمتراً، ثم بعد فترة طُعن ثلاث طعنات في أماكن متفرقة بعمق نصل بلغ الثلاث عشر سنتيمتراً وهو السكين الموجود في مكان الجريمة والموجودة عليه بصمات علاء فإذا كان علاء القاتل، كان عليه أن يتخلص منه من الأساس ولا يتركه بالطبع بجوار جثة زوجته، وعلى هذا الدليل بنت النيابة اتهامها لعلاء على الرغم من عدم وجود أي أثر لبصمات داخل السيارة، مع تجاهلها لموضوع النصلين من أساسه.

حاولت أن أقنع نفسي بنفي التهمة عن علاء وليس البحث عن مرتكبيها و محاولة الاستفادة من التضارب الحادث في تقرير الطبيب الشرعى ومحاولة زعزعة أقوال الشهود و محاولة إجبار نسمة على الشهادة، وبهذه الخطوات قد أفلح في نفي التهمة عن علاء وعلى الشرطة إيجاد القاتل الحقيقي.

حاولت التحدث مع نسمة هاتفياً أكثر من مرة وكل مرة كانت تغلق الهاتف في وجهي عندما أوضحت لها من أكون وما هي مهمتي ومعرفتي بنوع العلاقة مع علاء وطلب الشهادة بما حدث فعلاً ولم تفلح معها أي محاولات للتحدث أو حتى الرد على هاتفي.

إلا أنه في تمام الثانية صباحاً ولم أكن قد أغلقت هاتفي كالعادة كلما كنت مجهداً أو على وشك النوم العميق فوجئت بنسمة تحدثني ولم أكد أرد عليها حتى بادرتني قائلة:

- يعني إيه عايزني أروح أشهد بالكلام الفارغ اللي إنت جاي تقوله ده؟
إنت بتهزر يا أستاذ أحمد إيه قلة الأدب دي؟ أنا كنت بقفل السكة في وشك عشان جوزي كان هنا في البيت وده راجل بيغير عليا جداً عيب الكلام اللي إنت جاي تقوله لي ده، إتقِ الله و متصلش بيا تاني أحسن مش هيحصلك كويس.

- يا ستي ربنا يجعلنا جميعاً من المتقين، بالراحة عليا شوية، إسمعيني دقيقتين بس وبعدين إقفلي ومش هضايقك تاني، علاء معندوش أي دليل براءة غيرك، سيبك بقى من الشويتين دول وربنا يهديك، والوقت اللي كان فيه معاكي هو بالظبط الوقت اللي حصلت فيه الجريمة.

- و أنا مالي! مراته ماتت و الا اتقتلت وهو محبوس و أنا ذنبي إيه
بس؟

- إنتِ عارفة عواقب كتمانك الشهادة دي إيه؟ متظلميش نفسك
مرتين مرة بخيانة جوزك ومرة بكتمانك الشهادة إتقِ الله إنتِ و إشهدي
بالحق عشان...

وطبعاً لم تدعني أكمل حديثي فقد أغلقت بوجهي الهاتف، لذا كان
علي أن اتوجه صباحاً للنيابة مطالباً سرعة شهادتها قبل أن تحال القضية
إلى محكمة الجنايات.

حلمت في هذه الليلة حلماً غريباً، بل أشبه بكابوس؛ فقد رأيت كل
الأدلة تتجمع في يدي و هناك كل الإجابات التي حيرتني وكان هناك
شخصٌ ما جالسٌ أمامي يجيب على كل شيء في دقة تامة أمّا أنا فكنت
مقيّد اليدين و القدمين وفجأة رأيت هذا الشخص الغير محدد الملامح
ينتهي من حوارهِ الشيق معي و يقوم ليقترّب مني و يصوب مسدسه نحوي
لأصحو مفزوعاً من صوت الطلقة و للأسف كما يحدث لنا عادةً عندما
نصحو من نومنا لا نتذكر ما حلمنا به بل الشيء الذي يكاد أن يفقدني
عقلي اختفى أيضاً مثل الشعور الذي تعتاده عند الدخول إلى غرفةٍ معينةٍ
كل يوم وفجأة تدخل الغرفة مرّةً وتذكر بعد أن تخرج أن هناك شيء
ناقص، أو شيءٌ ما ليس في مكانه !!

توجهت إلى مكّتي بعد مقابلي مع وكيل النيابة وجلستُ أمام الأوراق
مرةً أخرى، و مع محاولات التقليل من المشتبه بهم و إضافة أشخاص
آخرين وبالتفكير المنطقي وجدت أن كل الدلائل تشير إلى شخصٍ واحد،



حاولت أن ازيح هذا التفكير من رأسي لتبقي مهمتي فقط إنقاذ علاء ومحاولة العثور على دليل واحد يدين هذا المشتبه به.

كان علي الاتصال بهاتف سهى و تحديد ميعادٍ لملاقاتها ومناقشتها كإحدى الشهود و التي سأعتمد على زعزعة شهادتها، ولم تعترض السيدة فقد قالت أن علي أن أتوجه إليها اليوم إذا أحببت

فى أحد البنوك فى مدينة نصر كانت الساعة فى يدي تشير إلى ما قبل الواحدة بقليل عندما بدأ اللقاء بينى وبين صديقة سهى الوحيدة:

- أهلاً و سهلاً يا أستاذ أحمد اتفضل

كانت هذه بدايةً مبشرة، لم أتوقع منها هذا الترحاب فكنت أشعر أنها ستكون أكثر عدوانيةً وتحفزاً لأنني أدافع عن الشخص الذي تشعر أنه قتل صديقتها، و لكنني وجدتها فى قمة الذوق وشرحت لها ما أنا عليه من حرج، وعليها أن تعذرني لتطفلي عليها.

- صدقني يا أستاذ أحمد، علاء بقى غير زي ما إنت فاكِر، دي رضوى الله يرحمها كانت بتشتكي منه مرّ الشكوى، بقى بخيل وعصبي، تصدق أنه مش عايز حتى يصرف عليها! كان عايزها هي اللي تصرف عليه من ميراثها، ودايماً كان بيثور عليها لأي سبب.

- بس دي مش أسباب تخليه يقتلها يا مدام سهى .

- أيوة طبعا بس بقى مجنون أول ما عرف إنها رجعت تكلم حاتم جوزها الأولاني .

- ومين قالك إنه عرف ؟ هي قالت لك كده؟



- لا بصراحة معرفش، بس كانت دايمًا بتحس أنه بيتصنط على مكالماتها في التليفون

- طيب هي المرحومة قالت لك رجعت تكلم حاتم ليه؟

- قالت إنها قابلته صدفة وكانت عايزة تاخذ رأيه في حاجات خاصة بيها و صراحةً، قالت على الرغم من طلاقها إلا إنها مقدرتش تنسى حاتم على الرغم من اللي عمله فيها، وفي الأسابيع الأخيرة بقت تعتمد تكلمه عشان بس تسمع صوته و كانت برضه بتتعمد تغيظ علاء بسيرته وكان بيتجنن لما تحكيه عنه .

- وعمل إيه حاتم فيها، و ليه سبب الطلاق مادام متعلقة بيه كده ؟

- ده بقى إنسان فظيع! كان مادي بطريقة بشعة كان بيسحب كل فلوسها ولما كانت بترفض كان ممكن يمد إيده عليها ويضربها لحد أما وصل الأمر للطلاق ده كان رافض يصرف عليها وكان عايزها تصرف عليه من فلوسها.

- (متهكمًا) برضه؟ غريبة أوي دي ؟ قولي لي يا مدام سهى إنت كنت تعرفي علاء شخصيًا و الا مجرد كلام من رضوى؟

- لا مكنتش أعرفه شخصيًا أوي يعني، يمكن قابلته بتاع خمس مرات أنا مكنتش بروح البيت كتير عند رضوى، و لا كنت برتاح لعلاء وكنا بنتقابل عند جارتها جينا اللي ساكنة فوق، دي ست سكر عارف، أنا اللي جبت ليها القط بتاعها من واحدة صاحبتى هنا كانت عايزة توزع قططها إستنى أما أعرفك عليها يا برديس يا برديس..



- (مقاطعاً) برديس إيه بس، وقط إيه يا مدام سهى لو سمحتي إحنا بنتكلم عن واحد هيتشنق و إنت سايباني وبتكلمي في القطط؟ طيب قولي لي هي قالت لك عايزة تلغي التوكيل ليه؟

- (وقد أحست بالحرج و انصرفت عن محاولة تقديم زميلتها صاحبة القط الغبي) أبداً قالت إنها بقت مش مأمناه على مالها بعد أما عرفت موضوع البنت اللي ماشي معاها وبدأ يصرف عليها.

- وعرفت حاجة زي دي إزاي؟

- إتصنطت على مكالمه بينهم ولما فضحته إتخانقم خناقة كبيرة وطلبت الطلاق وده كان قبل الحادثة بحوالي أسبوعين وقالت لي إن البيه بيصرف فلوسها على بنت اسمها نسمة .

- لغاية هنا وستوب شوية، عرفت مين إن اسمها نسمة ؟ وعرفت مين إنه بيصرف عليها؟

- من دفتر شيكاته، لقيته كاتب ليها شيك من فترة وكان حوالي خمس آلاف جنيه ولما سألته بحسن نية قال لها مش فاكتر ده كان ليه وقال إنه كمبيوتر كان شاربه ونسيت الموضوع لغاية أما سمعته بيكلم واحدة ويقول لها يانسمة ياحياتي، اتجننت وافتكرت الموضوع كله.

- إنت قلت الكلام ده في محضر النيابة أنا فاكتر إني قريت عن إسم البنت دي لما قريت كلامك فى النيابة

- آه فعلاً قلت الكلام ده.

- طيب متشكر أوي يا مدام سهى و آسف إني عطلتك

وتركتها و انصرفت و كانت سهى بحديثها معي شخصيةً يجوز التأثير
فعليا على شهادتها كليا وخاصة انها لم تلتق بعلاء كثيرا حتى يترك لديها
اية انطباعات ويبقى تفنيد باقي الأدلة.

توجهت إلى المستشفى لأغير عن جراحي وبشرني طبيبي بان التجمع
الدموي الحادث في موخرة رأسي بدأ في الزوال، الحمد لله و بذلك لن
يكون هناك احتمال شلل، و قبل أن أفرح بالخبر أخبرني بأن الصداق
المستمر هذا دليل على احتمال حدوث انفصالٍ شبكي في القريب
العاجل، شكرته و انصرفت مقسماً بالله أنني لن أغير على جراحي مرةً
أخرى ولو أدى ذلك لحدوث تربة في رأسي .

عندما رجعت إلى مكتي لأخذ بعض الأوراق الهامة وجدت سكيرتيري
تخبرني بأن وكيل النيابة قد قام بالاتصال بها بالأمس ولم يجدني ونسيت
أن تخبرني، وقال لها أن نسمة قد استلمت إعلاناً يبلغها فيه بضرورة
توجهها للنياحة في الصباح الباكر.

وفي الصباح توجهتُ إلى النيابة لحضور التحقيق مع نسمة ولدهشتي
الشديدة أبلغني وكيل النيابة أنها كانت موجودة بالأمس و أدلت بشهادتها
و بالطبع كانت الشهادة في غير صالح علاء بالمرّة، فقد نفت وجود أي
علاقة تربطها به ونفت معرفتها له من الاصل وللأسف علمت من وكيل
النيابة أن زوجها قام بتطليقها كنتيجة لهذه الشائعة و أنها سترفع قضية ردّ
شرفٍ على شخصي، ولهذه الأخبار السيئة أخبرني وكيل النيابة بأنه اليوم
سيأمر بإغلاق التحقيق و إحالة أوراق القضية إلى محكمة الجنايات
لتحديد جلسة في أقرب فرصة بعد أن ضاع الأمل الوحيد الذي كدت أن
أتمسك به.

(حضرات السادة المستشارين إن المتهم المائل أمامكم قد....)
 نظرت مرة أخرى إلى وكيل النيابة الشاب الذي سينطق بكل العبارات
 المفوّهة التي سينطق بها لتوجيه الاتهام بكل الأدلة إلى علاء و محاولة
 وضع راسه بين الرحي، وسرحت في أوراق هذه القضية و ألعيبها محاولاً
 التفكير في كيفية إبداء دفاعي والذي سيبدأ في مرحلة لاحقة و إلى الآن لم
 أضع يدي على أي دليل ملموس يحسّن من موقعي، فكلما وضعت يدي
 على أحد الأدلة تلاشى مرة أخرى في مهب الريح، فهذا هو موضوع نسمة،
 ثم اتهامي لرامي وموضع السكين وبصمات علاء وانتبهت إلى صوت وكيل
 النيابة الذي لايزال يخطب بصوته الجمهورى في قاعة المحكمة بنفس
 الأقاويل المعتادة والتي يطالب فيها بتوقيع أقصى عقوبة على المتهم وهي
 الإعدام شنقاً و اقشعر مع صوته جسدي عندما نظرت إلى علاء ووجدته
 يتحسس رقبتة وكان وجهه يعلوه صفرة الموت و أسترسل مرة أخرى.

(أما الأدلة يا حضرات المستشارين تتلخص في الاعتراف الموقع من
 المتهم والذي لم يثبت جدياً تعرضه لأي نوع من أنواع الضغط من رجال
 التحقيق وكذلك شهادة الشهود والأداة المستخدمة في الجريمة وبصمات
 المتهم الواضحة عليها وطبقاً لما ورد في تحريات المباحث فقد تبين
 بشهادة الشهود أن المتهم في يوم السبت الموافق سبعة عشر من يوليو
 عام ٢٠٠٦ توجه إلى منزله ثم اصطحب المجني عليها رضوى محمد عبد
 القادر المسلماني متوجهاً بها إلى محافظة الغربية لحضور مراسم وفاة
 والدتها وفي الطريق قام بقتلها ومحاولة التخلص من جثتها بلفها في كيس
 مشمع كبير، ودفنها في مكانٍ أعده مسبقاً قبل ارتكابه للجريمة و بجوار
 الجثة داخل الكيس تم العثور على الأداة المستخدمة في ارتكاب جريمة
 القتل و هي سكينٌ حادٌ ذو نصل بطول ثلاثة عشر سنتيمتراً و بعرض اثنين
 سنتيمتر وقد تعرّف المتهم على الأداة على أنها ملكه و أثبت الطب

الشرعي تطابق البصمات الموجودة على السكين مع بصمات المتهم، هذا وقد سدّد المتهم عدة طعناتٍ قاتلةٍ في القلب والصدر والمعدة والكبد وسيأتى دور عرض الجريمة من وجهة نظر الطبّ الشرعي، ثم بعد أن ارتكب المتهم جريمته قام بلفّ المجني عليها مع الأداة المستخدمة وقام بسحبها إلى المكان المعد للدفن إلا أن أحد البوابين قد رآه وصاح عليه فأدى ذلك إلى تركه الجثة سريعاً وركوبه العربة الزرقاء التي كانت مسرحاً للجريمة، و لتعجله ولعيب ميكانيكي حدث فجأة لم يقدر على إدارة السيارة فما كان منه إلا أن فرّ سريعاً، فاتصل الشاهد بالنجدة وتبيّن أن السيارة مسروقة، و تم عمل محضر المعاينة وجرّد للسيارة وقد تبين وجود حقيبتين أحدهما حقيبة سفر والأخرى حقيبة يد المجني عليها والتي تم ايجاد صورة ضوئية من بطاقة شخصيتها في جيبٍ داخلي و بذلك تمّ التعرف عليها، و بجرد محتويات حقيبة السفر تبين أنها يوجد بها...

كان وكيل النيابة يتحدث دون أن ينظر إلى أيّ ورقة أمامه ويتذكر جميع التفاصيل بحذافيرها، و تعجبت هل سيأتي دوري و أنا ممسكٌ بملفٍّ لا يقل عن خمسمائة صفحة بكل المحاضر والمعاينات و التقارير الطبية والطب الشرعي وما إلى ذلك !!! ويسترسل مرة أخرى:

(ثم يا حضرات القضاة بعد أن ارتكب المتهم جريمته هرب إلى طنطا لاستكمال مراسم العزاء ثم عودته مرة أخرى إلى القاهرة لحبك روايته المزعومة و الادعاء باختفاء زوجته و إبلاغ الشرطة عن اختفائها، و قد قام المتهم بالاعتراف أمام المباحث بارتكابه للجريمة وذلك لشكّه في سلوك المجني عليها "كان علاء يصرخ في هذه اللحظة مقسماً بأغلظ الأيمان أن على عدم قتلها إلا أن توجيه كلماتٍ لة من القاضي بالسكوت أوقفه، فسكت وهو لا يزال ينتحب" وذلك لشكّه في سلوكها أولاً ثم الحصول على قيمة وثيقة التأمين المشتركة بينهما ولذا....)

كنت في هذه اللحظة أكتب عدة نقاط هامة من حديث وكيل النيابة لأظهر أمام العامة، وعلاء خاصة أن لدي ما أقوله و أحاول أن أبين له أنني أقوم بواجبي ليس إلا، على الرغم من أنني في هذا الوقت كنت لا أدري على أي أساس سأتكلم و استفتت على صوت القاضي :

– نادي على الشاهد الأول

الحاجب – فتحي محمد ابراهيم سليم

إذاً فقد وجهت النيابة تهمة القتل العمد مع سبق الإصرار والترصد وقامت أدلتها على أساس وجود شك مسبق من المتهم بزوجه ومن ناحية أخرى للحصول على مبلغ التأمين وكما توقعت كان فتحي سليم في شهادته ميالاً إلى إلصاق التهمة بعلاء هو الآخر فعند سؤال النيابة له أين كان علاء وقت وفاة زوجته أم رضوى قال فتحي أن علاء لم يكن بمنزله في هذا الوقت لأنه حاول الاتصال به في المنزل ولم يكن هناك، و حاول الاتصال بهاتف علاء المحمول إلا أنه كان مغلقاً هو الآخر مما دعا علاء إلى الصياح مجدداً

علاء – إنت كذاب إنت ما اتصلش بيا إنت كمان مكنتش موجود في المستشفى أنا رحت و سألت عليك إنت إيه مصلحتك في الكذب ده.

القاضي مقاطعاً – أسكت يا علاء، ليك دور هتكلم فيه.

ولكن استمر فتحي في كلامه ضد علاء فقال أنه كان دائم الخلاف مع زوجته و كانت كثيراً من الأوقات تشكو إلى والدتها سوء اختيارها للمرة الثانية و أنها تتمنى لو أنها لم تكن تزوجت علاء وختم كلامه بأنه كان متوقعاً تلك النهاية لرضوى لأن علاء كان دائم الشك فيها وختم شهادته بذلك على الرغم من هياج علاء للمرة الثانية.

القاضي – نادي على الشاهد الثاني

.....

-القاضي طيب وضحي النقطة دي من فضلك-

-أيوة فعلاً الأستاذ أحمد عنده حق، أنا كنت نسيت النقطة دي إنها فعلاً سمعت كلام خارج بين الطرفين في التليفون.

النيابة - أرجو ملاحظة إن المجنى عليها لم تتأكد من أركان الخيانة ذاتها هل تأكدت فعلاً يامدام سهى و الا الأمر متعداش مكالمة تليفون؟ هل تأكدت؟

- بصراحة لأ -

النيابة - طيب بغض النظر عن كلام التليفون هل كان هناك أي دليل ثاني ؟

- ما أنا قلت لحضرتك على أساس المبالغ اللي كان بيحولها لعشيقتة و ده كان عن طريق البنك اللي أنا شغالة فيه، وطبعاً أول ما عرفت كان لازم أبلغ رضوى وجبت لها أيام صرف المبالغ وقيم الشيكات و..

النيابة - يعنى العلاقة كانت مادية أهو، بس يا مدام سهى زي ما مدام نسمة قالت يعني المجني عليها مشافتش أي دليل على الخيانة دي غير مجرد كلام في التليفون ممكن علاء يكون قاله و مفيش أي دليل على الخيانة غير فلوس ممكن تكون عشان مجرد تعامل مادي، صح.؟

- أنا مش متأكدة بس متهيألي إنه صح .

- طيب إيمتى كان آخر خلاف بينهم هل تعرفي؟

- قبل الوفاة بأسبوع لدرجة إنها كانت بتفكر تسبب له البيت وتيجي تقعد معايا بس مقلتلش السبب غير مجرد خلاف مادي و إن خلاص مبقتش قادرة تعيش معاه، و إنها ندمت وخسرت حاجات كتير أوي

بجوازها من علاء وقالت لي الكلام ده في التليفون، ولما رحت ليها فضلت أهدي فيها لغاية أما ارتاحت وهديت لكن قالت إن الحياة بقت بينهم مستحيلة و إنها فعلاً بدأت تفكر في إجراءات الطلاق في أقرب فرصة.

- وجابتلك سيرة إلغاء التوكيل إيمتى؟

- الكلام ده كان من فترة يمكن قبل الوفاة بشهر وقالت إنها عايزة تلغي التوكيل، و على فكرة هي قالت لى الكلام ده كام مرة قبل كده لكن ترجع وتقول إنها كل مرة بتنسى، لكن بعد أما عرفت الخيانة قالت إنها لازم هتلغي التوكيل بدل ما يصرف على الست بفلوسها

- شكراً يا سيادة القاضي نكتفي بسؤال الشاهدة.

القاضي - نادي على الشاهد الثالث

- جينا ابراهيم يعقوب

كنت إلى هذه اللحظة أعلق آمالاً كبرى على جينا وأتمنى من الله أن تتحدث بكلام ليس في الموضوع أو حتى عن فوستاك ومغامراته حتى أستطيع أن أشكك في سلامة عقلها و لكني رأيتها في هذا اليوم أعقل مما كنت أتخيل فأجّلت ظنوني إلى يوم استجوابي لها وسأحاول ان اخرجها عن شعورها وربما وقتها أخرج كل ما تعلمه دون أن تشعر و استفقت على صوت وكيل النيابة:

- معلش ممكن توضحي النقطة دي يا مدام جينا تاني إزاي عرفتي أنه هو المتهم علاء؟

- يا أفندم هقول من الأول وحاول تركز المرة دي المهندس علاء مكنش موجود في اليوم ده لأن شغلة بيكون أسبوع الليل في المصنع لو عربيته مش كانت راكنة، وحوالي الساعة عشرة لقيت عربية ميكروباس لونها أزرق وقفت قدام البيت ونزل منها واحد لابس أفرول أزرق زى إلى علاء يلبسه في الشغل...

أحمد (اعترااااض) و هي الشاهدة منين يا سادة القاضي عرفت لون لبس علاء في الشغل؟

- جينا (تنظر للقاضي) إستنى، إستنى أنا اللي هجاوب، عشان يا أستاذ يا ناصح رضوى كانت بتنشره كل يوم سبت وكنت بشوفة دايماً على الحبال واستغربت مرة وسالتها وقاتلي عليه وبعدين أصل يوم السبت ده (وقبل أن تبدأ في إلقاء محاضرة قاطعتها النيابة)

النيابة - وبعد أما نزل من العربية إيه اللي حصل؟

- نزل راجل ملحقش أشوف وشه وطلع على سلم العمارة وبعد كده لقيته بيخبط على شقة رضوى...

أحمد - ازاي يا سيادة القاضي هيكون علاء و إزاي هيكبط على شقته طيب الراجل عايز ياخذها ويقتلها في سرية ومحدث يشوفه يقوم يطلع يخط على الباب ما يفتح الباب بمفتاحه و يخلص ولا إيه يا مدام جينا؟

النيابة - يا سيادة القاضي لو سمحت مش عايزين كل صغيرة وكبيرة نقاطع الشاهد المفروض إن ده دور النيابة في الإستجواب وبعدين لما



ييجى دور الدفاع يبقي يسال براحته احنا مش عايزين نضيع وقت ولا نتكلم في تفاصيل تافهة لون أفرول إيه ومفاتيح إيه!

القاضي - اعتراض مرفوض يا أستاذ أحمد بعدين إبقى ناقش شهودك براحتك كملي يا مدام.

- بعد حوالي ساعة إلا ربع لقيته نازل من الشقة معاه شنطة هدوم، و فتح باب العريية وحطها وبعدين ولع سيجارة وشربها، وكان واقف في جنينية البيت و بعد شوية لقيت رضوى نازلة و لف وفتح لها الباب عشان تركب، وقتها كانت عربية الدكتوراة ليلي اللي ساكنة في الفيلا اللي قدامنا بتركن ولمحته وقتها وتأكدت أنه علاء.

علاء - حرام عليك والله ! منك لله! منك لله!

القاضي - إنت هتسكت إنت كمان ولا مش هتحضر الجلسة اسكت خالص كملي يا مدام.

النيابة - طيب يا مدام إنت جارة رضوى، هل كان فيه أي مشاكل بينهم في الفترة الأخيرة ؟

- وحتى قبل الفترة الاخيرة أنا عارفة من رضوى إن كان فيه دايمًا مشاكل لدرجة إن علاء حاول يضربها أكثر من مرة.

- و إيه كان سبب المشاكل دي؟

- مش فاكهة بجد..

- شكراً يا مدام جينا، شكراً يا سيادة القاضي، مفيش أسئلة تانية.

القاضي - يا أستاذ أحمد ليك أي طلبات قبل التاجيل؟ ليك شهود غير دول تحب تعلنهم؟

- أيوة طبعاً يا أفندم طبعاً عايز مدام نسمة و اسمها وعنونها موجود في محضر النيابة وبطلب برضه شهادة المهندس رامي، زميل المتهم ورضا مسؤول الأمن في المصنع، و شهادة رئيس المباحث اللي عمل التحريات والطبيب الشرعي ونفس شهود النيابة ذاتهم.

القاضي : أي طلبات للنيابة؟

- شكراً يا ريس، أنا هطلب شهود ياسر بك رئيس المباحث وبرضه الطبيب الشرعي المختص بتشريح الجثة.

- وانت ما اعلنتهمش بالشهادة ليه من الاول ؟

- حصل يا ريس بس الاتنين مجوش

القاضي - تؤجل القضية إلى جلسة السبت القادم على أن تقوم النيابة باعلان الشهود المطلوبين من الدفاع و النيابة والمبينة أسمائهم في محضر الجلسة، رفعت الجلسة.

وهكذا انتهت أولى جلسات المحكمة وبعد انتهائها وقبل خروج علاء لحقت به في القفص لأحاول تهدئته وطمأنته و وقتها تذكرت أمراً سريعاً

- علاء قول لي بسرعة هي رضوى كانت عارفة إنت شايل فين مفتاح الخزنة ؟

- لا في الفترة الأخيرة لأ، لأن مكانه دايماً كان فوق الدولااب لكن كان فيه بنت جت تنصف الشقة والمفتاح كان وقع منها وهيا بتنصف

كان علي في اليوم التالي أن اذهب لزيارة علاء و الاستفسار منه عن بعض النقاط والتي لم تُتَح لي الفرصة أمس لأعرفها منه وفعلاً توجهت إليه في السجن و انتظرت طويلاً هذه المرة حتى أتى إليّ أخيراً و إن كنت أعتقد أنه قد فقد الكثير من وزنه منذ الأمس.

أحمد - يعني إزاي معندكش أي دليل يثبت علاقتك بنسمة.

- إزاي بس إنت كمان! إنت عايز يا أحمد واحد يصورنا مثلاً؟ ولا إزاي اثبتلك العلاقة يعني، أنا آه خرجت معاها وسافرنا أوقات مع بعض زمان بس مفيش إثبات لأي حاجة زي دي، يعني حتى الوقت إلى بدات اكون محتاج إني أثبت العلاقة دي مش عارف أثبتها إلا عن طريق شهادتها هي!

- طبعاً والنيابة ما هتصدق إن نسمة تنكر العلاقة دي وبصراحة لو معرفناش نثبت العلاقة دي هيبقي الموقف أسوأ من الأول طيب قولي معندكش أي صور للشيكات اللي كنت بتكتبها لنسمة؟

- لأ معتقدش، بس يمكن تكون صور الشيكات دي موجودة في البنك بتاع سهى.

- و اشمعنى بنك سهى يعني؟

- لأن رصيدى ورصيد رضوى فيه، وكل تعاملاتنا هناك وطبعاً كل معاملاتني في البنك رضوى كانت بتاخذ بيها خبر من سهى.

- طيب إيه موضوع خلافاتك الأخيرة مع رضوى اللي وصلت إنها كانت عايزة تتطلق؟

- لأ مش طلاق، بس خلافتنا بسبب إنها عرفت طبيعة علاقتي مع نسمة و عرفت عن طريق إنها كانت بتسمع مكالماتي ولما واجهتني قلت لها، زي ما سمحتي لنفسك تكلمي طليقك أنا كمان سمحت لنفسي إني أكلم واحدة كان ليا علاقة بيها قبل الجواز، و اتخانقنا بسبب النقطة دي أكثر من مرّة في الفترة الأخيرة لدرجة إني مرة اتهورت وكنت خلاص فعلاً هضربها من كتر خناقها بس صالحتها و وعدتها إني مش هعرف أي حد تاني عليها، لكن صدقني إن عمرها ما طلبت الطلاق، وخاصة لما حلفت ليها إني مش ممكن أخونها أو أعمل أي شيء يضرها.

- طيب وموضوع إلغاء التوكيل؟

- أنا قلت لك يا أحمد إن الكلمة دي قالتها لما كانت بتقول إنها حسّت إنها بتتعبني من مشاويرها لكن بجد عمرها ما شكت فيا إني ممكن أمد إيدي على فلوسها، فهي لو كانت عايزة تلغي التوكيل كانت لغته من زمان ملغوش ليه ؟ و غير كده و كده متشوفوا رصيدها كان إيه في أول جوازنا ودلوقت بقي إيه وهتعرفوا إن عمري ما مديت إيدي على فلوسها ولو كان فيه دليل ضدي مع أي حد ما يطلعه !

- كويس! إنت نبهتي على موضوع رصيدها ده و ده إلى هقوله لسهي إنت بس خد بالك من نفسك، و أشوفك في الجلسة الجاية إن شاء الله.

خرجت من السجن سريعاً لألحق بالبنك و أحاول أن أعرف من سهى هل هناك أي صور للشيكات الصادرة باسم نسمة من علاء ؟ فربما ساعدتني سهى على إثبات علاقة علاء بنسمة رغماً عنها، و لكن للأسف لرحمة السير المعتادة وصلت بعد إغلاق البنك و للأسف أيضاً فغداً الجمعة و السبت ستكون الجلسة وعليّ أن أنتظر و أن أطلب الإذن من



النيابة بإطلاع المحكمة على أيّ صورٍ للشيكات الموجودة لدى البنك
الصادرة من علاء بما أنه لم تُتَحَ لِي الطرق الوديّة.

- د. يحيى كمال عبد الرؤوف، أربعة وخمسين سنة، طبيب شرعي
بمصلحة الطب الشرعي.

النيابة - د. يحيى بالنسبة لحالة المجني عليها رضوى تقدر تقول لنا إيه
الوضع التشريحي لما وصلت ليك الجثة؟

- بالكشف على الجثة مبدئياً وجدت إن الوفاة حصلت يوم السبت
ليلاً وبالتحديد في الوقت ما بين التاسعة مساءً ومنتصف الليل.

- طيب ده بالنسبة للوقت، إيه طبيعة الطعنات اللي تسببت في
الوفاة؟

- كان هناك طعنتين قاتلتين واحدة كانت في القلب مباشرة والطعنة
الثانية كانت في الرئة اليسرى وتبعد عن القلب تقريباً بسنتيمتر ونصف و
أصابت الرئة بتهتك شديد وبعد كده حصلت ثلاثة طعنات واحدة منهم
كانت في الكبد والباقي كان في منطقة المعدة.

- طيب إنت أثرت في تقريرك نقطتين مهمين جداً أحب أوضحهم
لهيئة المحكمة و إن النقطتين دول تحديداً أعتقد إن دفاع المتهم هيبني
عليهم جزء كبير من الدفاع، أولهم ما يلي (و يقرأ من تقرير الطبيب
الشرعي) ذكرت في تقريرك أنه (ربما) و أوضح لهيئة المحكمة كلمة ربما
الوارد ذكرها في التقرير المقدم من الطبيب الشرعي بعد فحص الجثة
وتحديداً في الصفحة رقم أربعة عشر بتقول فيها (و إنه ربما تكون هناك

أداة أو أداتين للجريمة فالأولى أصابت القلب والرئة اليسرى بطعنة قاتلة بطول نصل بلغ الأحد عشر سنتيمتراً و بعرض اثنين سنتيمتر ثم تلتها طعنات أخرى غير قاتلة في المعدة والكبد بنفس العرض السابق ولكن بطول نصل بلغ الثلاثة عشر سنتيمتراً) ويا ريس ده كان السكين المحرز في القضية و اللي كان عليه برضه بصمات أثبت الطب الشرعي تطابقها مع بصمات المتهم، طيب يا د. يحيى ليه بنيت كلامك على إنه ربما يكون هناك أداتين للجريمة؟

- أنا ذكرت في التقرير إن الطعنات الأولى أدت إلى الوفاة فوراً وكان الجرح بعمق أحد عشر سنتيمتر وبالعرض السابق اثنين سنتيمتر زي ما اتفضلت و قريت والطعنات الثانية غير قاتلة وكانت بعمق ثلاثة عشر سنتيمتر وبعرض اثنين سنتيمتر يعني كان نفس العرض وعشان اختلاف العمق بين الجرحين في الطعنات القاتلة والغير قاتلة قلت إنه ربما يكون هناك أداتين للجريمة.

- طيب ليه بنيت الاختلاف ده على عمق الجرحين مع إن العرض واحد في الحالتين، يعني مش لو كان هناك أداتين ممكن إن العرض طبعاً يختلف في كل منهم؟

- لأ ده مالوش علاقة، لأن في أغلب حالات القتل بتكون أدوات القتل زي السكين أو المطواة أو حتى الخنجر أو أي سلاح تاني، يعني هناك أسلحة كتير بتكون متشابهة في العرض مع اختلافهم في الطول، يعني اللي أقصد أقوله إن ممكن يكونوا سلاحين مختلفين في الطول، لكن العرض واحد.

- ويمكن برضه يكون سلاح واحد؟

- يمكن.
- طيب سؤال ثاني يا د. يحيى هل من الممكن إن يكون نفس السلاح بس اختلفت قوة الضربة من مكان للثاني ؟
- م م م أعتقد كده
- إزاي؟ ممكن توضح لنا أكثر؟ يعني مثلاً يكون المتهم ضرب المجني عليها بقوة في الضربات الأخيرة عن الضربات الأخرى الأولى ؟ أو يمكن عايز يتأكد من موتها؟
- ساعات آه وساعات لأ.
- - إزاي ممكن توضح ؟
- يعني اللي إنت بتقوله ده يجوز إنه يحصل في بعض الحالات النادرة، وغالباً ما بيكون الجاني أعسر و ده مش موجود في حالتنا دي وفي الحالات النادرة دي بيكون الجاني مغرزش سلاحه بقوة يعني مطعنش بعمق أكبر في الجروح الأولى لكن بعد كده بتكون الضربات التالية أعنف و أشد.
- طيب يعني يجوز هناك احتمال إن ممكن تكون حالتنا دي من الحالات النادرة اللي ممكن يحصل فيها الكلام اللي ناقشناه ده؟
- يجوز.
- طيب جميل ده بالنسبة للنقطة الاولى أما بالنسبة للنقطة الثانية يا حضرات المستشارين و اللي برضه أعتقد إن الدفاع هيتكلم فيها، كلمة ثانية واردة في التقرير في الصفحة أربعة عشر في الأول بيقول فيها التقرير

(و تلتها طعنات أخرى غير قاتلة لاحقة على الوفاة) فسر لنا يا د. يحيى
يعني إيه المقصود بالجملة دي ؟ وبنيت كلامك على أساس إيه؟

- أنا بنيت الكلام ده على أساس إن كمية الدماء المنزوفة بعد
الضربات دي كانت قليلة بالدرجة اللي بيكون فيها الضربات دي حصلت
بعد الوفاة بفترة من عشر إلى خمس عشر دقيقة لأن واضح من كمية الدم
الموجودة حول الجروح دي إنها أقل من المعتاد و ده مبيحصلش إلا لما
بيكون حصلت بعد الوفاة بفترة، ولما شرحت الجثة اتأكدت من الكلام ده
من مقدار الدم في الحاليتين، يعني مقدار الدم النازف من الضربات الأولى
القاتلة عن الكمية الدم في الطعنات التالية.

- طيب تقدر تحدد لنا بدقة الوقت اللي ممكن يكون حصل فيه
الطعنات دي؟

- زي ما قلت لك ما بتقلش عن عشر دقائق، و طبعاً بتختلف كمية
الدم حسب المكان اللي إتوجهت ليه الضربة.

- طيب هل من الممكن إن بعد أما قام الجاني بجريمته إنه يكون
شعر بعدم مفارقتها للحياة فقام و أجهز عليها بالضربات الثلاثة اللي بعد
كده؟

- لا مظنش لأن الطعنتين الأوائل كانوا سبب الوفاة مباشرةً والوفاة
حصلت بعد الطعنتين دول بدقيقة على الأكثر و أكيد في الحالة دي
المتهم إتأكد من حدوث الوفاة لأنها ظاهرة للعيان ومش هيقعد حوالى
عشر دقائق يتأكد وبعدين يقوم يضربها ثلاث طعنات تاني.



- طيب لو كان في حالة ريبة وشك ممكن إنه يعوز إنه يتضمن أكثر وأكثر و يضربها على الرغم من إنه إتاكد من موتها؟

أحمد - أعترض يا سيادة القاضي النيابة بتحاول تدخل في نقاش غيبي مع الطبيب و اللي سبق و نفاه، فليه السؤال بيتكرر من النيابة، إحنا بنتكلم عن تشريح الجثة، و الطعنات، و قوتها، و وقتها، يبقى مش مكانه تحليل نفسية المتهم، و كان المفروض يعمل إيه أو ميعملش إيه!!!

القاضي - إعتراض مقبول، حدد أسئلتك ومتكررهاش يا أستاذ عوني.

النيابة - أسحب السؤال يا سيادة القاضي و أكتفي بسؤال الطبيب.

القاضي - نادي على الشاهد الثاني.

- ياسر عبد الغفار سليم

النيابة - محضرش يا أفندم فيه قرار إنه طلع مامورية من يومين وبلغنا بيها و آدي قرار التكليف لمدة أسبوع.

القاضي - عيد إستدعائه يا أستاذ عوني، نادي على الشاهد اللي بعده يا بنى

- نسمة حسين محمد حسن

عندما دخلت نسمة للإدلاء بشهادتها لم أتوقع أنها بتلك الهيئة أو المنظر العام، لم تكن تماماً كما توقعت، كانت فتاةً عادية الملامح، ليست على قدر كبير من الجمال، و كذلك كانت ملابسها، فكانت محتشمةً وغير مبهرجة المساحيق، كانت ترتدي حجاباً طبيعياً أيضاً وليس حجاب سبور كما أرى هذه الأيام، كنت مندهشاً من إصرار علاء على خيانة زوجته مع نسمة، دون أن أرى أي دليل على ذلك، فمن وجهة نظري أن تلك

الفتاة أبعد كل البعد حتى عن خيانة زوجها، و عندما مرّت إلى جوارى سمعتها تنظر إليّ هامسةً (حسبي الله ونعم الوكيل).

- نسمة حسين محمد حسن، تسع وعشرين سنة، مسؤولة تسويق بشركة الفجر للكمبيوتر.

- إيه علاقتك بالمتهم يا مدام نسمة؟

- (ثائرة) علاقة إيه! حسبي الله ونعم الوكيل منّ الله خرب بيتي هو والمحامي بتاعه! و أنا مش هسكت! والله العظيم ما حصل أي حاجة بيني وبينه و لا في أي علاقة مشبوهة بيني وبينه، أنا أساساً برفض إن إسمي يتذكر في القضية دي أنا جيت للشهادة غصب عني أصلاً كفاية إن المحامي بتاعه كلمني كام مرّة ومرّة من المرات جوزي سمع المكالمة و طلقني، على الرغم من إني حلفت له إن محصلش بيني وبين المتهم ده أي شيء، و إن شاء الله لما تخلص القضية دي و يتعدم هبقى أرفع تعويض رد شرف.

- يا مدام نسمة إحنا لا سمح الله ما بنتهمكيش بأي شيء أو بنقول أي شيء يسيء لسمعتك، ده مجرد كلام و إحنا مقدّرين موقفك وحالتك النفسية، بس ممكن تفسري لينا المتهم إيه اللي خلاه يقول كده عليكى إنت شخصياً؟ مهو أكيد فيه سابق معرفة!

- المتهم ده أعرفه من أكثر من سنة كزبون وشخص عادي، و سبب معرفتي بيه إنه كان عايز يشتري أربع كمبيوترات محمولة له، و اتصل بيا أكثر من مرة لما قابلته في معرض الكمبيوتر في القاهرة و أخذ أرقام الشركة و إتصل بيا وكان عايز لاب توبات زي ما قلت، و وصل للشركة وتعاقد زي أي زبون عادي و أخذ الكمبيوترات، و نظام الشركة عندنا أنه

يقيسط لكن بيكتب إسم المندوب اللي أخذ العرض منه عشان هو اللي يقوم بتحصيل الفلوس ويديها للشركة مقابل البونس و فعلاً كان بيكتب الشيكات باسمي لكن بعد فترة من مقابلي له في الشركة اتضح إن له أغراض مش كويسة، بس أنا عرفت أوقفه عند حده، ده إنسان مش طبيعي بالمرّة، و حاولت بعد كده إني أقطع علاقتي بيه و أخليه يكتب بقية الأقساط بإسم الشركة، ما نفعش، و بقت علاقتنا إني مجرد أستلم الشيكات اللي يبيعتها عن طريق محصل و انقطعت العلاقة فعلياً مع اخر قسط وده كان من أربع شهور، وساعتها حمدت ربنا إن خلاص ارتحت منه، و اتفضل آدى كل الأوراق اللي تثبت كلامي، آدى تعاقدته مع الشركة و آدى صور الأربع شيكات بتوعه اللي أصدرهم بإسمي و إتفضل آدى صور كل المستندات (و تُقدّم عدة ورقاتٍ للقاضي الذي أخذها وبدأ في الاطلاع عليها)

القاضي - و إنتِ ما قدمتيش الورق ده ليه في تحقيق النيابة يا مدام نسمة؟

- لأنني مكنتش معتقدة إن الأمور هتوصل بيا للدرجة دي، إني أوصل للمحكمة، و إن حياتي تتدمر بالشكل ده، حتى في الشركة اللي كنت فيها جالي أكثر من استدعاء للنيابة، الناس هتقول إيه بس بعد كل اللي حصل لي ده منه! منه لله! حسبي الله ونعم الوكيل!

- إيمتي آخر مرة شفتي المتهم، لما إداكي الشيك الأخير مثلاً؟

- آخر شيك ده كان من أربع شهور وكان بيعت الشيكات عن طريق محصل للشركة بعد أما عرف إني مش ممكن أعمل علاقة معاه، لكن في

الشيء الأخير اتفاجأت إنه جه بنفسه الشركة، عشان يسلمني الشيء و لما رفضت أقابله ساب الشيء هناك وتقدرؤا تسألؤا.

- يعني دي آخر مرة شفتيه؟

- لأ أنا شفته يوم السبت اللي كان موافق للوفاة شفته بالصدفة في طنطا.

- كان حوالي الساعة كام و فين و ياربت تفتكري تحديدأ؟

- لأ مش فاكرة، أنا عرفت اليوم إنه حصلت فيه الوفاة أما الساعة كام مش هقدر، وشفته كان نازل من تاكسي قدام المستشفى وساعتها كنت في مشوار في المستشفى نفسها، و قابلني لما شافني و قعد يتحايل عليا إني لازم أقعد معاه شوية عشان بيمر بظروف صعبة، لكني إعتذرت له وقلت له إن ورايا ميعاد مهم.

- طيب أمال المتهم استند بإيه إنه اتصل بيكي وطلب إنه يجيلك الشقة وحدد إنه اتصل بيكي من هاتف في طنطا؟

- محصلش إنه كلمني قلت لك، و ده مينفعش، قلت إنه كان بيحاول يتصل بيا كتير و أنا في الشغل و اتصالاته كانت من القاهرة، وكنت للأسف برد عليه عشان كنت مستنية القسط الأخير، لأنه بدأ يماطل عشان فاكِر إني ممكن أستجيب له و كل مكالمة كانت بيتأ يفضل يقول إنه مش مرتاح مع مراته، و إن حياته وحشة.

- يعني ما كانش في علاقة إلا كده؟

- أهو قدامك إسأله.

وعندما التفتُ ناحية علاء في تلك اللحظة وجدته واجماً لا ينطق و
حتى لم يعترض أو يصرخ متهماً إياها بالكذب، و حاولت أن أشير إليه أن
يتحرك لكنه بدأ وكأنه غائب عن الوعي.

النيابة - شكراً يا سيادة القاضي نكتفي بسؤال الشاهدة.

القاضي - يا أستاذ أحمد ليك طلبات قبل التاجيل؟

- مفيش يا أفندم كت مقدم طلب بالاطلاع على صور الشيكات لكن
بعد أما مدام نسمة قدمتهم مشكورة يبقى مالوش لزمة بس أرجو صدور
الإذن بالاطلاع على رصيد المجني عليها و أرجو بس إعادة إعلام الشهود
اللي طلبتهم.

النيابة - يا سيادة القاضي أنا شايف إن مالوش أي لزمة الطلبات دي،
ده مجرد تضييع للوقت، هنستفيد بآيه من الاطلاع على رصيد المجني
عليها؟

أحمد - يا أفندم أنا بنى دفاعي على الأوراق دي وبرضه هحتاج إعادة
إعلانها من الشهود اللي هناقشهم طبعاً.

القاضي - خلاص، خلاص، هنعيد إعلانها تاني مع بقية الشهود يا
أستاذ عوني، بص يا أستاذ أحمد دي كل طلباتك؟ الجلسة الجاية مناقشة
شهودك وبعدين المرافعة الختامية ومش هسمح لحد بطلب تاني خلاص؟
تؤجل القضية لجلسة السبت المقبل لسماع شهود النفي.

توجهت سريعاً إلى علاء لأفهم منه سرّ سكوته هذه المرة.

علاء - أنا مش عارف نسمة جابت كل الكلام ده منين!

- منين إيه بس الله يخرب بيتك! إنت مخبي عليا حاجة؟

- حرام عليك يا أحمد! أنا فعلاً أخذت كمبيوترات من شركتها، لكن فيه علاقة بينا أقسم لك بجد، كان فيه و هفكر في أي دليل يثبتك الكلام ده.

و كالعادة انقطع الحوار بعد جذبه بعيداً من شرطة المحكمة.

لم يحدث خلال الأيام التالية أي جديد، فحتى عند ذهابي إلى البنك لاستخراج صور الشيكات لم آت بأي جديد، فهناك أربعة شيكات كل شيك منهم بقيمة خمس آلاف جنيه، و تم صرف آخر شيك من حوالي أربعة أشهر، و هذا يؤكد حرفياً مما قالته نسمة في المحكمة، و قرّرت بعد ذلك أن أتوجه إلى مصلحة الطبّ الشرعي في ميدان رمسيس لمقابلة د. يحيى ومناقشته في بعض الأمور التي لم أفهمها، و التي تعمدت النيابة أن تففز إلى استنتاجاتها دون التريث في التحقيق، فكان عليّ أن أتحدث معه عن تلك النقاط لمعرفة كيفية بناء دفاعي. و كما توقعت كان د. يحيى متشككاً في أول مقابلي له، وكان معترضاً من البداية على مقابلي، و أكّد لي أن مجرد ظهوره معي سيثير حوله الشبهات، إلا أنني أوضحت له بأني أتيت فقط لأستفسر منه عن عدة نقاطٍ في تقريره و بعد نصف ساعةٍ من الإلحاح الشديد وافق على مضمض.

- عموماً أنا قدامي ربع ساعة بس قبل ما أروح أشوف شغلي، إتفضل عايز تفهم إيه؟

- حضرتك ذكرت في تقريرك إنه جازي يكون فيه سلاحين واحد احداشر سنتيمتر والثاني ثلاثاشر سنتيمتر، و الأول هو اللي استخدم في الضربتين القاتلتين و اللي كانوا في القلب والرئة، سليم ؟

- سليم، آيوة مضبوط.
- وبعد كده حصل ضربات تانية من سلاح طوله حوالي ثلاثاشر سم،
و حضرتك بترجّح إنها بعد الوفاة بفترة، سليم ؟
- (على مضض) و بعدين! آيوة أنا قلت كده.
- طيب من وجهة نظرك إنت و إنت طبعا عالم كبير (وكان من
الضروري أن أبدأ في مدحه لأنه بدأ في التملل) شايف إن الجريمة
ارتكبت بسلاحين مش بواحد؟
- أفضل إنني اجاوبك في المحكمة لأنني سبق والنيابة سألتني عن
النقطة دي.
- يا د.يحيى أنا على أساس كلامك ده هأسس دفاعي أنا بس عايز
رأيك الطبي، حضرتك شفت مئات القضايا و شرّحت مئات الجثث، و
عندك خبرة ما شاء الله، أنا عايز بس أعرف رأيك العلمي ،ده اللي أنا
محتاجه.
- رأيي..م م م م. إنه لازم يكون استخدم سلاحين.
- الله ينور عليك يا د.يحيى، على أساس إيه بنيت رأيك ده؟
- لأن لو كان الجاني استخدم سلاح واحد هيبقي صعب انك تقتل
من أول مرة إلا بعد أن تستخدم عمق النصل كله.
- بالراحة عليا و النبي يا د.يحيى مش فاهم.
- بص يا ابني، إفرض إن القلم اللي أنا ماسكه ده كان السكين اللي
عايز أقتلك بيها (و أخذ قلماً كان على مكتبه وأمسكه كأنه يمسك سكيناً)

أولاً لازم عشان أقتلك من أول مرة، لازم أستخدم السلاح زي ما هو موجه بالظبط، ثانياً لما آجي أوجه ليك الضربة لازم هستخدم كل قوتي، يعني القلم ده أو السلاح كله لازم ينغرس في المكان اللي هقتلك منه، و وقتها مش هسيب اتنين سم لبرا، ده بفرض إن السلاح اللي استخدم كان ثلاثشر سنتيمتر، ليه هقتل بقوة أقل أو أضربك بقوة أقل ويوصل النصل في قلبك احداشر سنتيمتر بس ويتفضل اتنين برا؟ مؤكد إن في كل جرايم القتل اللي شفتها بتكون غالباً أول ضربة هيا أقوى ضربة أو الثانية لأن الجاني جهده بيسنفذ بعد كده لأن كل القوة و الدفع بيملكهم في أول ضربة فهمت؟ مالك فاتح بقك كده ليه ؟ مفهمتش تحب اقولك تاني؟

- لا لا فهمت، يعني لو هأقتل مثلاً مش هدخل جزء من السكين، لا دانا هدخل السكين، و لازم أزق السكين بكل قوتي وعزمي و لو أطول وقتها أدخل المقبض كمان هدخله، طيب إنت ليه ما حاولتش تشرح وجهة نظرك دي في المحكمة؟

- وهو أنا لحقت! النيابة مكنتش مدياني أي فرصة.

- وبكدة يكون القاتل ارتكب الجريمة بسلاح طوله احداشر سنتيمتر وبعدين جاب السكين بتاعة علاء و اللي عليها طبعاً بصماته و ضربها بيها، وده عشان يلزق التهمة بعلاء، لكن مخدش باله إن الاتنين مش طول واحد.

- أنا ماليش دعوة بالكلام ده، بس لو زي ما بتقول، طب ماكان من الأول ضربها بالسكين اللي عليها بصمات علاء..؟

- فعلاً يا د.يحيى دي نقطة محيرة جداً (لا ادري لماذا في هذا الوقت بالذات تذكرت حبوب الإيزورييد التي وُجدت مطحونة داخل

السيارة، مسرح الجريمة) قولي طيب يا د. يحيى، مش حبوب الايزوربيد بتستخدم كعلاج لحالات النهجان الشديد لمرضى القلب؟ طيب هل تشريحك لرضوى لقيت في أي أثر للحبوب دي؟

- إيزوربيد !!!! آه أيوة ده فعلاً دوا للقلب بيوسع الشرايين ويفضل أثره في الدم لمدة ثمانية و أربعين ساعة، و لما حللت دم المجني عليها مكش فيه أي أثر لأي أدوية، و حتى المتهم لما حللت عينة من دمه وشعره لمطابقتها بالعينة المنزوعة من أظافر المجني عليها مكش في أي اثر لأي...

- (قمت مفزوعاً من مقعدي في هذه اللحظة وكأنه لدغني عقرب) عينة؟ أي عينة ؟ لقيتوها فين دي؟

- مالك! أقعد، أيوة عينة الشعر اللي لقيناها في ضوافر المجنى عليها!!!

- إزاي الكلام ده؟ محدش ليه جاب سيرة العينة دي؟ لا موجودة في محاضر الشرطة، ولا تقارير النيابة، ولا حتى في تقارير الطب الشرعي؟ ممكن أفهم إزاي الكلام ده؟

- أنا معنديش أي فكرة عن اللي إنت بتقوله ده، لكن اللي حصل إن لما جيت أشرح الجثة، أرسلت لرئيس المباحث نتيجة تحاليل دمها وعينة من شعر منزوعة من ضوافرها، و لقيت رئيس المباحث بيطلب مني تقرير فرعي عن مطابقة عينة الشعر المنزوعة دي بعينة من شعر المتهم وقد كان، و أرسلت فعلاً نتيجة التحليل في خلال أربعة وعشرين ساعة.

- و كانت النتيجة إيه؟

- النتيجة كانت سلبية، وكنت أعتقد إن التقرير ده هيبقى مضاف للتقارير الطبية اللي أرسلتها، و اللي كان فيهم نتيجة التشريح النهائي.

- طيب ما عندكش أيّ صور من نتيجة التقرير الفرعي ده؟

- أنا لحسن حظك بحتفظ بصورة من كل التقارير اللي برسلها للنيابة أو المباحث، ثواني أشوفهولك.

و قام الطبيب إلى دولابٍ خشبيّ فتح أدراجَه وظلّ يبحث ضمن أوراقه، كنت أجز أذبال الخيبة قبل لقائي مع الطبيب، و دون أن يشعر فقد أعطاني دليلاً قد يبرئ علاء تماماً من المشنقة، إذ أن اختلاف عينة شعر علاء عن الشعر المنزوع من أظافر المجني عليها يوحي باختلاف شخصية القاتل تماماً، فلا يكون علاء من تشاجر معها في ذلك الوقت، هذا بالإضافة إلى تعمّد ياسر إخفاء هذا التقرير من ملفات القضية، كان بداخلي الكثير من التساؤلات التي جعلت الظنون تعود بي مرة أخرى إلى..

يحيى مقاطعاً - أهه لقيته، اتفضل آدي صورة من التقرير اللي أرسلته للمباحث.

قرأت الورقة الوحيدة في عجالة، وكانت موقعةً من الطبيب الشرعي وبجوارها ختم المصلحة، وما بداخلها يفيد بعدم تطابق العينات، وكانت الورقة موجهةً إلى رئيس المباحث ياسر، بالطبع لم أشعر بنفسي إلا و أنا أحتضن د. يحيى مقبلاً و شكرته بحرارة و خرجت سريعاً من المصلحة لأستنشق هواءً نقيّاً لأول مرّة منذ عدة أسابيع.

و بالطبع عند عودتي إلى المنزل لم تهدأ الهواجس مرةً أخرى و لم أفلح في طردها، فهذا الدليل الدامغ ينفي التهمة تماماً عن علاء، و طبعاً

عندما علم ياسر بهذا الدليل، كان لابد له من أن يخفيه بأي صورة كانت، لأن من مصلحته هو إصاق التهمة بعلاء، و بالطبع عليه أن يخفيه لأن هذا التقرير كان تقريراً ثانوياً لم يُرفق بالتقرير النهائي، فلذلك تعمد عدم إرفاقه بالتقرير النهائي، وهذا يُعتبر جريمة في نظر القانون و هي إخفاء أدلة، و خاصةً عندما يكون من يخفيها هو الشخص المسؤول عن التحري والذي قاد عملية التحري منذ بداية القضية، وبالتالي يشير إلى التحيز الواضح في التحري، و تعمد إصاق الإتهام بعلاء وهذه نقطة.

أما النقطة الثانية التي خرجت بها تُشير إلى عدم إمكانية أن يكون ياسر نفسه هو من ارتكب الجريمة لأنه لو ارتكبها لكان عليه الا يطلب فحص العينة من الأساس، فمن يكون يا ترى هذا القاتل؟

القاضي - نادي على الشاهد الأول

- فتحي سليم

كعاداته أتى مزهواً بنفسه إلى أبعد الحدود، وكان صابغاً لشعرة بصبغةٍ بنيّة لا تتناسب تماماً مع سنه، و لا أدري لماذا كان شاربه أسود اللون، هل كانت موضةً ام لم تكفِ الصبغة.

أحمد - أستاذ فتحي حضرتك زوج والدّة رضوى، تقدر تقولي ليه العلاقة اللي بينكم كانت متوترة في الفترة الأخيرة ؟

- مع إني جاوبت على السؤال ده أكثر من مرة إلا إني هقولك، رضوى كانت في الأصل إنسانة عصبية جداً، و زادت عصبيةً بعد الطلاق لدرجة إنها كانت دائماً تتخانق مع والدتها الله يرحمها، حتى في الوقت



النيابة - اعتراض يا سيادة القاضي الدفاع يحاول يشتت إنتباه الشاهد والمحكمة بحاجات مش في صلب القضية نهائياً، كان بتكلم عن العقد وبعدين خرج عن الموضوع اللي جرّنا فيه، فلو كان العقد موجود يطلّعه، إحنا يا ريس بندور في حلقة مفرغة، إحنا كده بنخرج عن جوهر القضية.

أحمد - أي جوهر قضية ؟ و هو أنا بتكلم عن قضية الجيران؟ إحنا بنتناقش في صلب الموضوع.

القاضي - انتبه لألفاظك يا أستاذ أحمد اعتراض مقبول وليس على الشاهد الإجابة.

.....

أحمد - يا سيادة القاضي إذا كان فتحي سليم قال إنه إتصل بعلاء في البيت لما كان بايت عنده و مالمقهوش، و لما علاء راح المستشفى مالمقهوش

فتحي سليم - وده علاقته إيه باللي أنا فيه دلوقت؟ أنا سبق وقلت لك، أنا مش هقعد في المستشفى أنا ورايا أشغال وكان لازم أباشر شغلي، هو أنا كان لازم أكون هناك أربعة وعشرين ساعة؟

القاضي - يا أستاذ أحمد أنا مش فاهم إنت بتقول إيه أو عايز إيه من الشاهد عندك أسئلة تانية؟

- أيوة، بالنسبة لشهادتك بخصوص العقد قلت دلوقت إنك متعرفش عقد إيه أو حتى ارض إيه.

- أنا مقلتش أرض إيه، و هو إنت مديني فرصة عشان اتكلم!! أنا عارف إن قطعة الأرض ... إنما إنت بتسأل على عقد أم رضوى عملته لرضوى، أنا معنديش علم بكلامك ده عشان كده أنا استغربت .

القاضي - عقد إيه يا بني ماله ده ومال القضية أو موقف موكلك؟

- يا سيادة القاضي العقد ده اتكتب قبل وفاة أم رضوى بحتة الارض دي اللي في المعمورة و اتبنى مشروع سياحي هناك.. الأرض بقت بملايين وعشان العقد مكش اتسجل فكان لازم يختفي العقد ده نهائياً و حتى رضوى نفسها، و عشان رضوى رفضت أي مساومات، يبقى نعمل إيه لازم العقد يختفي لأن من وجهة نظر بقية الناس إن العقد متسجلش وبالتالي عند عدم ظهوره تروح قطعة الأرض بالميراث ب وفاة الأم لفتحي سليم أما لو حصل وظهر العقد الابتدائي يبقى الأرض هتروح لرضوى، أما لو اتوفت رضوى ومعها العقد اللي من وجهة نظرك مش مسجل يبقى الأرض هتروح فين؟ أكيد ليك.

القاضي - أستاذ أحمد إنت كلامك خطير جداً، إيه دليلك على الكلام ده؟

- دليلي إني بطلب شهادة ياسر بك رئيس المباحث اللي قام بالتحريات كلها، وعنده علم بموضوع العقد ذاته، و يبقى ابن أخ الشاهد، وبعدين أنا عايز أعرف ليه رئيس المباحث مجاش لتاني مرة رغم إعلامه ؟

النيابة - يا سيادة القاضي النيابة عايزة تعرف سر اصرار الدفاع على موضوع العقد لو كان العقد ده فعلياً موجود ليه المتهم مظهروش باعتباره دليل قد يودي إلى نفي التهمة عنه ؟ و ليه الإصرار من الدفاع على ضرورة



إعلام رئيس المباحث اللي قام بالتحريات وتحويلة من شاهد اثبات لشاهد
نفي، إزاي ده بس ؟

القاضي - إنت ليه مصرّ يا أستاذ أحمد على ياسر بك؟

- أصلاً إزاي يقوم بالتحريات وفيه صلة قرابة وعداوة بينه وبين
موكلي، من الأصل، زائد إن ياسر على علم بموضوع العقد.

النيابة - أعترض يا سيادة القاضي، شهادة الضابط في موضوع العقد
ليس له أي دخل بالقضية، و ليس محل القضية المنظورة.

القاضي - اعتراض مقبول أستاذ أحمد شهادته هتكون في اجراؤه
للتحريات فقط أما بخصوص موضوع العقد لو عندك دليل على كلامك
قوله لو مفيش يبقى تسكت أحسن، عندك أسئلة تانية توجهها للشاهد؟
- لا يا سيادة القاضي مفيش.

القاضي - على الشاهد الانصراف نادي على اللي بعده.

- سهى عمران

أحمد - ازيك يا مدام سهى

- الحمد لله يا أستاذ أحمد

- أستاذة سهى لو سمحتي أنا هستعير بعض من كلامك اللي قلتيه
قدام المحكمة وهنتكلم فيه شوية، إنت قلتي إن رضوى من زمان قبل
زواجها الأولانى كانت بتحب علاء وبعد طلاقها وزواجها من علاء بدأت
المشاكل و كترت في الفترة الأخيرة إيه كانت أسباب المشاكل دي؟

- اسباب كثير مرة تقول إنه كان بخيل عليها، ومرة تقول إنه بدأت ليه علاقات و بدأ يخونها، وكام شكل كثير من النوعية دي.
- و إنتِ على علم بكل المشاكل اللي كانت بينهم؟
- طبعاً بما إني صاحبته الوحيدة من أيام زمان، و رضوى الله يرحمها كانت دائماً بترجع لي في كل مشكلة مع علاء، حتى آخر مرة كانت هتطلب الطلاق وتيجي تقعد عندي.
- طب وده كان رأيها و الا رأيك إنتي ؟
- رأيي أنا، على الرغم من إني رجعت فيه، رضوى الله يرحمها كانت طيبة أوي وسهل أنه ينضحك عليها، و ما كانتش تقدر تاخذ قرار مصيري زي ده، و لما سألتني تعمل إيه كرد على خيانتة ليها، قلت لها لازم تطلبي الطلاق وتيجي تقعدني عندي لغاية أما يتربى، و قلت ليها كمان تلغي التوكيل بما أنه بقى مالوش أمان بالمنظر ده.
- يعني أفهم من كده إن ده كان رأيك إنتِ ما كانش رايتها؟
- النيابة - إعتراض يا سيادة القاضي، الدفاع كالعادة بياخذ الشاهدة بعيد عن جوهر القضية و إحنا مالنا كان رأي مين فيهم.
- القاضي - اعتراض مقبول، من فضلك يا أستاذ أحمد أدخل في الموضوع مباشرة وبلاش تضيع وقت.
- يا أفندم أنا عايز النيابة تديني فرصة مرة اكمل مع الشاهد! أنا عايز أوضّح لهيئة المحكمة إن رضوى كانت على علاقة كويسة بزوجها، و إن المشاكل كانت مشاكل عادية زي أي اتنين متزوجين ومتوصلش لدرجة إنه يقتلها، و إن طلب الطلاق ده أو إلغاء التوكيل ماكنش من تفكير رضوى،

كان بتحريض من مدام سهى لأنه لو كان من رأي رضوى كانت لغت التوكيل من فترة.

- لأ هي كانت هتلغيه فعلاً بس أجلته ظروف تعب والدتها، و عشان كانت عايزة تستفسر من حاتم أكثر، أنا كنت بقول رأيي بس ومكنتش بجبرها مثلاً على الأخذ بيه وهى حرة

- يعني إيه عشان ظروف تعب والدتها ؟ في الوقت اللي مزارتهاش ولا حتى و هي بتموت مش حاجة غريبة دي؟ و دي يا سيادة القاضي أوراق من البنك بتفيد إن رصيد رضوى في البنك من ثلاث سنين مقلّش و إن علاء بموجب التوكيل اللي كانت عاملا هوله مسحش و لا مرة واحدة، بالعكس ده كان بيحط فلوس على الرصيد، كان رصيد رضوى ثمانية وستين و دلوقت تسعة وسبعين ألف جنيه، أستاذة سهى بما إن رضوى كانت بتحكي لك كل حاجة، إيه رأيك في جوزها الأولاني؟؟

- بصراحة كان بخيل وما يبصرفش عليها مليم وعائز يخليها تصرف عليه.

- أنا بقول جوزها الأولاني مش علاء.

سهى - أيوة ما أنا بتكلم على حاتم..برضه.

- برضه ؟

النيابة - الشاهدة مالها ومال صفات الزوج الأولاني يا ريس ؟

القاضي - إعتراض مقبول .

- أستاذة سهى إنتِ حالتك الزوجية إيه؟

- أنا مطلقة .

النيابة - إعتراض

القاضي - أستاذ أحمد ملكش دعوة بالأمور الشخصية، و التزم بالموضوع من فضلك وإلا هصرف الشهادة

- يا سيادة القاضي مدام سهى مطلقة ثلاث مرات عشان عندها وساوس من الرجالة، وبشهادة زمايلها في البنك، كل الرجالة عندها بخلا ومبتزين وعائزين يستغلوا زوجاتهم، وعموماً أنا آسف خلينا في موضوعنا، أستاذة سهى آسف لو ضايقتك، ممكن تكلمينا عن الخلاف الأخير بين رضوى وعلاء.

- رضوى قالت إن علاء على علاقة بواحدة وكانت شاكة فيه من فترة لحد ما سمعته بيتكلم معاها في التليفون و إتأكد ظنّها أكثر لما واجهته بموضوع الشيك.

- جميل جداً، على حسب كلامك قلتي إن رضوى قالتك إنها سمعت علاء بيكلم واحدة في التليفون ومن طريقة كلامهم إتأكدت إن العلاقة مش شريفة، إنت متأكدة إن إسم البنت دي كان نسمة؟

- أيوة طبعاً، لأن الشيكات اللي كان بيصرفها كانت لواحدة إسمها نسمة

- ولما واجهته؟

- لما واجهته أنكر طبعاً و هي مسكتتش وفضلت تدور من وراه في مكتبه و في هدومه وفي كلّ حنة لغاية أما لقت فاتورة حساب أوضتين في



فندق في الغردقة في شم النسيم اللي فات و كانوا مع بعض لإن اسمها كان منور في الأوضه اللي جمبه.

- نعم !!! إنتِ ليه مقلتلش الكلام ده قبل كده؟ لو سمحتي قولي الكلام اللي قلتيه ده تاني.

النيابة- إعتراض يا سيادة القاضي الدفاع يعمل على تشتيت الشاهدة.

أحمد - تشتيت إيه يا ريس؟ ده أنا دلوقت في صلب الموضوع !

القاضي - إعتراض مرفوض من النيابة كمّلي من فضلك.

سهى - بقول رضوى اكتشفت إن الإثنين كانوا قضوا شم النسيم اللي فات مع بعض من فاتورة حساب فندق في الغردقة، وكان واضح فيه اسمه في غرفة و إسمها في الغرفة اللي كانت جمبه و لما سألته أنكر كالعادة، و زعق في وشها وقطّع الورقة وقال إنه كان عازم واحد زميله مع السكرتيرة بتاعته لكن الحجز فضل بإسمه، علاء كان دائماً بيحاول يخرج من كل ورطه بأعجوبة زي ما يكون مجهز ردود لكل المشاكل اللي ممكن تكلمه فيها.

- المهم رضوى سكتت؟

- أيوة سكتت، بس ما اقتنعتش، لحد ما صرف الشيك الأخير وطبعاً كان لازم أبلغها وساعتها بدأت المشاكل.

أحمد - شكراً يا مدام سهى ؛ يا سيادة القاضي أرجو اصدار تعليمات للنيابة بضرورة التحري عن اسم موكلي في فنادق الغردقه في فترة أعياد شم النسيم اللي فات.

النيابة - أنا شايف ان مالوش أي لزوم يا سيادة القاضي إضاعة وقت المحكمة لأن على الفرض من وجود هذا الحجز فإنه لا يثبت قيام المتهم ذاته بالإقامة في الميعاد المذكور.

أحمد - إزاي ! لأ طبعاً في الفنادق دي لازم ييسبب النزول صورة البطاقة أو صورة جواز السفر، و أنا يا ريس بدور على أي دليل يثبت على الأقل وجود علاقة بين الإثنين و يكون في صف موكلي، فمش من حق النيابة إنها تصدر على كل فكرة هقول عليها.

النيابة - يا سيادة الرئيس، حتى مع وجود الفرض من وجود هذه العلاقة فليس هنا المجال لمناقشتها، و نرى أن الدفاع لا يزال مصرّاً على إبعاد القضية عن صورتها الأساسية و يدفعنا بصورة أو بأخرى لأشياء بعيدة، لا تمت للقضية بأي صلة.

أحمد - و النبي ده اسمه كلام يا ريس ؟ يا سيادة القاضي لو ثبت وجود العلاقة دي بين موكلي ونسمة اللي أنكرت أساساً إنها تعرفه يبقى وقتها لازم نشكّ إن وقت الجريمة كان فعلاً معاها و إنها فقط أنكرت خوفاً من الفضيحة على الرغم من إن إنكارها ده ممكن يسبب الإعدام لموكلي يبقى كده النيابة بتهدر فرصة لموكلي أقدر أستند ليها في مرافعتي.

القاضي - تؤجل القضية إلى جلسة السبت القادم على أن تتولى النيابة تكليف مباحث مدينه البحر الأحمر بالتحري في الفنادق الموجودة بمدينة الغردقة عن حجز باسم المتهم و إسم الشاهدة المذكورة مع تحري الدقة في البحث و إحضار صور تحقيق الشخصية.

أحمد - لو سمحت يا سيادة القاضي أنا عايز أعيد إعلام بعض الشهود اللي هستند عليهم في مرافعتي النهائية وهم: ياسر ضابط الواقعة،



و رامى زميل المتهم ، و مدام جينا، و الطبيب الشرعي، و رضا مسؤول الأمن، و طبعاً مدام نسمة و ماليش أي طلب تاني.

القاضي - على النيابة إعادة إعلامهم و إنذارهم بالحضور.

رفعت الجلسة

لم أظن في يوم من الأيام بعد أن تولّيت هذه القضية أنني سوف أجد أي مبرراتٍ ودفاعاتٍ أستند إليها في المرافعة، كان كل ما أملك فقط هو التشكيك في أقوال الشهود و محاولة تضارب أقوالهم و التشكيك في جمع الأدلة و التحريات، و بعد التفكير المنطقي وجدت أنني سوف أستند إلى ثلاث نقاطٍ رئيسية في دفاعي عن علاء:

الأول هو صورة ذلك التقرير الذي أرسله الطب الشرعي إلى ياسر بصورة ودّية و لكن لم يرفقه الأخير في التقرير النهائي.

أما الثاني هو شهادة سهى عن إقامة علاء ونسمة في أحد قرى الغردقة و لا أدري كيف نسي علاء إخباري بهذا الأمر.

أما الدليل الأخير هو ما سمعته من الموظف المسئول عن وثائق التأمين أمس فقد قال حرفياً :

مصطفى - أنا فاكّر الإثنين دول كويّس يا أستاذ أحمد، لأن نادر أوي إن زوجين يعملوا الوثيقة دي ، بصراحة خسارة إنها تتوفى قبل ما تعدي الفترة القانونية اللي تخلي الزوج يستحق قيمة الوثيقة.

أحمد - مش فاهم يا أستاذ مصطفى يعني هل الوثيقة لازم تستحق بعد مرور فترة معينة ؟

- طبعاً، لازم تستحق بعد مرور سنتين على الأقل من تاريخ الإمضاء بحيث لو اتوفى حد منهم قبل مرور السنتين لا يستحق الطرف الثاني الوثيقة، يعني اللي أقصده في حالة الأستاذ علاء، مش هيستفاد بيها لأنها لسة ما مرّش عليها إلا ست شهور.

- طيب علاء عرف الكلام ده ؟

- طبعاً و آدي صورة أصل الوثيقة، هتلاقي الشرط اللي بتكلم عليه ده أول سطر أهو إسمع:

(و لابد من مرور فترة لا تقلّ عن أربع وعشرون شهراً لاستحقاق أحد الطرفين للوثيقة و التي تؤول تلقائياً له بوفاة الطرف الآخر ما لم تكن الوفاة نتيجةً للانتحار أو بصورة جنائية قد يُتهم فيها الطرف الآخر ما لم تبرأه المحكمة بحكمٍ باتٍ نهائياً)

و آدي إمضاء الأستاذ علاء ومدام رضوى.

- الله يكرمك يا أستاذ مصطفى، طيب هل الشرط ده في أغلب الوثائق؟

- لأ، بس عشان دي من أكبر قيم الوثائق اللي عندنا فلازم نحط شروط صعبة شوية.

- طيب ليه النيابة معلمتش بالكلام ده ؟

- أنا معنديش أي فكرة، ماحدش أساساً اتكلم في الموضوع ده غيرك.

- ممكن صورة من أصل الوثيقة أعرضها على المحكمة من فضلك؟

- طبعاً طبعاً، بس بعد شوية إجراءات بسيطة.

كان ياسر يقف أمام المنصة و يتحدث عن إجراءات التحري التي قام بها، و كيف وجد أدلة الإثبات، و واجه بها المتهم، و وقتها، إنهار و اعترف بارتكابه للجريمة، لشكه في سلوك زوجته، وكان يسترسل بالحديث، و لا أدري لم في هذا الوقت كنت أتحمس مكان الخياطة في مؤخرة رأسي!

القاضي - أستاذ أحمد ، يا أستاذ، مش إنت اللي طلبت الشاهد؟
إتفضل دورك.

أحمد - ياسر بك إنت إيه علاقتك بالقتيلة ؟

- بنت مرات عمي.

- يعني تعرفها من زمان على الأقل.

- أيوة.

- وهل سبق و كنت اتقدمت ليها مرتين ؟

- - كنت إيه ؟

- بقولك هل سبق و اتقدمت ليها مرتين و اترفضت؟

النيابة - (اعتراض) أظن الأمور الشخصية مش مجال للمناقشة هنا.

القاضي - إعتراض مقبول

أحمد - يا سيادة القاضي أنا عايز أوضح لهيئة المحكمة الموقرة صورة معينة وكل سؤال هسأله و إن بدا إنه بعيد عن الموضوع إلا إنه في الآخر بيتركز في قلب الموضوع.

النيابة - لأ بعد إذنك إحنا بنتكلم في صلب الموضوع دون إضاعه وقت المحكمة.

- و إزاي هدخل في صلب الموضوع؟ مالازم تمهيد.

القاضي - بجد المحكمة بدأت تزهق من أسلوبك في الدفاع يا أستاذ أحمد، لأنك بتلف و تدور في أشياء ما بتخصص القضية، ياريت تخلي أسئلتك مباشرة و في صلب الموضوع.

- يا سيادة الرئيس أنا عايز اوضح لهيئة المحكمة إن ياسر بك اتقدم مرتين للمجني عليها ورفضته و آخر مرة وافقت فيه على الزواج من المتهم فأكيد لازم تحصل عداوة بينهم.

ياسر- حتى لو ده كان حصل يا أفندم أنا عمري ما أخلط بين أمور العمل والأمر الشخصية بل إن واجبي كضابط شرطة هو تقديم مصلحة العمل و وضعها فوق كل اعتبار عشان...

أحمد - مقاطعاً مبتخلطش!!!! خلاص أنا آسف يا سيادة الرئيس أكمل طيب كلامي إنت لما جالك الخبر يا ياسر بك باختفاء المجني عليها عن طريق البلاغ المقدم من زوجها عملت إيه بعد كده ؟

- عملت إيه يعني غير نفس الأساليب المتبعة في اختفاء أي مواطن اتبعت الطرق العادية.

- وهي الطرق العادية تخليك تتهم علاء كأول متهم؟

- لأ طبعاً، بس الطريقة اللي كانت الجثة عليها و بسؤال جارة المتهم و بصمات المتهم ذاتها، ها! بصمات المتهم، كان لازم يتوجه له الإتهام و يعتبر المتهم الرئيسي عشان له مصلحة في موتها.
- مع إن برضه في ناس تانية ليها نفس المصلحة.
- طبعاً بس مش بنفس درجة المتهم ده لو إنت تقصد...
- أحمد - مقاطعاً ياسر بك صباح يوم الجريمة كنت فين؟
- مش فاكراً طبعاً
- إزاي مع إن الجارة اللي إنت إستندت عليها في شهادتك قالت إنك رحت عند رضوى الصبح
- مش متذكر.
- لا إ تذكر، مدام جينا قالت إنها شافتك نازل من سيارة الشرطة صباح يوم السبت، يوم اختفاء المجني عليها لأنها كانت قاعدة معاها، ولما رضوى شافتك نزلت إستأذنت من جارتها عشان تشوفك جاي ليه.
- أيوة، أيوة، إفتكرت، و دي فيها إيه؟ أنا كنت متعود أفوت عليها من وقت للتاني عشان أطمّن عليها و أعرف إيه أخبارها و أشوف لو كانت محتاجة حاجة.
- و كنت متعود الأوقات دي تزورها و علاء مش في البيت ؟
- لا، أقصد يعني لما ظروف شغلي كنت بمر جمبها وخاصة في الفترة الأخيرة لأنها كانت بتشتكي من علاء، وبلغتني تليفونياً إني أعدي عليها
- يوم السبت الصبح لأمر مهم.



- آه واضح إنها كانت بتشتكي من جوزها للكل ، يعني إنت بتقول إن كان فيه مشاكل، و قالتلك عليها، و كلمتك، وقالت لك إنك تعدي عليها ما افكرتش آخر مكالمة دي كانت إمتى؟

- أيوة حصل و كانت قبل الوفاة تقريباً بأربع خمس أيام.

- مع إن أوراق تفريغ المكالمات يا سيادة القاضي ما فيهاش و لا تليفون لا صادر و لا وارد منك، فانتك دي يا ياسر بك!

- بدون إحراجك يا أستاذ أحمد، كانت دايماً بتكلمني من كابينة تليفون في الشارع اللي قصاد بيتهم لأنها كانت بتشك إن علاء بيتصنت عليها، نسيت إنت تطلب تفريغ مكالمات الشارع كمان (وابتسم)

- آه طيب، أنا آسف قولي إنت بتقول إنك بتغلب ضميرك المهني على ضميرك الشخصي و ما بتخلطش بين أمور العمل والأمر الشخصية، صح؟

- أيوة فعلاً.

- أمال ليه المتهم قال إنك مارست معاه التعذيب في القسم لحمله على الاعتراف ؟

- الكلام ده محصلش، أغلب المتهمين لما بيروحوا النيابة يقولوا الكلمتين الفارغين دول، وعندك تقرير الطبيب الشرعي ما أثبتش الكلام ده وعشان كده يبقى الاعتراف اللي قاله و وقعه يبقى عشان انهار مش عشان اتعذب.

- أمال ليه غير أقواله في النيابة؟

- إنت بتسالني؟ ماهو قدامك إسألته!



- طيب، متأسف مرة ثانية، أنا كنت بحسب إنك منحاز شوية ضد علاء، لكن فيه نقطة عايز استفسرها منك.

- إتفضل.

- هل إنت بنفسك كنت بتباشر القضية دي ؟

- لأ طبعاً مش لوحدي إحنا كلنا تيم وورك كلنا بنبحث القضية مع بعض وكل واحد بيختص بالتحري عن شيء معين و في الآخر بنقعد مع بعض نجيب كل البيانات ونعمل لها أنالزس وانا كنت مختص وحدي بالتحريات وغيري مختص....

أحمد (مقاطعاً) - أنالزس يعني تحليل صح ؟

- - أيوة .

- طيب سؤال أخير هل إنت شايف إنك قمت بواجبك على الوجه الأمثل اللي تقابل بيه ربنا ؟

- طبعاً و مش في القضية دي بس في كل القضايا.

- و لا إنك غلّبت ضميرك الشخصي على ضميرك المهني؟

- لأ طبعاً هنفضل في الاستفسار ده كثير؟

النيابة - إعتراض لو دي ياسيادة القاضي طريقه مناقشة الشهود أنا بسجل اعتراضي لأن ده مش هيوصلنا لشيء إحنا بندور في دائرة مفرغة.

أحمد - ممكن زميلي الفاضل يهدأ شويه يا سيادة الرئيس، ياسر بك بيقول إنه ما مارسش أي وسيلة تعذيب و قال ميت مرة إنه مغلبش ضميره الشخصي على ضميره المهني على الوجه اللي مش عارف إيه وإنه كان

الشخص الوحيد اللي كان مسؤول عن التحريات ، طيب تقدر تقولي يا ياسر بك (و قد كنت أبحث في هذه الأثناء عن ورقة التقرير دون جدوى حتى وجدتها في جيب جاكيتي العلوي)

- تقدر تقولي يا ياسر بك الورقة دي إزاي اتسحبت من التقرير الرسمي للطبيب الشرعي ؟

اندهش ياسر وقد نظر مفزوعاً إلى الورقة التي قدمتها إليه و التي كانت تفيد بعدم تطابق عينة شعر علاء مع عينة الشعر الموجودة في الأظافر.

النيابة - أعترض يا سيادة القاضي لا يجوز للدفاع إرفاق أي أوراق في القضية إلا بعد عرضها أولاً على النيابة.

أحمد - ما إحنا لسة فيها، أهو إتفضل يا سيادة الرئيس دي ورقة ما إرتفقتش بالتقرير الطّبي و بتفيد بأن العينة اللي إتأخذت من شعر علاء غير مطابقة بالمرّة لعينة الشعر المنزوعة من بين أظافر القتيلة، إتفضل بقي جاوبني يا ياسر بك، يعني إيه الورقة؟

أما ياسر فقد بدأ لونه بالاصفرار تدريجياً مما رجّحت معه أنه كان ناسياً هذه الورقة فعلاً وكنت في هذه الحالة مستمتعاً أشد الاستمتاع.

- أنا مش فاكِر .

- هو إيه اللي مش فاكِر ؟ إنت كل كلامك مش فاكِر؟ إنت جالك زهايمر دلوقت!

يا سيادة الرئيس زي ما قلت لهيئة المحكمة، الورقة دي تقرير من الطبيب الشرعي المختصّ بتشريح المجني عليها، و يقول فيها إنه وجد آثار شعر في أظافر القتيلة، و وقتها تم الاتصال هاتفياً بياسر بك و اللي

أبلغ الطبيب بضرورة تحليل عينة من شعر المتهم ومطابقتها مع العينة المنزوعة و إبلاغه شخصياً بنتيجة التحليل، و فعلاً أرسل اليه د. يحيى التقرير ده و هو بيحسب إنه هيرفقه في التقرير النهائي، اللي هيصدر رسمي بعد يومين وكان طبعاً بيقول النتيجة اللي قلتها لحضراتكم، يعني المختصر إن بنتيجة التقرير ده جت في غير مصلحة ياسر بك رئيس المباحث، اللي قام وحده، ها! قام وحده بالتحريات، و اللي مغلبش ضميره الشخصي على ضميره المهني، فعشان علاء لازم يكون المتهم لغرض ما في نفسه، ما كان منه إلا أن أخفى الورقة دي، و كأن لم يكن لها أي وجود في التقرير، يعني هنا أنا بفترض سوء نية التحريات اللي قام بيها السيد رئيس المباحث تجاه موكلي وبالتالي أيضاً يكون اتعرض للتعذيب لإجبارة على الاعتراف بالصورة الموقع عليها في قسم الشرطة.

القاضي - (بعد أن تطلع طويلاً، طويلاً إلى الورقة، حتى بدأ صبري ينفذ و كدت أن أهم بالحديث إلا أنه قال مقاطعاً) الكلام ده مضبوط يا سيادة الرائد؟

- أيوة يا أفندم، بس مش بالصورة اللي وصلت لهيئة المحكمة.

- أmaal بصورة إيه؟ إزاي ورقة بالأهمية دي متترفقش في دوسيه القضية و تتحط في التقرير النهائي ؟ إنت عارف إيه معنى الكلام ده؟ وعارف ده يتسمى إيه؟

لم ينطق ياسر و إن كان القاضي قد نظر إليَّ قائلاً

- إنت عايز الشاهد في سؤال ثاني؟



- لأ يا سيادة الرئيس، كنت في قمة السعادة و أنا أرى ياسر جاراً كل أذيال الخيبة، و أنا أهدم إحدى أركان القضية.

القاضي - نادي على الشاهد الثاني

- جينا ابراهيم فواد

وبعد أن دخلت مدام جينا اقتربت منها هامساً:

- إزيك يا مدام جينا.

- الحمد لله و إنت عامل إيه إزي راسك دلوقت ؟

النيابة - من فضلك علي صوتك يا أستاذ أحمد، سمع المحكمه صوتك و متهمسش للشاهدة.

- الصبر، الصبر، يا أستاذ من فضلك، أنا لسة ما بدأتش ، و أخبار قطك إيه كويس؟

- الحمد لله، بس عايز يتجوز، و من يوم ما ناتاشا ماتت و أنا يا حبيبي مش لاقية عروسة، فضلت أدور ..

القاضي - يا أستاذ أحمد ممنوع الانفراد بالشاهدة علّوا صوتكم من فضلك وإلا هصرف الشاهدة.

- مدام جينا أنا مش هطول عليك، أنا عارف إني دائماً برهقك بكلامي و بتعبك من المشوار، حضرتك قلتي في شهادتك إن المتهم علاء ماكنش موجود يوم الوفاة لأن ده أسبوع شغله بتاع الليل، و بعدين قلتي إن راجل لابس أفرول شكل الي بلبسه علاء في شغله نزل، و طلع العمارة و سمعته ييخبط، فاكرة ؟



- طبعاً فاكدة .

- طيب يا مدام جينا لو المفروض إنه علاء كان هيطلع متخفي، مش يروح يلبس لبس الشغل وهو أصلاً جاي من طنطا، وما راحش الشغل يوميه من الأصل و يروح البيت، و يطلع السلم، و يفضل يخبط عشان كل الناس تشوفه و تسمعه، إنتِ مش شايفة إن ده غريب شوية؟

- وده غريب في إيه ؟ أيوة سمعته بيخبط .

- طب مش لو كان هو كان يفتح الباب بمفتاحه؟

- لا يا فالح، لأن علاء كان أغلب الوقت بينسي ياخذ المفاتيح وبيخبط على رضوى حتى في الفجر، وده كان بيضايقها كثير

- إزاي بس مهو نازل من العربية و أكيد كان مفتاح الشقة مع المفاتيح؟

- طب و هي كانت عربيته يا ذكي؟

لم أرد، أو بمعنى أصح اتكتمت، كان ردّها بسيطاً جداً لدرجة أنه ينسف دفاعي من الأساس.

- طيب المهم، إنتِ قلتي إنه نزل بعد فترة، و وقف قدام العربية و شرب سيجارة و إنتِ عن طريق ضوء سيارة جارتك لمحتيه إنتِ متأكدة ؟

- أيوة متأكدة، أنا ما بغلطش أبداً.

- يا ريس، مدام جينا بتقول إنها شافت وشّ علاء و متأكدة، ومبتغلطش، طيب تقدري يا مدام جينا تطلعي صورة علاء من الثلاث صور



دول ؟ (كنت أعتد في هذه النقطة على لعبة ما، و كنت أدعو الله ألا يخيب ظني و أن أجريها إلى الخطأ)

النيابة - أعتد طبعاً يا سيادة الرئيس إيه نوع الألاعيب اللي بيتبعها الدفاع صور إيه !

القاضي - دي صور إيه الأول يا أستاذ أحمد ؟

- إتفضل يا رئيس و قدمت إليه الصور شارحاً له وجهة نظري هامساً، بعيداً عن أذن النيابة.

القاضي - اعتراض النيابة مرفوض، و للشاهدة أن تتعرف على الصور

ذهبتُ إليها و قدّمت إليها الصور و ارتدت نظارتها الطبيّة قائلةً بهمس: عايز تعمل شاطر عليا ؟ أيوة شفتهم عايز إيه بقي.

- تقدري تطلعي صورة علاء من وسطهم ؟

- هو إنت فاكربي ما بشوفش ؟ دي صورتك و الاتنين دول صور علاء بس واحدة بشنب والتانية من غير.

- يعني دي صورتني أنا وعلاء بس ؟

- - أيوة يا فالح!

صرخت حينئذ بحركة مسرحية، يا سيادة القاضي يا حضرات المستشارين الشاهدة الوحيدة اللي اتعرفت على علاء و اعتمدت عليها النيابة طلعت متوترة متذبذبة، ما بتشوفش أصلاً ! إتفضل يا سيادة القاضي، دي فعلاً صورتني، أما الاتنين دول فواحدة منهم لعلاء اللي بدون



شنب، أما الصورة الثانية يا ريس صورة ياسر بك بس بشنب (و كنت وقتها قد اقتربت من ياسر بك و أشرت إليه)

و وقتها بدأت الهمهمة في المحكمة، أما ياسر فقد أمسكني من ملابسي صائحاً :

- أنت تقصد إيه ؟ عايز تقول إني قتلتها ؟ عمّال تُبرم من ساعتها عشان تقول كده ؟

القاضي - إيه اللي بيحصل ده ؟ بس أنا مش عايز دوشة و إلا هحط أي حد يتجاوز في القفص، و إنت يا سيادة الرائد، أنا مش هسمح بأي تجاوزات هنا! متنساش إن وراك عقوبة! إنت عارف اللي بيتلاعب بالأدلة عقوبته إيه ؟

أحمد - أنا عايز أستفسر يا أفندم، هو حلق شنبه إيمتى؟

لم ينطق ياسر و إنما ترك ملابسي وحاول أن يتكلم فلم يقدر، أما أنا فكنتُ على وشك الطيران لأقفز فوق المنصة و أقبل رأس القاضي

القاضي - إنت عايز الشاهدة في سؤال تاني ؟

أحمد - لا يا أفندم، متشكر أوي ممكن تصرفها (و قبل أن أتجاوز جينا استوقفتني بعصاها المدببة قائلة :

- ممكن تسندني لحد الكرسي يا أستاذ أحمد؟

لم أتردد في إمساك يدها وسط إعجاب الكثير من رواد المحكمة، أما هي فقد ابتسمت لي ابتسامة لم أفهم معناها إلا متأخراً هامسةً في أذني:

- أنا مذبذبة ومتوترة ؟ و ما بشوفش تحت رجلي ؟ طيب أنا عندي ليك مفاجأة هتخليك تتشقلب زي القرد.

وترجمت هذه الجملة بقرصةٍ شديدةٍ تحت إبطي كدت معها فعلاً أن أبدأ بالشقلبة و لكنني كتمتُ صرختي و شقلبتي أمام الكافة وهيئة المحكمة، و عندما أجلستها في هدوء، ناولتها ركلةً في قدمها و كانت شديدةً بالطبع لم تتاوه و لكن ابتسمت ابتسامةً صفراء لم ترق لي أبداً.

الحاجب - د.يحيى كمال عبد الرؤوف.

أحمد - د.يحيى، بالنسبة لواقعة تحليل شعر العينة، ممكن تكلمنا على اللي حصل؟

د. يحيى- بعد الفحص المبدئي للجثة تبين معها وجود شعيرات في أظافر القتيلة مما يدلّ على آثار وجود مقاومةٍ بينها وبين الشخص اللي كان معها في السيارة وقت إرتكاب الجريمة، و اتصلت وقتها بياسر بك رئيس المباحث، فطلب مني إني أفحص العينة ضروري أول شيء و أطابقها مع عينة شعر المتهم، و أبعث له النتيجة في أقرب فرصة، و رحت بعدها بيوم لمطابقة العينات، و قمت بيها و اتّضح عدم تطابق العينة المنزوعة من أظافر المجني عليها مع عينة الشعر المنزوعة من المتهم، وعملت تقرير مبدئي و أرسلت له النتيجة لأنه كان مستعجل عليها فقلت أرسله كتقرير مبدئي لحين انتهاء التقارير التابعة النهائية، لكن عرفت من محامي المتهم إن التقرير ده بالذات ما اترفقش مع التقارير التابعة اللي أرسلت له بصفته، و لما كنت بحتفظ بصورة من كل تقرير بكتبه، طلعت الصورة و ارفقتها في ملف القضية اللي قدام هيئة المحكمة.

- طيب ده بالنسبة لتقرير عدم تطابق العينتين، ننتقل لنقطة ثانية و اللي هي مسألة نصل السلاح المستخدم في ارتكاب الجريمة.

- أنا سبق وقلت كل شي في الموضوع ده و أعتقد إن مفيش شيء ممكن أضيفه، أنا قلت إن يجوز إن يكون هناك سلاحين استخدموا في ارتكاب الجريمة.

النيابة - اعتراض يا سيادة الرئيس تقرير الطب الشرعي قال إنه في حالات نادرة يمكن أن يكون هناك سلاح واحد مستخدم للجريمة ولكن اختلاف قوه عزم الطعنه ممكن أن تختلف وخاصةً إذا كان هناك عدة طعنات صح الكلام ده يا د. يحي

- أيوة فعلاً، أنا ذكرت كده.

أحمد - يعني إيه المفروض يا دكتور يبقى التقرير يفيد اليقين ومينفعش ذكر كلمة ربما، و إلا كان الشك ده ممكن يفسر لصالح موكلي يا سيادة القاضي.

النيابة - يا رئيس الدفاع بيحاول يوجه الطبيب لقوله كلام يصب في مصلحة المتهم، إحنا مش بتلاعب بالألفاظ هنا.

أحمد - يا سيادة القاضي أنا لا بتلاعب و لاحاجه، أنا بحاول بس أوضح نقطة مهمة لأن التقرير ذكر في الصفحة السابعة منه كلمة و ربما، ها، ربما، و المفروض بوجود الكلمة دي أساساً يبقى فيه شك، و زي ما معروف، فإن الشك يفسر في صالح المتهم و خاصةً إذا كان هناك دليل ثاني يشكك في الاتهام زي عدم تطابق العينتين و الا إيه ؟ طيب، هنتقل

لنقطة تالته، بتفتيش السيارة التي ارتكب فيها الحادث، وجدت آثار حبوب تسمى إيزوربيد ممكن تقولنا يا د يحيي ده علاج لإيه؟

- ده دواء منظم لحركة ضربات القلب، و بيستخدم في حالة النهجان الشديد.

- طيب تفتكر ده كان للمتهم و الا المجني عليها؟

- أنا حللت دم القتيلة وملقتش أي أثر لتناول أي أدويه خلال التمانية و أربعين ساعة الماضية، وخاصةً إن الدوا ده بيبقى موجود في الدم لفترة طويلة

- طيب والمتهم؟

- برضه نتيجة التحليل بتقول إن مفيش أي أثر للدوا ده.

- يعني الحبوب دي لا كانت للمجني عليها ولا للمتهم معنى كده ياسيادة القاضي إن كان فيه شخص تالت عنده عيب في القلب مثلاً و بيتعالج بالدوا الموضح لسعادتكم، و على أثر المعركة اللي حصلت بين الطرفين دول ممكن نقول إنه وقع منه الحبوب دي.

النيابة - يا سيادة الرئيس وجود آثار حبوب في السيارة وعدم وجود أي آثار ليها في عينات الدم لا يعني أبداً نفي التهمة عن المتهم لأن السيارة كما اتضح إنها مسروقة و يجوز أن يكون صاحبها الأضي هو من لديه هذه الحالة المرضية، أو حتى ممكن يكون مجرد راكب عابر.

أحمد - يعني يا سيادة القاضي معقول كل ده يبقيني صدفة، أو يمكن، أو ربما! عموماً أنا خلصت أسئلتي مع د. يحيي

القاضي - تقدر تنصرف يا دكتور.

أحمد - يا سيادة القاضي أنا كنت طلبت شهادة المهندس رامي وسبق وتم إعلامه مرتين ومجاش، وبرضه لم يتم إحضار نتيجة إستفسار مباحث البحر الأحمر اللي قلنا عليها الجلسة اللي فاتت.

النيابة - ياريس إحنا كلّفنا مباحث مدينة الغردقة، و هم اللي إتأخروا وهنعيد الطلب و هيكون جاهز الجلسة الجاية إن شاء الله

القاضي - إعادة إعلان المذكور؛ نادي على الشاهد اللي بعده.

رضا محمد مؤمن

- إسمى رضا محمد مؤمن، ظابط أمن في المصنع بقالي حوالي عشر سنين، و تربطني بالمهندس علاء صداقة قديمة، و مش أنا بس، لأ ده أغلب العمال و كلنا بنقول إنه إستحالة يأذي أي حد، و بالبشاعة اللي عرفنا بيها اللي حصل ...

النيابة - إعتراض إنت هنا مش جاي عشان تقول رأيك.

أحمد - هو إيه اللي إعتراض يا ريس! النيابة عمالة تعترض على كل كلمة! ده الشاهد بتاعي و أنا اللي طلبت إعلامه، فيا ريت النيابة متعرضش لمجرد الإعتراض، و تلتزم بسماع الشاهد زي ما أنا التزمت بسماع شهود الإثبات.

القاضي - إعتراض مرفوض، سيب الشاهد يتكلم، بس يا أستاذ أحمد أدخل مباشرةً في الموضوع، إحنا مش هنفضل طول السنة في القضية دي.

- يا أستاذ رضا، تقدر تحكي لي اللي حصل بالضبط يوم الجريمة، و من فضلك حاول تكون دقيق في المواعيد على قد ما تقدر.

- بسم الله الرحمن الرحيم، حوالي الساعة اتناشر جالي تليفون من طنطا على تليفون الشغل، لقيت فيه المهندس علاء بيعتذر إنه مش هيقدر يجي الشغل النهاردة لظروف خاصة بحماته، و إنى أبلغ المهندس رامي بالكلام ده عشان يروح الشغل لو مش هيروح، و يعمل له أجازة.

- و بعدين؟

- و بعدين فعلاً إتصلت بالمهندس رامي و قعد يسبّ و يلعن شوية و قال إنه ماكانش فعلاً جاي النهاردة لظروف خاصة بيه لكنه هيضطر إنه يجي غصب عنه، و حتى أنا اللي عملت للمهندس علاء أجازة وكتبتهافي الدفتر.

- طيب سؤال يا أستاذ رضا، هل الأمن مثلاً بيلاحظ كل شخص يخرج أو يدخل المصنع من العمال أو المهندسين؟ و هل خرج حد يومئها؟

- أيوة طبعاً لازم نلاحظ، و نسأله هيروح فين أو هيغيب قد إيه، منهم اللي بيروح يجيب عشا أو يقعد شوية على القهوة وفعلاً اليوم ده خرج أربع أشخاص عشان يتفرجوا على مباراة مهمة في القهوة اللي بتبعد عن المصنع حوالي ميت متر

- كانوا مين يا رضا؟

- كان علي ميكانيكي الوردية و معاه المهندس رامي و عامل اسمه جودة و مش فاكّر صراحه الرابع مين.

النيابة - إعتراض إحنا مالنا بكل الكلام ده يا سيادة الرئيس؟



أحمد - صبرك عليه يا عوني بك، و كلهم رجعوا بعد الماتش و الا
إيه

النيابة - إعتراض تاني إنت هنا بتتكلم في دفاع و الا حضور
وانصراف موظفين؟

القاضي - اعتراض مقبول، أستاذ أحمد أنا سبق و أنذرتك لو مش
هتسأل أسألة مباشرة يبقى الشاهد ينصرف.

نظرت إلى القاضي بغيط وهتفت فيه حنق

- يبقى ينصرف

القاضي إتفضل يا أستاذ رضا خلاص، تؤجل القضية إلى جلسة السبت
الأول من أبريل لإعلام بقية الشهود و إعلان المرافعة النهائية.

رفعت الجلسة

أرسلت إلى المباحث بعدها بيومين التقرير الذي كنت أتمناه و أنتظره،
و الأفضل من كل ذلك، هو علمي بإيقاف ياسر عن العمل لحين الإنتهاء
من التحقيق معه في قضية إخفاء أدلة باعتبارها أدلة تؤثر على الحكم.

وفي ذات صباح علمت أيضاً بوفاة أستاذ مجدي زوج مدام جينا، التي
كانت لا تزال تشير حيرتي إلى هذه اللحظة؛ كم كنت أشعر أن هناك شيئ
ما بداخلها لا تريد أبداً الإفصاح عنه، ففكرتُ ملياً أن أتوجه إليها
لمواساتها في زوجها، لماذا لا أدري، فكنت أشعر أن داخل هذه المرأة
العديد من الأسرار التي لم تبَح بها ، و لذا بعد ساعتين فقط كنت في
صالون المرأة العجوز، كانت ترتدي السّواد و لكن لا يظهر ذلك الإحمرار

الدائم في العيون التي تبكي دوماً، وقتها تأكدت أن ما بداخل تلك المرأة لا يطفو أبداً على وجهها.

حاولت أن أرثي لها بأي كلمات تعزية، ولكنني لم أستطع فأنا لم أجلس مع زوجها إلا مرتين فقط، وظلّت تسمعي و هي جالسة، لا تنبت ببنت شفة، على أريكة واسعة، و بجوارها جلس قطّها الأبيض و هي تربّت بهدوء على رأسه الذي ظلّ ينظر إليّ بعيونه النارية، و كم كنت أشعر أنه ينتظر فقط أمر سيدته لينقض ناشباً أنيابه في لحمي.

كنت أشعر بجوّ من الكره العام يحيط بي دون حتى أي تفسير لهذا الكره وفجأة قطعّ حبل أفكاري قائلةً.

– إنت عارف إنك بتعمل غلط كبير أوي يا أحمد؟

– مدام جينا بلاش نتكلم في القضية، لأن كل اللي تعرفيه إنت قلتيه في الجلسة وفيه خفايا كثير أوي انتِ معنديش علم بيها، و بعدين أنا أعرف علاء من زمان جداً و اللي زيه مستحيل إنه يمسك سكين و يقتل بالشاعة دي، وعموماً ده واجبي، قبل ما يكون علاء زميلي واجبي إني أدافع عنه، مش عايز أقولك حتى لو كان متهم، بس مش ممكن أتخلي عنه، عموماً أنا كنت جاي عشان أعزي حضرتك وأقولك إني معرفتش والله إلا متأخر.

ساد صمتٌ بعد هذه الجملة، و توقّعتُ أن ترد و لكنها لم تفعل، وكان لزاماً علي أن أنهي هذه المقابلة، و فعلاً وقفتُ و انتظرتُ أن أمدّ يدي إليها لكنني لم أفعل، و لدهشتي وجدت نفسي أتطلع إلى الصور على الجدران كانت أكبرهم للسيدة مريم العذراء و بجوارها صورة المسيح عليه السلام، وصورة أخرى تجمع بين الزوجين، و على رفّ المكتبة كان هناك

صورٌ لعدة قطط، يجمعهم ذلك الأنف الأفطس، وصورةٌ تجمع بين قطّين أحدهما هذا الغبي، والأخرى أنثى جميلة الشكل، و لا أدري كيف أقنعتهم بالجلوس على هذا الوضع لتلتقط لهم الصورة، هكذا حاولت أن أداعبها بهذا التعليق، و ما إن بدأت بقول ملاحظتي هذه حتى قالت دون مقدمات:

- أنت تعرف يا غبي إن القاتل مش لازم يمسك سكين عشان يريح ضحيته، فيه مليون طريقة للقتل، حتى من غير ما تنزل نقطة دم واحدة! المهم دايماً في وجود السبب و المبرر، يعني مثلاً مثلاً إيه اللي ممكن يخليني أقتلك من غير ما أي حد يشكّ فيا؟

- مش فاهم يا مدام جينا (شعرتُ أن عيون العجوز تلمع في هذا الوقت مما أثار رُعي و خاصةً عندما بدأ القط في الدوران حول نفسه بطريقةٍ غريبة)

- هديك مثال، فنجان القهوة اللي شربتها من عشر دقائق، إيه اللي يضمّنك إني مش حطالك فيه سمّ يجيب أجلك.

(كنتُ قد بدأتُ أتصيب عرقاً، على الرغم من تأكدي من استحالة الفكرة ذاتها)، لأ طبعاً إنتِ بتهزري، أولاً مفيش مبرر، ثانياً هتودي فين جشتي مش هتقدري تشيليني، و ابتسمتُ.

بادلتنِي الابتسام بِإبتسامةٍ غامضةٍ قائلة:

- لأ متخافش، أسهل حاجة إني أتخلص من جشك، زي ما بتخلص من جش حيواناتي، وبعدين متقلقش أغلب السّم يا غبي مش بيبدأ إلا بعد ساعات على الأقل و واضح إنك مش هتبات هنا.

.....

قمتُ مفزوعاً بطريقةٍ لا إرادية صارخاً، إنْتَ بتكلمي جد و الا إيه؟ و هذه القفزة جعلت قطعها الغبي ينكمش في مكانه نافراً كل شعيرات جسده مصدراً عواءً مخيفاً وبدأ في الاستعداد للقفز.

جينا - بس أقعد إنْتَ نطيت كده ليه، كده خوِّفت فوستاك؟ متخافش يا حبيبي نام، أنا بهزّر يا حمار! و بعدين أنا هموتك ليه هو فيه مبرر؟ هورثك مثلاً؟ هل فيه عدااء بيني وبينك؟ آه إنْتَ لسان طويل وعائز قطعه، بس ده مش ممكن يكون سبب عشان أخلص منك.

- لا طبعاً ما أنا عارف (وشعرت وقتها أن العجوز تتعمد أن تشير رعيي منها، لسببٍ لا أفهمه) فعلاً أنا معاك، بس مش معنى إن مفيش مبرر ده ما يمنعش القتل، فيه ناس بتقتل لمجرد الرغبة في القتل، بس صدقيني في الآخر لازم هيبانوا في النهاية.

- غلط! بختلف معاك، عدم وجود مبرر مش هيلغي الدافع للقتل، ممكن أقتلك بدون أي مبرر، عارف، زمان قرّيت جملة لواحد من علماء علم النفس، بيقول "إن الغالبية العظمى لا تمتنع عن ارتكاب جرائم القتل لأسباب تافهة فقط و يجب علينا أن نصدق أن بعض الناس يرتكبون جرائم القتل لأقل الأسباب، المهم أننا إذا أردنا ارتكاب جريمة قتل، فإن أفضل وسيلة للتخلص من عقوبتها، هي عدم وجود أسباب كافية تدعو إلى ارتكابها" فهمت؟ ولا مش فاهم؟

- ما شاء الله إنْتَ حافظة الكلام ده منين؟ أنا معرفش أحفظ الكلمتين دول (كنت دوماً أشعر أن هذه المرأة ليست ربما بالجنون الذي تحب أن تُشعر الناس من حولها به، و لكن تأكدتُ فعلاً من أنها ليست بهذه السطحية، بل ربما تعدّت إلى مراحل الذكاء التي قد تدمر صاحبها

ومن حولها) مدام جينا ممكن أسألك سؤال شخصي ؟ هو المرحوم
مجدي، إيه سبب الوفاة ؟

دمّعت عينا العجوز فجأة قائلةً - بأزمة قلبية طول عمره كان بيشتكي من
قلبه

لا أدري، أحسست بالتوتر فجأة تماماً مثل ذلك الشعور الذي راودتني
في شقة علاء، و بالتالي كان يجب الانصراف فوراً من هذا المكان،
فمددتُ يدي إليها قائلاً:

- معلى أنا بزعلك دايماً يا مدام جينا. (و رغبةً في التقرب أكثر من
العجوز أردفت) مع السلامة يا فوستاك، خد بالك من ماما، و ترجمت
قولي هذا بتصرفٍ كان ليقوم به أيّ شخصٍ طبيعيٍ لقطّ طبيعي، و هو أن
فقط اقتربت و ربّتُ على رأسه، و لكنه كما يبدو كان متذكراً ما حدث بيننا
في المرة السابقة، فلم تكد يدي تلمس رأسه حتى شبك مخالبه فجأةً في
يدي، و لم تخرج إلا بعد أن أصابني بفتحةٍ كبيرة ربما تحتاج إلى خياطة،
و كان ردّ فعلي طبعياً أنا الآخر أن لكمته على رأسه بيدي الأخرى، فنزل
مهرولاً أسفل الكنبه، أمّا العجوز فأحسست أنها تبذل جهداً خرافياً حتى
تستطيع أن تسيطر على نفسها، و هي تمدّ يدها سريعاً إلى عصاها
السحرية، ربما تذكّرت أول لقاءٍ بيننا فأسرعتُ قائلاً:

- أنا آسف، والله هو اللي بدأ الأول! (و كنت أكتّم الدم الذي بدأ
في السيلان بيدي الأخرى)

- حصل خير، حصل خير، عموماً و إنت مروّح فوت على أيّ أجزخانة
و إلحق خد شوية إسعافات، لأن ضوافره فيها تيتانوس.

.....

- يا نهار إسود! تيتانوس!

وقد ضحكت لأول مرة منذ معرفتي بها، طيب أقعد إرتاح إنت بتخاف
على نفسك كده ليه! أنا بهزر معاك، هو معقول فوستاك يكون كده!

- آمال بتقولي كده ليه، لازم ترعبيني يعني!

- افكرت بس إني أثبتلك كلامي، إن فيه طرق كتير أوي لأوى للقتل،
و آخرهم اللي حصل قدامك أهو دلوقت، ومن غير مثلاً ما حد يشك فيا،
أنا قريت مرة إن فيه طيب لوث فعلاً ضوافر القط بتاعه تيتانوس عشان
يقتل مراته و فعلاً حصل، إستنى أقعد خمس دقائق بس!

- إيه هتعملي إيه هتفتحي الغاز ولا هتكهربيني (وقلت هذه الجملة
في سرّي طبعاً) كنت اتوقع مصيبةً ما عندما خرجت لكن بعد دقيقة أتت
مرة أخرى و بيدها شنطة إسعافاتها الصغيرة التي كنت أراها فيها ثاني مرة و
أخذت بيدي بمنتهى اللطف و أخذت تنظّف لي الجرح وهي تتمتم:
إخص عليك يا فوستاك! إنت لازم ضوافرك تنقص! كده تعمل كده في
عمو.

- إنت للدرجة دي بتحبي المخلوق ده ؟

- طبعاً! لو حسيت إن حد هيضربه أو يزعله أنا ممكن أقتله، عارف إن
ده إبني وحببي!

- طيب قبل ما أسيبك طيب سؤال افكرته، إنتِ قلتي في المحكمة
إن فيه مفاجأة عندك ليا، مش ناوية تريحيني بقي وتقوليها لي.



- مش دلوقت، لما ييجي وقتها هتعرفها؛ بس عارف! وقتها أنا هبقى سعيدة أوي إني أشوفك و إنت غبي! وقتها هتأكد إنك فعلاً غبي و أغبي بني آدم ممكن تشوفه بحياتك!

- غبي ؟ طيب الله يحفظك يا مدام جينا، خدي بالك من نفسك وشدي حيلك، و لكني تذكرت أمراً عندما وصلت إلى باب الغرفة فالتفت قائلاً:

ممكن بعد إذنك توصليني لباب شقتك أحسن دايم شوية (و لم يكن هذا السبب الطبع، ولكني كنت لا اعلم المخفي مستخيلي فين)

رامي- إسمي رامي أحمد عمر، ٣٦ سنة، مهندس في مصنع الصناعات الهندسية، و علاقتي بالمهندس علاء فوق الممتازة.

أحمد - طيب يا أستاذ رامي، إحنا سبق و أعلمناك ثلاث مرات كنت فين؟

.....
- كنت واخذ أجازة، قاعد عند خالي في المنيا، و لما رجعت لقيت في استدعاء من رئيس المباحث.

- طيب خلينا ندخل في الموضوع على طول، إنت قلت إن علاقتك بالقتيلة كانت مجرد معرفة عن طريق علاء، و كانت جايالك عروسة زي ما قلت، حصل الكلام ده؟

- أيوة ده حصل وما أنكرتش.



- طيب تقدر تقوللي إيه نوع العلاقة اللي تخلي فيه إتصالات كثير بينكم و دايماً في أنصاف الليل؟

- محصلش الكلام اللي إنت بتقوله ده

- هو إيه اللي محصلش! أنا مش بجيب حاجة من عندي، يا سيادة القاضي اتضح إن فيه مكالمات من موبيل رامي إلى موبيل رضوى وبالعكس وكانت بتستمر لمدته..

(النيابة مقاطعا) - يا ريس إحنا سبق وأثرنا النقطة دي و رامي قال إن علاء هو اللي كان بيتعمد في الفترة الأخيرة يتصل من عنده.

علاء (صارخاً) - و أنا قلت محصلش ! بدمتك ده حصل يا رامي ؟
ما ترد!

القاضي - أسكت يا علاء في محامي بيتكلم عنك.

أحمد - طيب بلاش دي، يوم الجريمة جالك إتصال على موبيلك من القتيلة بعد الساعة إتناشر الضهر، تفتكر ليه؟

رامي - أبوة فاكّر عشان تقولي إن علاء مش جاي، و إني أعمل له أجازة يوميه.

أحمد - بس يا ريس اتضح إن علاء إتصل بالمصنع، و بلغ رضا موظف الأمن إنه يتصل بالمهندس رامي ويبلغه إنه مش جاي، و يبلغه برضه إنه لازم يروح لأنه بيمر بظروف حماته و مش هيروح الشغل ليومين، المهم الكلام ده يا سيادة القاضي كان حوالي الساعة اتناشر الضهر و رضا قال إن في الوقت ده فعلا إتصل بالمهندس رامي و بلغه إن علاء مش جاي، و إنه لازم ييجي، و وقتها رامي زعل و زعق و قال انه مكش رايح أساساً



يبقى يا ريس لو كان فعلاً رضوى بلغته باللي بيقوله يبقى كان هيقول لرضا إنه عارف، لأن المفروض يا ريس إن مكالمة رضا كانت قبلها بنص ساعة.

رامي - أيوة بس اللي حصل إن رضوى قالت ليا فعلا كده، و قالت إن جوزها مش جاي، والمكالمة نفسها استمرت دقيقة بس.

أحمد - يا أستاذ رامي طيب يوم اختفاء رضوى لما وصلت أنا وعلاء عند البيت لقيناك هناك عمال تلف كإنك بتدور على حاجة و لما سألناك فاكرك قلت لنا إيه؟

رامي - لأ طبعاً مش فاكرك بالضبط.

أحمد - قلت إنك عرفت إن والدتها إتوفت و قلت إنك تيجي تعزّيها و لما علاء قالك وقتها كنت إتصل بدل ما تيجي المشوار ده، إنت ردّيت وقلت إنك عمال تتصل بموبايلها كتير ومردتش؟ صح

رامي - ممكن.

أحمد - طيب يا سيادة القاضي، موبيل رضوى كان مع علاء أصلاً طول الوقت، و من بعد الوفاة، طيب ما كان علاء يقول إنه كان بيتصل؟ لأن علاء موبيل رضوى هو اللي كان معاه وأصلاً تفريغ المكالمات محصلش أي اتصال في الوقت ده ، بلاش النقطة دي تقدر تقول لنا وقت الجريمة كنت هربت من الشغل بحجة إنك هتشوف ماتش على الساعة تسعة في الوقت اللي حصل عطل في المصنع و لما اتصل بيك الخفير سيد علي حسب ما إنت قلت له لقي موبيلك مقفول و لما جالك على مكان القهوة اللي المفروض تبقى قاعد عليها تشوف الماتش ما لفاكش

هناك، ده في الوقت اللي إنت رجعت فيه حوالي الساعة واحدة صباحاً،
كنت فين بقى كل ده؟

النيابة - أنا بعترض يا سيادة القاضي.

احمد- ممكن زميلي العزيز يصبر علي، أما أخلص إستجواب الشاهد
، هيعرف أنا أقصد إيه من كل أسئلتي دي.

النيابة - لا أنا بعترض، لأن كل ده مالوش أي لازمة غير تضييع وقت
العدالة إحنا في مجال سماع شهادة وليس إجراء تحقيق.

وفجأة وبدون سابق إنذار هوى رامي على الأرض قابضاً على صدره
محدثاً هرجاً في المحكمة فجرى أحد الحاضرين إليه محاولاً إيقافه دون
جدوى فقد ذهب سريعاً إلى غيبوبة عميقة، من آثار أحد أزماته القلبية ممّا
جعل القاضي يستدعي مسئولي الإسعاف لنقله إلى المستشفى سريعاً...

أحمد- مدام نسمة، في كلامك في تحقيق النيابة قلتي إنك تعرفي
المتهم من أكثر من سنة كزبون و شخص عادي، وكل معرفتك بيه كانت
بسبب صفقة لاب توب.

نسمه - حصل فعلاً وكل كلامي معاه في الفترة اللي فاتت كان عشان
الصفقة دي، و أنا سبق وقدمت صور الشيكات اللي كانت بإسمي و
قدمتها للمحكمة.

- وطبقاً لكلام مدام سهى قالت إن المرحومه شكت في وجود علاقة
بينك و بينه و بسبب إنها سمعته بيكلمك في مواضيع خاصة أوي في
التليفون.

- محصلش الكلام ده طبعاً، ده كله كذب و افترا لو كان كلمني هيبقي مرّة أو اتنين وكان في صميم الشغل.

- يعني بتنكري كلام سهى؟

- مش سهى بس، أنا بنكر كلام أي حد يقول إن فيه علاقة بيني وبين الراجل ده، الكلام ده كان سبب طلاقى و أنا مش هسكت، و هرفع قضيه رد شرف..و

- (مقاطعاً) يا ستي لا قضية ولا بتاع، هدّي بس أعصابك شوية و بلاش الحمقة دي، قضية إيه بس! مش لما نبقى نخلص من القضية دي؛ المهم إنتِ سبق وقلتي إنك مقبلتهوش في طنطا وكلام كتير أوي، لكن اللي حصل يا سيادة القاضي إن حصل تحقيق فعلاً في الكلام ده و يقول التحقيق إن يوم تلاته أبريل من العام الماضي كان المتهم المذكور ومعه الأستاذة نسمة في أحد فنادق الغردقة، ها، في أحد فنادق الغردقة، و لمدة أسبوع و كانوا في غرفتين قدام بعض، كويس إنهم مكنوش في أوضه واحدة، المهم أدى يا ريس صور التقرير و آدي صور البطايق، مش دي برضه صورتك يا مدام نسمة؟

نظرت وقتها إلى النيابة كنت متوقّعاً أن يهبّ كعادته في كل مرة إلا أنه الآن صمت، و أما نسمة نفسها فلم تتمالك أعصابها كما كانت في الجلسات السابقة و في التحقيقات، لأنها يبدو أنها كانت نسيت تلك الشجرة، كانت كملاكم في حلبة الملاكمة، أنهكت قواها في كل الجلسات السابقة وهي الآن في انتظار الضربة القاضية لتستريح

أحمد - مدام نسمة، دي صورة بطاقتك و الا لأ ؟ ما تردي!



- (بتردد) أبوة.
- يعني هل إنتي فعلاً كنت في الوقت ده و الأسبوع ده في الفندق ده؟.
- أصل الحكاية...
- أحمد (مقاطعاً) - من فضلك آه أو لا؟
- أبوة، بس مش بالصورة اللي في دماغك.
- بلا صورة بلا بتاع، سؤال تاني، يعني أهو إنت كنتي فعلاً على علاقة بالمهندس علاء.
- يعني إيه علاقة، يا أستاذ ؟
- أحمد (بغيظ) - يعني إيه علاقة ؟ يعني النوع من العلاقة اللي خلت جوزك يطلقك لما عرف، العلاقة اللي إنت أصلاً أنكرتها في الاول، و بغض النظر حصل ولا ماحصلش سؤال أخير (و قد استعددتُ لأن أوجه إليها أخيراً الضربة القاضية) يعني يوم الجريمة هل حصل و قابلتي علاء في طنطا ، وفي شقتك؟
- نسمة (و قد بدأت في البكاء) - حصل (بصوت ضعيف)
- (وبدأ قلبي أنا بالدقّ بصوت مسموعٍ في أرجاء القاعة) من الساعة كام للساعة كام ؟
- (و لا زالت في البكاء) كان معايا في الشقة من الساعة سبعة تقريباً لحد إحداشر و نص تقريباً.
- علاء (صارخاً) - آه والله! آه والله! الله اكبر! الله اكبر!

القاضي - أَسكت يا علاء.

أحمد - أشهد أن لا اله الا الله! آدى يا ريس مكان وجود المتهم وقت ارتكاب الجريمة، آدى الحجة اللي ماكانش عايز يقولها من الأول حفاظاً على سمعة المدام، آدى المكان اللي النيابة أصلاً مقتنعش بيه.

القاضي - يا نسمة يعني إنتِ بتقولي إن في الوقت ده كان معاكي في الشقة؟

نسمة - حصل.

القاضي - و ليه أنكرتي لما إتسألتي في التحقيق؟

- خُفت من الفضيحة.

القاضي - خفتي من الفضيحة ؟ إنتِ عارفة إن كده هتتوجه ليك تهمة يمين كاذب، و جوزك يقدر يرفع عليك قضية بشهادتك ؟ دي قضية زنا.

أحمد - خفتي من الفضيحة وماخفتيش من ربنا، و لا من حبل المشنقة اللي بتلفيه حوالين علاء؟

نظرت إلى علاء في هذه اللحظة، كان وقتها يبكي و يحمد الله كثيراً، و يقبل يديه، فها هو دليل براءة أتى إليه في وقتٍ لم أتوقع فيه وجود هذا الدليل.

القاضي - أستاذ أحمد عايز الشاهدة في شيء تاني ؟

- لا يا أفندم تقدر تنصرف.

- طيب يا أستاذ أحمد إتفضل مش هتقول المرافعة النهائية؟ يلا إتفضل.

كانت جميع أعين من بالقاعه تنظر إلي، و أنا أنظر نظرةً أخيرةً إلى
عده نقاط في أوراقى، سأعتمد عليها في مرافعتى النهائية، كنت أول الأمر
أحسد رجل النيابة على قدرته على تذكر الأحداث و روايتها.

قمت من مجلسى و أنا أقرأ آية الكرسي، وأرددها، و كانت آية
الكرسى فقط

حضرات السادة المستشارين ، لن استطيع أن أقف هنا و أتفوّه بنفس
الكلمات الرنانة التي افتتح بها زميلي ممثل الإدعاء في بداية جلسات هذه
القضية فأنا لن أبلغ وجاهة رأي وسداد حجة و بلاغة زميلي، لذا فسأحاول
أن ألخص حديثي في هذه القضية، مقدماً وقائع وَصَلت إلى ذهن
المحكمة.

بدايه أودُّ أن أشير إلى أن النيابة لم تتحرّر الدقة نهائياً في هذه القضية،
و كان اتهامها لموكلي بناءً على أدلة قدمتها الشرطة، و لم يتسع وقتها
لتحري الاتهام الذي قد يودي بموكلي إلى حبل المشنقة.

أقامت النيابة اتهامها على ثلاث محاور رئيسية، سأحاول تفنيدها
لحضراتكم

المحور الاول، حضرات المستشارين، يقوم على أساس اعتراف المتّهم
بقتله المجنى عليها لشكه المستديم في سلوكها و الاستفادة من وثيقة
التأمين المبرمة بينهما، و التى تبلغ قيمتها حوالي مليون جنيه، و هذا

كنتيجةً لتحريات المباحث المغلوطة في هذا الشأن والتي اعتمدت عليها النيابة في توجيه الاتهام كليةً؛

أما المحور الثاني، يقوم على أساس وجود بصماتٍ على أداة الجريمة والتي وُجدت بجوار الجثة؛

أما المحور الثالث و الأخير، يقوم على أساس عدم وجود دليل إثبات يؤكد وجود المتهم في مكان آخر وقت ارتكاب الجريمة.

فبدائيةً يا سيدي الرئيس، تبنت النيابة الاتهام كنتيجةً للاعتراف الذي قدّمته المباحث لها على طبقٍ من فضة، و التحريات التي قامت بها المباحث السابقة كانت بمعرفة السيد ياسر بك رئيس المباحث، وقد تبين أن هناك تعسفٌ في استخدام الحق من رئيس وحدة المباحث كنتيجةً لوجود علاقةٍ سابقةٍ بينهم و الأمر الذي يلغي جميع الخطوات التعسفية التي قام بها من أجل إلصاق التهمة بموكلي، وقتها لم يكن لديّ أي دليل ملموس على استخدام التعذيب مع موكلي، و إجباره على الاعتراف بالصورة السابقة، و عند إثارتي لموضوع التعذيب حولت النيابة موكلي للطب الشرعي بعد أن زالت آثار التعذيب و إلى أن تمّ إيجاد الدليل الدامغ، و الذي يثبت أن رئيس المباحث كان ينتوي إلصاق التهمة بأي شكلٍ بموكلي، و ذلك باكتشاف التقرير الطبيّ الفرعي الصادر من الطب الشرعي والذي ثبت به من الطبيب الشرعيّ المختص بتشريح الجثة، عدم تطابق عينه الشعر المنزوع من أظافر المجني عليها مع عينة شعر موكلي، و الذي كان من المفترض إرفاقه هذا كتقريرٍ فرعي مع التقرير النهائي للتشريح، إلا أنه عند ورود التقرير لسيادته كان ضدّ رغبته، فما كان عليه

إلا أن يعدم هذا التقرير، و عند سؤاله في بداية الأمر أنكر تماماً مثل هذا التقرير بالصورة التي رأيتموها.

أما الشق الثاني من المحور الأول و الذي تقول فيه النيابة أن المتهم أقدم على جريمته لشكّه في سلوك زوجته و أنه قام بقتلها ليستفيد أيضاً من وثيقة التأمين، يعنى إيه يا ريس ؟ هو قتلها عشان شاكك في سلوكها و الا عشان عايز يورثها و يستفاد من بوليصة التأمين ؟ لو عشان شاكك في سلوكها مفيش أي دليل على سوء سلوك المجنى عليها و إذا كان الإعتماد على شويه اتصالات بين رامي زميل موكلي و بينها فعلاء نفسه مكنش عنده أي علم، أما القول بإرث وثيقة التأمين إزاي ؟ يا ريس دي ورقة مقدّمة من شركة التأمين نفسها بتبين الشروط الموقع عليها من الطرفين، و لو قرينا يا ريس البند رقم عشرة اللي أنا معلّم عليه باللون الاحمر، بيقول فيه (و لابد من مرور فترة لا تقلّ عن أربع وعشرون شهراً لاستحقاق أحد الطرفين للوثيقة و التي تؤول تلقائياً له بوفاة الطرف الآخر ما لم تكن الوفاة نتيجةً للانتحار أو بصورة جنائية قد يُتّهم فيها الطرف الآخر ما لم تبرأه المحكمة بحكم باتٍ نهائياً).

و آدي نموذج التوقيع مبين فيه توقيع علاء و رضوى، و البوليصة دي اتعملت من ست شهور، و بالتالي فإن علاء لا يستحق أي مليم من قيمة الوثيقة برضه. يا ريس يعنى علاء ماكانش عارف إن الشرط ده كمان موجود و اللي هو ماضي عليه؟ فإزاي يفكر إنه يقتلها عشان يستفاد من الوصية على الرغم من علمه مسبقاً بوجود الشرط اللي يلغي أي وراث ؟

وبكدة يا حضرات المستشارين يتلغي المحور الأول من أساسه سواءً من حيث قيام التحريات على أساس شكه في سلوكها أو الحصول على قيمة وثيقة التأمين.

أما المحور الثاني هيقوم يا ريس على أساس إن أداة الجريمة موجود عليها بصمات المتهم والنقطة دي يا حضرات المستشارين، أرجو أن يتسع لها صدر المحكمة والنيابة، لأن النقطة دي عايزة شرح بالتفصيل؛

هنفترض إن المتهم قام فعلاً بقتل المجني عليها، وترتيب كل الحاجات المتناقضة الصغيرة في القضية و مش هناقشها دلوقت، يعني يا ريس يقدر يعمل و يخفي كل التفاصيل دي و ميقدرش يخفي أداة الجريمة، مع علمه إن أداة الجريمة دي هي اللي عليها بصماته، وفي الوقت ذاته اللي اثبت الطب الشرعي عدم وجود أي بصمة للمتهم داخل السيارة مسرح الجريمة، يعني عمل كل ده و لما جه يموتها بالسكين، يقوم يقلع الجوانتي اللي كان لابسه طول الوقت و يسيب بصماته على السكين؟ لأ ويسيب السكينة نفسها اللي عليها بصماته جنب الجثة!!!! و بالفرض إن المتهم بالغباء ده و نسي السكين اللي عليها بصماته و هتوديه المشنقة ، إيه موضوع حكاية النصل الثاني دي ؟ ودي ياريس نقطة دائماً كانت النيابة بتفضل عدم الخوض في تفصيلاتها، حسب كلام الطبيب الشرعي قال إن أغلب الظن إن الجريمة ارتكبت بسلاحين لأن هناك نوعين من الجراح جرحين بعمق أحد عشر سم وبعرض اثنين سم، دول كانوا قاتلين، ثم جروح ثانية بنفس العرض بتاع الأداة الأولى و لكن بعمق مختلف، حوالي ثلاثه عشر سم و لكن تم الطعن بعد مرور فترة من الوفاة، قدّرت بحوالي عشر دقائق، طب ليه؟ يعني إن فيه حد فعلاً بيحاول إلصاق التهمة بموكلي

فحصل إنه قتل المجني عليها بسلاح آخر، و كان أقل من طول النصل الثاني، يعنى قتلها بالنصل الأول ومخدش باله من فرق الطول وبعدين أخرج السلاح الثاني و اللي عليه بصمات علاء و يطعننها بيه بعد مرور عشر دقائق من الوفاة أصلاً، وده باين من تقرير الطب الشرعي اللي أثبت عدم وجود نزيف مكان الطعن، يعني بعد ما ماتت، أما ليه طعننها أصلاً فتقريباً كان بيتأكد من موتها ودا الى اشك فيه او عشان دم الضحية يكون موجود على السكين الى هيبقي عليه بصمات علاء ودا المرجح وبعدين وضع السكين ده جنب جثتها و ده اللي المفروض إن بصمات علاء عليه تمام....

أظن مفيش متهم بالغباء ده يا ريس، إلا إذا كان شخص بيتعمد إصاق التهمة بشخص آخر، شخص كان على علاقة ما بالمجني عليها، أي علاقة، و العلاقة دي هي اللي خلته يستدرجها بأي شكل و بأي صورة، للخروج معه يوم الجريمة وقد كان، و في الطريق لمكان ما، يرتكب الجريمة، و تحصل المقاومة بينهم و الدليل موجود في أظافر يد المجني عليها، إلى أثبت الطب الشرعي أنها لا تنتمي للمتهم يا ريس، و بعد المشادة اللي حصلت بينهم، قام الجاني بطعن المجني عليها بالسكين، بالصورة اللي أوضححتها لمعاليكم و بعدين يأتي السكين اللي عليه بصمات علاء و بالتالي كل الأدلة هتشير إلى علاء ، إلا إن الجاني ارتكب خطأ كشف عنه دون أن يقصد أثناء المشادة اللي حصلت بينهم يا حضرات المستشارين، هي وقوع حبوب من جيب الجاني وقت العراك، حبوب يستخدمها بصورة مستمرة، الحبوب دي من دوا اسمه إيزوربيد، لعلاج حالة من حالات أمراض القلب، المهم إنه مشعرش إن الحبوب دي وقعت منه، أو حسّ إنها وقعت منه في مكان ما و بيدور في كل أنحاء مسرح

الجريمة، و الشخص ده أنا شفته بنفسه تاني يوم الجريمة و هو بيحوم
حوالين منزل الضحية...

القاضي (مقاطعاً) - أستاذ أحمد لاحظ إن كلامك ده توجيه صريح
بالإتهام

- أيوة يا ريس و للأسف اللي بتهمه مش موجود حالياً عشان كنت
أواجهه...

النيابة (مقاطعاً) - مينفعش يوجه إتهام يا سيادة القاضي.

أحمد - هو إيه اللي مينفعش ؟ و إنت بتعترض على إيه ؟ خلي النيابة
تسير في الإتجاه الصحيح و هتلاقي إن كل الأدلة هتشير إلى إتهام فرد
واحد، هو اللي يقدر يخش شقة علاء، هو اللي يقدر يكون على علاقة
بالمجني عليها بصورة ما، هو اللي مكنش موجود ساعة ارتكاب الجريمة،
هو الوحيد اللي بيتعالج بأدوية في القلب، ياريس كل الأدلة بتشير لإتهام
واحد بس، إن المهندس رامي هو اللي ارتكب الجريمة، وهو القاتل
الحقيقي وليس موكلي.

لذلك أرجو من هيئة المحكمة الموقرة إصدار أمر بتفتيش منزل رامي و
أخذ عينة من شعره و عينة من دمه لمعرفة هل إيزوربيد يتناوله كدواء والا
لا؟

القاضي - هحيل الأمر للمباحث و أرجو أن يكون هناك نتائج إيجابية
و الا إنت هتبقي متهم بالبلاغ والإتهام الكاذب، هل عندك كلام تاني؟

- طبعاً يا ريس عندي المحور التالت كله، و ده المهم في كلامي وهو
دفع النيابة لإتهام موكلي على أساس عدم قيامه بإثبات مكان تواجده وقت

ارتكاب الجريمة، في الوقت اللي انكر في الاول بالعلاقه دى لكن بعد كده اعترف أمام النيابة بوجود علاقة مع واحدة، وكان على علاقة مشبوهة بيها يعني، و العلاقة دي كانت السبب في إنكارها خوفاً من الفضيحة، و بالتالي هي أنكرت على طول الخط، لكن بوجود دليل فعلي على وجود مثل هذه العلاقة المتمثل في وجود ما يثبت قضاء أسبوع الأجازة اللي قضوه سوا في الغردقة، و انهيارها لما إتفاجئت بوجود الدليل، و إعرافها بوجود تلك العلاقة، و إعرافها بميعاد وجوده عندها بالتفصيل، و بالتالي يكون اعتماد النيابة على هذا المحور باطل كسابق المحاور.

بكدة يا حضرات المستشارين تكون المحاور الثلاثة والتي إعتمدت عليها النيابة في إتهام موكلي تكون قد إنتفت نهائياً، و عدم وجود أي منها بالصورة المعتمدة الذي قدّمته النيابة، مع وجود التقرير المثبت فيه عدم تطابق عينة الشعر، مع وجود المتهم في مكان آخر غير مكان الجريمة، فألتمس من المحكمة الإفراج عن موكلي بدون أي ضمانات.

القاضي - الحكم بعد المداولة.

توجّهتُ في هدوء لأطمئن علاء، و جلست في المكان المخصّص لي، لم أكن أتصوّر أن لدي القدرة على ارتجال كلماتٍ لمدة نصف ساعةٍ من الحديث المتواصل، نعم نصف ساعة! ظللت أتحدّث فيها دون النظر إلى أي أوراق، هل معقولٌ أن نصف ساعةٍ فقط من الحديث المتواصل قد تنقذ بريئاً من حبل المشنقة الذي كاد أن يلوح في الافق؟ كنت أجاهد ألا تكون هناك أيّ نقطةٍ قد نسيتها، وحمدت الله كثيراً على أن كلّ ما يجول بخاطري قد تحدثت به، حتى اتهامي لرامي؛ كنت قد شعرت أنني سوف ألوم نفسي لأن هذا ليس مكان اتهام أحدٍ بعينه، فالمفترض فقط أن أدافع

عن موكلي و ليس فعلا اتهام شخصٍ ما، ولكن بتلك الصورة كنت أرجو ألا يرتبط حكم المحكمة بتلك، كنت أنا الذي أنتظر الحكم أكثر من علاء لأسبابٍ كثيرة، كنت أحاول أن أثبت لنفسي أنه لا زال هناك خير، و أن الشر مهما طال وقته، فإن الخير هو الذي سوف يسود في النهاية، كنت أردّد جميع الآيات التي أحفظها، كنت فقط أحاول أن.....

محكمة (إستفقت من تأملاتي على صوت الحاجب ودخول هيئة المحكمة لتتطرق بالحكم).

القاضي - تؤجل القضية لجلسة السبت القادم للنطق بالحكم، مع متابعة النيابة و بكل دقة تحريات المباحث بشأن الوقائع المذكورة على لسان الدفاع و تقديم النتائج والتقارير الطبية قبل ميعاد الجلسة. رُفعت الجلسة.

اندهشت كثيراً لهذا الحكم، فقد ربطت المحكمة - كما كنت أخشى - براءة علاء بإدانة رامي، و كأن كل ما قدمته من دلائل و براهين لا يشير بال المحكمة إلا ما يتعلق برامي فقط، كنت أنا المخطئ، فلم يكن من المفترض أن أتهمه صراحةً.

كانت الأيام تمر سريعاً، فكل يوم كنت أنتظر نتيجة البحث وتفتيش شقة رامي، والحصول على عينة من دمه وشعره.

ولم أكد أسمع خبر إيجاد بعض المشغولات الذهبية في شقة رامي مخبأة في مكان ما، و تعرّف علاء على نوعية هذه المشغولات أنها تخص

زوجته، حتى كنت أسعد الناس في ذاك الوقت، كنت أشعر ان البراءة تدنو بعد خطوات .

لكن ما جرى بعد ذلك بيوم لم يكن أبداً في الحسبان، فقد فوجئت بخبر أحزنى وهو وفاة رامي داخل القسم بعد احتجازه وتوجيه الاتهام إليه رسمياً بقتل رضوى، لوجود المشغولات الذهبية، ففاجأته أزمةٌ قلبية، نُقل على أثرها للمستشفى، إلا أنه توفي قبل أن يصل إليها رغماً عن المحاولات التي جرت لإنقاذه؛ كان الله رحيماً به، إذ أثر له الموت قبل أن يصل إلى مرحلة انتظار حبل المشنقة.

ذهبت يومها لأطلع على التحقيقات التي جرت معه قبل الوفاة، كان مصراً على الإنكار بكل الصور، و لكن بعد تفتيش بيته و وجود المشغولات الذهبية أجمته المفاجأة و لم ينطق، كان الذهول هو الجانب الأكبر من موقفه، و لم يمهل القدر لسمع نتيجة تقرير الطب الشرعي لتحليل شعره، فقد جاء التقرير مطابقاً تماماً للعينة المنزوعة بين أظافر القتيلة.

الله يرحمه.

النيابة - حضرات المستشارين، في بداية تقديم النيابة للجلسة الختامية لا أجد سوى تقديم التقارير المرفقة، و توضيح ما جرى خلال الأيام الماضية، فقد تم تفتيش منزل المهندس رامي، و تم العثور على عددٍ

من المشغولات الذهبية، ومرفقاً بالكشف نوعها ووزنها، تمّ إيجادهم في كيسٍ مخبأً أعلى الدولاب وقد تعرّف المتهم على تلك المشغولات، و أفاد بأنها تخصّ زوجته.

و أما بتحليل عينةٍ من شعر المتوفي المهندس رامي، و مطابقته بنوع الشعر المنزوع من أظافر القتيلة، وجدت أنها نفسُ العينة، مما يفيد بأنها لنفس الشخص،

وكذلك بتحليل دمّ المتوفي المهندس رامي، تم وجود آثار من دواء منظمٍ لضربات القلب إيزورييد، مطابقاً لنفس نوع الحبوب التي تمّ العثور عليها في السيارة مسرح الجريمة.
وشكراً سيادة الرئيس.

القاضي - الحكم بعد المداولة.

لم تحاول النيابة وقتها أن تبرأ علاء مثلاً، لم تتحدث عن تفسير نوع العلاقة بين رضوى و رامي رغم تفريغات الهواتف، كان رامي في نظري دوماً شخصاً شاكاً عصبياً، حتى لقائنا الأول ارتبك فيه دون أسباب، فحجة غيابه عن المصنع كانت مهترئة، كان عليه الذهاب سريعاً إلى رضوى و استدراجها بأيّ شكلٍ خارج الشقة و العودة سريعاً مرة أخرى للبحث عن الشيكات، و ربما رضوى نفسها هي من كانت تبحث عن الأوراق، لأنه ثبت عدم معرفتها بمكان مفتاح الخزنة، و كان ذلك هو سبب بعثرة الاشياء أيضاً و ربما لا، لا أدري، فوجود علاقةٍ بينهما بصورة ما أصبحت



سراً لا يعلمه إلا الله، ولتنزل رحمة الله عليهما، وربما سأجد متسعاً من الوقت في الأيام القادمة لأفسر كل تلك النقاط في ذهني.

الحاجب - محكمة

كتمتُ أنفاسي و جلست في المكان المخصص لي و أنا أدعو الله، و أدعو، و أدعو.....

القاضي - بعد الاطلاع على أوراق القضية، ومناقشه الشهود، و سماع مرافع الدفاع و ما تقدم به من دُفوع في المرافعة النهائية من شكوكٍ ثُبِتَتْ صحتها، و بسماع النيابة و تقديمها ما لديها من تقارير ونتائج تحريات وتقارير طبية تثبت بما لا يدعُ مجالاً للشك أن رامي هو من قام باستدراج المجني عليها خارج المنزل، و ارتكاب جريمته بالصورة الموضحة عليه ... لذا قرّرت المحكمة براءة المتهم علاء فريد الدسوقي و...

لم أسمع بقية الحكم، أو الأسباب، كنتُ فقط أسمع تصفيقاً في القاعة من حولي، كنت أسبح في بحرٍ من النّجاح، لأول مرّة في حياتي أصنعه بهذا الشكل، كانت عيناى متعلقتان بعلاء الذي ظلّ واجماً في عيوني أنا الآخر، كانت عيونه تفيض بالشكر .

أما أنا فالتقطتُ أنفاسي أخيراً.

بعد صدور الحكم بأسبوع كان علاء يجلس أمامي في مكتبي، و قد استردَّ جزءاً من عافيته، كان لا زال يقضي تلك الأيام عند بعض أقربائه لصدور قرارٍ من النيابة بعدم تمكينه من مسكنه، لأن فتحي سليم كانت الشقة باسم زوجته و ليست باسم رضوى، مما جعل علاء يدفع بالتزوير بعد ما أرسل اليه انذاراً بالطرد مما جعل النيابة تقرّر بعدم تمكينه من الشقة لحين الانتهاء من التحقيق في واقعة التزوير، و إن كنت قد تفاجأت بأن شقتهم ملكُ والدَة رضوى.

المهم إنني تلقيت عدة مكالمات هاتفية من أشخاص مختلفين منهم حاتم صديق و زوج المجنى عليها السابق، يهنئني على براءة علاء، وكذلك من مدام جينا، التي بدأت بوصلة السُّباب كالعادة لتشكو من غبائي المعتاد، وتترجاني أن أمر عليها في أقرب فرصة، و تشكو من قلبها و أنها تشعر أنها في أواخر أيام عمرها، المهم أنها كانت طول المكالمة تشكو وإن كنتُ قرّرتُ أنه يجب علي زيارتها في أقرب فرصة لمجرد الإطمئنان، أما ياسر، فقد تلقيت منه أغرب مكالمةٍ هاتفية، فقد كان التحقيق معه لا يزال مستمراً، و كان يتهمني بالتواطؤ مع علاء في تدمير مستقبله، و أنه لو رأى علاء في أي مكانٍ بعد ذلك سيقتله، وكلامٌ كثيرٌ لم آخذه في وقته على محمل الجدّ.

أما علاء فقد أكد لي أيضاً تلقيه مكالماتٍ تهديدٍ من ياسر بالقتل إذا ظهر العقد في أي وقت، إلا أنني أخبرته بأن يطمئن و لا يدع له بالاً.

علاء - تخيل بيفكرني و بيهددني بموضوع العقد اللي بدأت أنساه أصلاً!

أحمد - العقد ده سرّ لوحده يا علاء! و ربنا وحده اللي يعلم هو فين، و أنا لما جيت فتحت الخزانة ملحقتهش أعرف إذا كان موجود أصلاً و الا لأ،

إنت بتقولي إن رضوى ماكانتش في الفترة الأخيرة عارفة مكان المفتاح بتاع الخزنة و يجوز هي اللي قلبت البيت لما كان مقلوب، وكانت بتدور على المفتاح، و يجوز إنه كان معاها أصلاً وقت الجريمة، و يجوز أكثر إن رامي حصل على العقد ده وكان مستني عشان يبتزك إنت أو فتحي، و ياخذ اللي عايزة مقابل يسلمهولك، بس ده بيفرض حاجات كتير.

علاء - أنا لا عايز لا عقد ولا زفت، يشبعوا بيه، و لا عايز ميراث أديك خلصتلي كل أوراق الميراث من المرحومة و أديك شُفت كل اللي ورثته حوالي ٧٠ ألف جنيه، وطز في حته الأرض اللي مالهاش أصحاب و إن شاءالله ما طلع ليها أصحاب! فاكروا يا أحمد لما قُلت لك و أنا في الحبس لو ربنا قدر ليا الخروج هاخرج و أروح مكان بعيد أوي؟ محدش يعرفني فيه و لا أعرف حد و أبدأ حياة جديدة، يمكن أقدر أنسى المأساة اللي حصلت في حياتي! أنا مش عايز أي شيء من الدنيا، حتى الشقة اللي جمعت أحلى ذكريات بيني و بين رضوى، أنا هروح أتنازل عن موضوع التزوير و أخليه ياخذها، و الله ما عايز أي حاجه خلاص من الدنيا غير أي أمشي من هنا .

أحمد - طب و حته الارض ؟ سبب المشكلة اللي كانت بين رضوى وأهلها مصيرها إيه؟

علاء - معرفش و لا عايز أعرف، أحسن ، مش العقد سبب البلاوي دي كلها و سبب الخلافات اللي كانت بين رضوى و أهلها؟ أهو راح في ستين داهية، المهم أنا عايزك تاخذ إذن من النيابة إنني أروح ألمّ حاجاتي من الشقة، أهى شوية هدوم و أوراق شغل، وشوية ذكريات بيننا، تفتكر

الإذن ده هيطلع إيمتي؟ وعائز ادخل الشقه ضروري ، أنا مش طابق أقعد في البلد دي خلاص!

أحمد - يعني ممكن ثلاث، أربع أيام على الأكثر، معلىش أهي شوية إجراءات بسيطة؛ عارف يا علاء، مش القضية خلصت؟ إنما في شيء أنا مش مرتاحله عمال يغزني زي المسمار في دماغي، حاجة حصلت قدامي و مش فاهمها أو مش فاكرها، و لا عارف أنساها، عارف الشعور ده؟ و كل اما أجي أقرب منها، ألاقي نفسي ببعد.

علاء - حاجة زي إيه؟

أحمد- ما هو لو أنا عارف كنت قلت لك! أنا عائز أسألك سؤال من زمان بس خايف لا تزعل مني ، هو إنت جه عليك أي وقت، حسيت فيه إن فعلاً كان فيه علاقة بين رضوى و رامي، في أي وقت؟

علاء - تعرف يا أحمد أنا بهرب من السؤال ده ؟ مش عائز أحس إنها في أي وقت كانت بتتعمد خداعي، و رامي كل تصرفاته من وقت ما بطّلت أديله فلوس كانت مش مريحاني كان كل يوم يسأل عن تحركاتي، هعمل إيه بعد الشغل، و هروح فين، و أقابل مين ؟ ده غير المكالمات اللي إنت وضحتيها، والله أعلم كان إيه الغرض منها! و إذا كانت فيه حاجة مش مريحاك، أنا في مخي عشرات الحاجات اللي مش مفهومة، و أنا مش عائز أفكرهم، دلوقت الاتنين بين إيدين ربنا، هو اللي يحاسبهم، أنا زي ما قلت لك، أنا لا عائز حاجة منهم ولا من أي حد (و يهب واقفاً) أنا صراحة تعبتك معايا، و مهما قلت لك مش هقدر أوفيك حقك.

أحمد - شكر على إيه يا علاء إحنا اخوات.

بعد حصولي على إذن النيابة حاولت الاتصال بعلاء لأكثر من مرة دون جدوى كان هاتفه مغلقاً دوماً، وحتى الرقم الخاص بعمرته لم يرد أبداً رغم مرور أكثر من عشرة أيام على مجيئه لمكتبي، لذا قررت زيارة عمرته في المنيرة، وسؤالها عنه و الاطمئنان عليه، و بعد حوالي ساعة كنت أجلس في بهو منزلهم الواسع، كانت سيدة طيبة في أواخر الستينات في العمر هي زوجها، إستقبلوني بحفاوة بالغة عندما علموا أنني المحامي الخاص بعلاء، و أنا أصدقاء منذ الطفولة، ولكنني اندهشت من عدم معرفتهم بمكان علاء.

العمة - والله يا ابني إحنا كمان منعرفش عنه أي حاجة بقالنا أربع أو خمس أيام من ساعة ما ضابط اتصل بيه...

أحمد - ضابط ؟ ضابط مين ده؟ و اسمه إيه...

زوج العمة - ياسر.

أحمد - ياسر! و عايز إيه ده وكلمه ليه و...

زوج العمة (مقاطعاً) - كلمه يوم التلات اللي فات و قاله إنه عايزه بخصوص شيء جد في القضية ، ولازم يفوت عليه، وعلاء قالنا الكلمتين دول، أيوة كان يوم التلات؛ مش كدا يا حاجة؟

أحمد - وحاجة إيه اللي جدت في القضية؟ و ليه علاء مكلمنيش ما أنا عمال أتصل بيه بقالي أسبوع!

العمة - لأ ده كان يوم الاتنين، يوم ما كان علاء راجع من السفارة بعد ما خد التأشيرة، استنى أما أقوم أجيبلك الباسور (تقوم ببطء من على كرسي الصالون وتتجه إلى أحد غرف النوم مسترسلة) أصلى كنت هودّي



البدلة بتاعته تتنصف زي ما قالي لقيت الباسبور في جيبها قلت أشيله له
في أوضته...

أحمد - تأشيرة إيه ؟

زوج العمه - فرنسا، إن شاء الله علاء حاجر على طائرة يوم الأحد
الجاي .

العمة - أهو الباسبور يا ابني، شوف كده.

أحمد - ده كان يوم الاتنين يا حاجه! وبعدين!

زوج العمه - بعدين علاء قالي إنه هيفوت على الضابط ده تاني يوم،
ومن ساعتها مجاش، أنا قلت يمكن رجع بيته والنيابة سلمتهوله، كنا
عايزين نفوت عليه أصل تليفون بيته برضه بيرن ومحدث بيرد، إنت كنت
عايزه في إيه يا أستاذ أحمد؟

كانت عيناى في هذا الوقت مركزة على صورة لي تجمعني بعلاء وعدة
أصدقاء في المدرسة لا أتذكر في أي عام، و لكنها كانت حفلة
مدرسية، كانت الصورة في أعلى المكتبة، قمت من مجلسي لأتأمل هذه
الصورة في سعادة بالغة، بعض الذكريات القديمة، كنت أنا وعلاء و ياسر
ذاته كان في خلفيه الصورة، سبحان الله! كنا دائما نظنّ أنهما أخوان
لتقارب الشبه الشديد بينهما.

زوج العمه - ياه إنت كنت في الصورة دي يا أستاذ أحمد و الا إيه،
دي صورة علاء أيام ما كان في الإعدادي.

.....

أحمد - آه ذكريات جميلة فعلاً يا عمي! اه فعلا انا في الصورة دي بس شكلي اتغير ، أمال صورة إيه دي ؟ فرحه ؟ واشرت الى صورة بجوارها،

زوج العمّة مبتسماً - أيوة دي صورة زفافه على رضوى، كان معمول في طنطا.

أحمد - آه أصلي لا حضرت لا خطوبة ولا فرح (كانت الصورة بها وجوة سعيدة كثيرة كانت تجمع الأهل و أصحاب العروسين، ومنهم العمّة وزوجها، ولكن ضمن هذه الوجوه، لمحت وجهاً أكاد أعرفه، مين اللي في الصورة ده يا حاج و أشرت له إلى وجهٍ معين.

زوج العمّة - وريني كده، لا و النبي يا ابني ما أنا واخد بالي دول قرايب والدته.

أحمد - آه طيب، أصلي حسيت إني أعرف الوشّ ده (لا أدري لماذا يذكرني هذا الوجه بشخصٍ التقيت به في مكانٍ ما أو بشخصٍ ما...)

ودّعتُ العمّة وزوجها، و في الطريق تذكرت موضوع ياسر و طلب مقابلته لعلاء وعبثاً ضاعت محاولاتي للاتصال بياسر، هاتفه مغلقٌ أيضاً، تحدثت هاتفياً مع زميلٍ له في العمل، و لكنه لا يعلم أين ياسر منذ مساء الاثنين الماضي!!!

كان قلقي يزداد، كنت أشعر أن في الأمر مصيبةٌ ما قادمة، لا أدري متى تأتي ولكنها ستأتي حتماً، فكان اختفاء علاءٍ غير مفهوم، ولماذا يذهب إلى لقاء ياسر دون أن يخبرني! مع العلم أن ياسر في ذلك الوقت كان كالمسعود! وما الذي اكتشفه ياسر في القضية، بل و كيف أصلاً عاد إلى

العمل وهو موقوف عنه أصلاً لحين البت في القضية؟ و كيف يختفي و هو لديه ميعاد سفر يوم الأحد القادم؟

كانت كل تلك الهواجس تدور برأسي عندما أبصرت رجل شرطة كان ينتظري داخل مكثي، و يؤكد ضرورة مقابلي لرئيس المباحث الجديد، لأنه حاول لأكثر من مرة محادثتي هاتفياً و لكن هاتفي مغلق، كانت تربطني برئيس المباحث الجديد صداقةً وطيدة بعد مشاركتنا في إحدى القضايا السابقة، بدلت ملابسي و ذهبت معه لمقابلته.

انتظرت في مكتبه لاجتماعه مع مأمور القسم، كنت أحاول أن أتمالك أعصابي المتوترة أساساً منذ فترة، كنت أقنع نفسي بأنه ربما يكون هناك متهم ما يريدني أن أكون محاميه، أو أنها جلسته حوار عادية، كنت أشعر أن في الأمر نكبة ما و لكنني كنت أحاول فقط الكذب، ولكن التوتر والهواجس بلغت الحد من الجسامة الذي جعلني أقف مفزوعاً فجأة عند دخول عاصم بك رئيس المباحث، و قبل أن أحياه باغتته فجأة:

- خير يا عاصم بيه! علاء حصل له حاجة؟

- آسف يا أحمد إن استدعيتك بالشكل ده وبالطريقة دي، بس كنا مضطرين لكده لأنك الوحيد اللي تقدر تتعرف على الجثة، عشان أقفل المحضر.

- جثة !!!!!

- أيوة يا أستاذ أحمد جثة، للأسف لقينا عربية علاء متفحمة، وفيها جثة وبتشريحها اتضح أن علاء توفي مش من الحريق، ده مصاب بطلق ناري في مؤخرة رأسه.

- طلق ناري! لا حول ولا قوة الا باللهعلاء.... إزاي! ده كان معايا من أيام! وبدأت بالبكاء.

- شد حيلك يا أحمد، مش كده إهدا...

- إيه اللي حصل بالضبط؟

- إحنا عملنا تحريرات، و عرفنا من شهود إن علاء وصل تحت بيت ياسر يوم الاثنين حوالي الساعة خمسة و طلب من البواب إنه يطلع ينادي على ياسر و فعلاً طلع البواب و نزل ياسر و ركب العربية مع علاء.

- أنا كنت لسة جاي من عند قرايب علاء، و قالوا لي إن ياسر اتصل بيه وألح عليه إنه لازم يشوفه لأمر مهم جداً، ده كان مسافر خلاص و يسيب البلد بالي فيها! ليه بس ليه! أستغفر الله العظيم.

- بص، إحنا عملنا ضبط و إحضار لياسر لسؤاله عن الواقعة بس للأسف مش عارفين نعتز عليه في أي مكان من اللي كان بيتردد عليهم، ياسر كان زي المسعور من وقت إيقافه عن العمل، كلنا مستغربين إزاي ياسر يتحول لمجرم بالشكل ده!

- (و قد أخرجتُ منديلاً أمسح به ما تبقى من دموع) دلوقت إيه المطلوب مني؟

- (بتردد) تتعرف على الجثة، ده إجراء شكلي، إنت عارف عشان بس أقفل المحضر، إنت أقرب صديق له تقريباً و أنا معرفش طريق أهله و...

كنت على وشك القول بأني لا أستطيع مشاهدة علاء لآخر مرة بهذا الشكل إلا أنني تذكرت عمته و أحببت عدم وضعها في هذا المشهد، و لا أدرى كيف وقع الصدمة عليها.

.....

- (صارخاً) من فضلك أسكت، إرحمني، أنا مش ناقصك!

(و قد بدا محرجاً من صراخي) أنا متأسف إنت اللي سألت إيه اللي حصل تقريباً.

أخذني عاصم من يدي قائلاً - معلش يا دكتور إحنا جايين في مهمة بس، وعازينها تخلص، نسيب التفاصيل دي وقت تاني إن شاء الله، و أخذني من يدي إلى المكان الذي أشار إليه الطبيب بجثة علاء، و ما أن اقتربت منه حتى رفع عاصم الغطاء، و عندما اقتربت من الوجه، سقطت مغشياً علي...

مرّت فترة لا أعرف مدّتها كل ما أتذكره، وجه علاء مشوّء بالحريق و فجوة الرصاص بطريقة لن تجعلني أنام السنوات القادمة، كان وجهه محطماً ومتهتكاً بطريقة بشعة و آثار الحريق التهمت عيناه بشكلٍ مرعب.

- أيوة يا عاصم بك، ده علاء فريد الدسوقي، صديقي العزيز، و انخرطت مرةً أخرى في نوبة بكاءٍ لم تفلح محاولات عاصم ولا د. يحيي في إسكاتي هذه المرة.

عدتُ إلى منزلي مستسلماً لحالة الحزن التي تعصف بي لما جرت عليه الأحداث من صورةٍ هستيريةٍ خلال الأيام الماضية من وفاة علاء، و كيف أقدم ياسر على تلك الفعلة! كانت تصرفات ياسر دوماً محاولةً إصاق التهمة بعلاء، لماذا لم أتذكر وقت القضية أن ياسر هو ربما من ذهب إلى رضوى، و ما كان يفعل صباح الجمعة ؟ ولماذا أتت العينات متطابقة مع رامي هذه المرة و أين دور رامي في كل ذلك ولماذا وجم اثناء التحقيق



- قوم فزّ وتعالى بسرعة فاهم ؟ إنت مش هتبيض وتعرف المفاجأة....
- يا ستي مفاجأة إيه بس يا مدام جينا ؟ و النبي ده اسمه كلام
تصحيني الساعة اتنين عشان تقولي مفاجأة؟
- خلاص إنت الخسران! سلام، أنا غلطانة...
- (وقد بدأ الفضول يتسرب إليّ) إستني، إستني بس، هو مش
ممکن يعني تقولي لي المفاجأة دلوقت في التلفون، أو حتى أجيلك لما
الصبح يطلع؟
- لا مينفعش، ده...
- يا مدام جينا من فضلك! أنا تعبان نفسياً و لو تعرفي أنا كنت فين
كنت...
- (مقاطعةً) إنت هتقعد تشتكي لي! إنت جاي و الا مش جاي؟ لو
مش جاي خلاص إنت حر! متضيعش وقتي وما تتصلش تاني في انصاص
الليالي يا مجنون.
- و أغلقت المرأة المخبولة الهاتف في وجهي، لعنتها في سري وأسلمتُ
وجهي للنوم مرةً ثالثةً محاولاً اغماض و لو نصف عيني، ولكن الفضول
الذي قتل القط كالعادة دفعني لأن أرتدي ملابسي على عجل، ولكنني
أقسمت أنه لو كان أمراً تافهاً، أو أيّ خبلٍ منها، سوف أسمم لها قطّها،
وفعلاً ذهبتُ إلى المطبخ، و كان لدي ما تبقى من سمّ فئرانٍ كنت أضعه
بالمكتب، ووضعتّه في جيبي و صممت على التخلص من هذا القط الغبي
بأي صورة (عذراً فقد كان مجرد تهديد) نكايةً فقط في المرأة المختلة

- سييك من مين وايه وكلامك ده، في حرامي في شقه علاء.

- حرامي؟

- أيوة، أنا شفته طالع يتسحب و يبص حواليه، و لقيته بيحاول يفتح الشقة، و بقاله ساعة اللي إنت عمال ترغيلي فيها!

- طب بصي، أنا هطلع على طول على الشقة، مش هفوت عليك، أنا أصلاً معايا نسخة من المفتاح أخذته من النيابة، المهم إنت بلّغي البوليس ها! إتصلي بعاصم بيه رئيس المباحث الجديد، فاهماني؟ إتصلي بيه لأن آخر مكالمة في الكارت عملتها لحضرتك، ماتنسيش.

وأغلقت الهاتف في وجهي، ركنت السيارة في مكان قريب، و نزلت منها، ولكنني تذكرت ما حدث لي خلال نفس الزيارة السابقة، فرجعت إليها مرة أخرى لآخذ منها مفتاحاً كبيراً، و أمسكته وذهبتُ إلى المنزل، كنت أتمنى الاتصال بعاصم في هذا الوقت ولكن لا توجد أيّ محالٍ قريبة، وقفت أمام المنزل مستتراً بشجرة في الحديقة لمحت شبح جينا في النافذه تنتظري، كانت تنتظر وراء ستارة شفافة كنت أشعر أنها تنظر إلي، أشرت لها أن تبليغ الشرطة، و أتمنى أن تفهم ما أريد فأشرت لها بعلامة الاتصال مرة أخرى و لكنني فوجئت و هي ترجع خطوةً إلى الوراء فجأة كأنها فوجئت أنني أراها!!!!

نظرت إلى الجو المحيط، هذا المنزل كان مسرحاً لجريمة قتلٍ بشعة وكان شاهداً على أهم ساعه قبل الجريمة، و الشاهدة الوحيدة في القضية موجودة داخل هذا المنزل، و هي مختلة تماماً، أو هكذا تتظاهر! ولكنني استجمعت شجاعتي وصعدت السلم خطوةً وراء خطوة حتى وقفت أخيراً أمام شقة علاء، و بخفةٍ شديدة دسستُ المفتاح دون أن يصدر أيّ

صوت، و فتحت الباب، دلفت إلى الداخل بخفة، لم أعهد لها من قبل، لم تكن الأضواء مضاءة، انتظرت طويلاً، لم يصدر أي صوتٍ داخل الشقة، كان باب الشقة موارباً و عليه كنت أنظر إلى خيالات البهو والغرف، ما إن تأكدت من أنه لا يوجد أحد، أمسكت المفتاح بيدي و تقدمت إلى الأمام، وكأني تذكرت ما حدث لي عندما أوليت ظهري لباب الشقة، أغلقته و أصبحت الشقة في ظلام تام، أوليت ظهري للحائط حتى يكون خلافاً للمرة السابقة، و أصبحت يداي على المفتاح الحديدي، و أثناء بحثي عن مفتاح النور وجدت خيالي يتراقص على يمين فتحة الصالون من ضوء العمود خارج المنزل، تقدمت بخفة و نظرت إلى ضوء العمود الذي داخل الصالة، كنت أنظر في كافة الاتجاهات لكنني تعثرت فجأة، كدت أن أقع بسبب الأشياء المبعثرة على الأرض والتي كانت في حقيبة سفر رضوى، أوراق، أحذية، ملابس سوداء، شاحن موبيل....

فجأة دون أي سابق إنذار، هنا و في هذا الوضع و أنا جالسٌ تقريباً على الأرض دقّ كلّ شيءٍ في رأسي فجأةً، وبرزت أخيراً النقطة الغائبة عن خيالي، يا ربي! كيف فاتتني هذه النقطة ؟ لماذا هذا الخيط لم أتبينه ولم أسر وراءه ؟ يا ربي! هل كنت بهذا الغباء! نعم فهذه النقطة ... تفسّر لي كلّ شيء! كل شيء! يا ربي!.

وكما كانت هذه الزيارة تختلف عن سابقتها، فقد كان التسلسل أيضاً يختلف، ففي الظلام الذي يكتفني إلا من ضوءٍ يأتي متسرّباً من خارج المنزل، و على هذا الضوء الخافت، و من داخل الظلام أتت إليّ ضربة قاتلة هذه المرة، و من نفس المكان و لكن من أمامي، جعلتني أهبط إلى أسفل سافلين، فاقداً كل الوعي

كعادتني دوماً عندما يقدر الله لي أن أستفيق و لا أموت بسبب تلك الضربات، كنت ملقى على وجهي، بنفس المكان السابق، و دماءً تسيل من فمي ولا تزال كميةً من الدماء تنزف من مقدمة رأسي، كنت أشعر بهذا الطعم الحديدي داخل فمي، فربما كانت أجزاءً من مخي بلعتها من قوة الضربة، أو أجزاءً من لساني، أو أي شيءٍ لكنه مني.

كانت الدنيا لا تزال ظلاماً، كنت أخاف فقط من أن أكون قد فقدت الرؤية، حاولت أن أتذكر أين أنا، و كيف أتيت إلى هذا المكان، حتى تذكرت، حاولت أن أقوم لكنني وجدت نفسي للأسف مقيداً من يدي وقدمي، حاولت أن أتذكر ما النقطة التي كنت وصلت لها مرةً أخرى دون جدوى، فيبدو أن الضربة أفقدتني الذاكرة أيضاً من...

تذكرت تقريباً أين أنا، و فسّرت ما حدث لي، و كيف أتت بي هذه العجوز المختلة إلى هذا المكان، و بهذه الصورة، كيف فاتني أن تلك المرأة هي الشاهدة الوحيدة، و هي التي كانت تتحرك الأحداث من حولها دون أن يشك أي أحدٍ بها، كانت لديها تلك النظرة المجنونة، وهي أيضاً تملك تلك العصا، أكانت هذه هي النقطة التي كانت لديّ قبل أن أغيب عن الوعي؟ لا أتذكر، بدأت في السعال لتدخل فمي بعض قطرات الدم إلى مجرى تنفسي، لكنني توقفت عن السعال عندما انتبهت حواسي الخمس على صوتٍ اعرفه جيداً :

– إنت إتهبت فقت ؟

و إذ به يجرنني من ملابسني من الطريقة إلى كرسيّ الصالون دون أي مقاومةٍ تذكر مني، و أنا أكاد اصرخ من الألم من كل أجزاء جسدي، كان الجوّ مظلماً، و عندما أضاء النور أخيراً وقعت عيناي على آخر شخصٍ



توقّعت أن يكون أمامي، كنت أظن أنني سأرى العجوز وقد تحولت إلى رجل أو أجدها مع شريكها بالطبع.

ولكن ما وجدته فاق كل تخيلاتي و تصوراتي و أعاد لي ذاكرتي قبل الضربة و ما اكتشفته و ما وجدته ...

– علاء ؟

– إنت إيه اللي جابك هنا! ما القضية اتهببت وخلصت! حشرت نفسك تاني ليه ؟

– علاء ! إنت علاء بجد ؟

– أيوة زفت! إنت رجعت تاني ليه؟

(بذهول) – و لما إنت ممتش مين اللي اتعرفت عليه في المشرحة ده ؟
وإيه اللي إنت بتعمله ده ؟

لأول مرة أرى ملامح علاء و قد اختفت نظرة الضعف والإستكانه التي طالما رأيته فيها، لتحل محلها نظرة قوة و جبروت لم أعهدها في علاء، ولكنني عهدتها في شخص آخر، شخص آخر له نفس الملامح، و للمرة الأخيرة شعرتُ فعلاً بمدى تقارب ياسر وعلاء في الشكل بهذه الصورة، الأمر الذي جعلني أصرخ قائلاً:

– متقولش ياسر اللي اتعرفت عليه في المشرحة، و قلت إنه إنت!

– (بضحك) برافو عليك!

.....

- (عشاً حاولت أن أتخلص من قيدي دون جدوى) علاء! أنا مش فاهم حاجة أولاً، ثانياً إيه موضوع ياسر ؟ ثالثاً وده الأهم، إيه اللي خلاك أصلاً تعمل فيا كده إنت ناسي إني كنت السبب في برائك ؟ وإذا كنت ...

- (مقاطعاً) بطل دوشة! يعني كنت عايزني أعملك إيه ؟ آخذك بالحضن؟ أنا فعلاً كنت عايز أخلص عليك، و كنت هرميك في أي مصيبة، أنا مستغرب إنت إزاي لسة فيك الروح، بس لما لقيتك لسة بترفس قلت أسيبك لما تفوق، و بعدين أبقي أشوف هعمل فيك إيه.

- أنا مش فاهم كلامك! و إنت أساساً بتعمل إيه هنا ؟ إنت مش كنت عايز إذن نيابة عشان تيجي تاخذ حاجاتك؟ لازمتها إيه اللعبة دي كلها ؟

- إذن نيابة مين اللي هفضل مستنيه عشان أفتش في البيت! أنا مستعجل و كل ده كنت بلاعبك.

- أنا برضه مش فاهم، إنت عايز تفتش على إيه؟ و إيه اللي يستدعي السرعة دي كلها؟

- أنا بدور على الزفت العقد (و بدأ في النظر في أنحاء الصالة وكأنه لا زال يحلم بالعقد)

- آه العقد! و إنت قتلت ياسر بقى عشان العقد؟ ياسر أصلاً إيه علاقته بالموضوع؟

- أنا عملت كده عشان أولاً كان لازم انتقم، و ثانى حاجة عشان أختفي (و قد هدأ قليلاً و جلس أمامي على كرسيّ وكأننا أصدقاء، أو لا زلنا على الأقل، الأمر فقط يختلف بأني مقيد، أما هو فكان يلعب بأصابعه بكاتمٍ للصوت كان أمامه على المنضدة بجوار مسدس، مما جعلني أصاب

بالرعب، وبدأ الكابوس الذي طالما حلمت به يتحقق أمامي بالتفصيل، و أنا أزداد ألماً من توقع مصيري المحتوم (بص يا أحمد، أنا هريحك وهقولك على كل حاجة، عشان هتبقى آخر حاجة هتعرفها، و من حقك إنك تفهم، عارف ليه؟ عشان إنت أكبر حمار شفته في حياتي (و بدأ في الضحك بصورة هستيرية) كنت بلعب بيبك من الأول زي عروسة الماريونت، كنت بخليك تعمل اللي أنا عايزه بالضبط، و اخليك تمشي في نفس السكة اللي عايزك تمشي فيها بالضبط، كل شيء بحساب لأن أي غلطة كانت هتودي رقبتى للمشنقه بجد! كنت برميك الادلة واحدة، واحدة و في الوقت المناسب، و كنت واثق إنك هتدور كويس لأن ضميرك هيوجعك، هبخليك تتصرف عشان خايف عليا، و فعلاً إنت نجحت، مش عشان إنت ذكي أو بتفهم لا سمح الله! لأ عشان أنا كنت لاعبها صح و مسبتش ولو ذرة خطأ، في موضوع بفكر فيه من سنين ومش مرة ولا ألف مرة! أنا مخطط ومراجع تخطيطي ولا مليون مرة! لو كنت حسيت إنك هتفشل كنت هتدخل في الوقت المناسب و أبين لك أدلة تانية خالص.

- (مقاطعاً) يعنى إيه ؟ يعني إنت بتعترف إنك...

- أيوة! عليك نور، أنا فعلاً اللي قتلت رضوى، وحبكت الجريمة بالشكل المأساوي اللي إنت شفته ده.

- طب ورامي ؟ و الأدلة ، و تحاليل العينات؟

- رامي مجرد شخص يا أحمد، مجرد شخص غبي، وكان لازم ألزقها في حد غبي، طماع، واحد كل همه ياخد و يستلف فلوس، و أنا مفيش شيء بيني وبين رامي كشخص، حتى لو أي حد تاني حكمت الظروف إنه معايا في وردية الشغل كنت هعرف ألبسهاله، لكن رامي جابلي دليل على

طبق من فضة، و هو مرض القلب اللي هو فيه، و اللي بيخليه ياخذ دوا معين، أهو ظروفه جت كده هنعمل له إيه؟

- بس ده مات بسببك!

- طز يعني هو اللي على راسه ريشة؟ ما رضوى ماتت بسببي و ياسر كمان مات بسببي، و إنت هتحصلهم كمان شوية بسببي برضه، يا ابني كلنا هنموت في النهاية، ما الموت دائماً هيجيلك، هيجيلك مفيش هروب!

- و أنا مالي؟ أنا دخلي إيه بس؟

- دخلك إنك حشري.

- طب ممكن تفهمني عشان أرتاح، وبعد كده نتكلم في عملانك فيا

ده

- بص يا أحمد، أنا ما انكرش و إنت عارف إني حبيت رضوى حب متقدرش تتخيله، و يمكن حبيتها أكثر من أي حد حبها في الدنيا، حتى بعد أما سابتني بغاءها و إتجوزت حاتم ده، عارف كنت دايمًا بتابع أخبارها من بعيد لبعيد، كنت بحاول أوصل ليها أو أطمئن عليها لحد أما عرفت إنها إتطلقت بسبب إنها مبتخلفش، تعرف، عملت المستحيل عشان أوصل ليها، و وصلت، وحسستها إني لسه بحبها وهيا كمان اقتنعت، وحست بكدة لأني ما كنتش بكذب عليها، والحمد لله اتجوزنا، لكن اتفاجئت إنها شخصية فعلاً مختلفة بعد الجواز، كانت عصبية جداً و أوقات كثير كانت بتفكرني بجوزها الاولاني، و تحط مقارنة بيني وبينه بطريقة بايخة، و بكون أنا دايمًا الخسران، و إنها ندمت إنها إتطلقت مع

إنها اترمت زى الكلبة برا شقته باليل، لكن دايمًا كانت بتتمنى إنها تفضل معاه ومتطلقش، عارف، الحب ليها اتحول لكره مالوش حدود، كل كلامها ليا كان بيدبحني، و حاولت أفهمها مفيش فايده، بقت معقدة بسبب إستحالة حملها، بقت شبه مجنونة لدرجة إنها قاطعت أمها رغم إني والله يا ابني كنت أنا اللي بحاول أصلح بينهم بس عشان الجو المشحون ده، أنا كمان بدأت أبقي عصبي جداً، مرة اتفاجأت إنها شايلة كرت فيه تليفونات حاتم، كرهتها أكثر من الأول! حسيت إني لازم أنتقم منها، لأنها متستاهلش ذرة من حبي واحترامي ليها، كان ممكن أطلقها و خلاص، لكن قررت فعلاً إني أخلص منها في أقرب فرصة أما سمعتها بتكلمه وتقول له إنها ندمانة على جوازها مني، و نفسها تتطلق في أقرب فرصة، كلام زي ده كثير حتى كانت بتقوله لسهى زميلتها، كان لازم أعلمها معنى الذل، لكن إزاي؟ فضلت أخطط بكل بطء و أحاول أنتهز كل الفرص و أخرج من الموضوع ده بأكبر الفوائد، منها على الأقل، يبقى تعويض نفسي عن القرف اللي شفته، فكرت إزاي لو اتخلصت منها أشيل الشك من حواليا، فكرت إننا نعمل وثيقه تأمين هستحق بعد سنتين، و قبل السنتين كان لازم أتخلص منها، عشان مستحقش الوثيقة طبقاً لشروطها، و بكدة يبقى مفيش دافع و ده اللي إنت فعلاً نجحت في إثباته، عارف، أنا كنت موافق أطلع برصيدها المتواضع في البنك و أسكت لحدأما جه موضوع الأرض، راجعت التفكير تاني، و تالت، و عاشر، و إزاي أخطط لكل حركة، ومش ليا لوحدي، إزاي أخطط لكل طرف في المسرحية، و كل منهم له دور مكتوب يمشي عليه بحذافيه، دور بالملي، محدش يخرج لا يمين ولا شمال، كلنا كنا بنمثل مسرحية أدوارها مكتوبة بدقة متناهية، أى نشاز كانت نتايجها هتبقى فادحة! وقتها بدأ تفكيري في رامي، نفس المواصفات

اللي بحلم بيها: طماع، إنتهازي، كان كل همّه الفلوس، و مديون لشوشته؛ بدأت أدخله البيت و أعرفه على رضوى، عارف، كنت دائماً لما بسلفه فلوس، كنت بعمل نفسي بهزر و أقوله هات موبيلك بقى أتكلم منه و أكلم رضوى، كنت عامل حسابي على يوم زي ده، أما تتفرغ المكالمات، و كنت بتصل برضوى كثير، و أطلب منها إنها تتصل بيا ساعة معينة على تليفونه، بحجة إن موبيلي هيفصل شحن، و ده اللي كترت منه في الأسابيع الأخيرة، و مرة كان نايم كعادته في الشغل أخذت مفاتيحه، و عملت نسخة من كل المفاتيح، و أهمهم مفتاح شقته ومفتاح دولابه في الشغل، و طبعاً سرقت من دولابه حبتين من الدوا بتاعه احتياطي عشان كنت متأكد أنني هعوزهم في الأيام الجاية وتمهيداً لأولى خطوات الجريمة.

- يوم ما سافرت طنطا.

- صراحةً أنا مكنتش أحلم إن اليوم ده يمشي زي التخطيط اللي أنا عامله، كان مناسب من كل ناحية، رامي هيبقى وحده في الشغل و كان مُعتمد عليا إنني أروح عشان يسيبنى كعادته ويخرج يشوف ماتش كان هيشغل يوميهها، كان لازم أخليه يروح الشغل بأي شكل.

- عشان كده إنت إتصلت من طنطا و طلبت من رضا تقوله إنك فعلاً مش جاي و لازم رامي يروح، و إنك مش عارف تتصل برامي بحجة إن موبيلك مقفول ومعكش رقم موبيله بعكس رقم الشغل اللي إنت حافظه.

- برافو عليك! (يعاود ضحكته الهيستيرية، مما أصابني بالرعب أكثر من توقّع مصيري المحتوم) كلمت رضا من تليفون من طنطا وقلت له يبلغ رامي يعملني أجازة، و لازم يروح الشغل النهاردة لظروف تعب حماتي، ويمكن يبقى يوم أو اتنين، و فعلاً قلت له موبيلي اتقفّل و أنا كنت حافظ

بس رقم الشغل و كان رضا موجود وقتها، و بعد دقائق إتصلت برضوى وطلبت منها إنها تتصل برامي وتقوله يعمل لي أجازة، عشان مش هينفع أرجع مصر يومها لأن والدتها تعبانة جداً، و إني بتصل برقم رامي تليفونه مقفول و موبيلها هيفصل شحن، موبيلها اللي كنت واخده منها، متنساش إني واخد موبيلها، و طبعا كانت مسجلة رقم رامي على الموبيل و عندنا في البيت

- (صارخاً) أيوة! أيوة! أيوة! هي دي النقطة اللي افكرتها وكانت مدوخاني كنت دائماً بحس إن فيه شيء مش في مكانه، حاجة شفتها في محتويات شنطة السفر، حاجة مش مكانها أصلاً.

- مش فاهم تقصد إيه ؟ حاجة إيه ؟

- الشاحن.

- إنت هتخرف يا أحمد ؟ شاحن إيه ؟

- قد إيه فعلاً أنا حمار! المفروض إن رضوى مكش معاها موبيل لأنه كان معاك، و بالفرض إنها هتهرب و هتسيب البيت، و لا هتشوفك تاني ولا حتى هتشوف موبيلها، يبقى إيه اللي هيخليها وهي بتلم هدومها في شنطة السفر إنها تدور على الشاحن و تحطه و تاخده معاها؟ ماهو مالوش لزوم إنها تشيله إلا إذا كانت حاطة في دماغها إنها هتشوفك، و إنك اللي كنت معاها ! لأن موبيلها اللي معاك هيفصل شحن زي ما قلت ليها، كان لازم تدور على الشاحن وتاخده معاها، و شالته في شنطة السفر بعكس مثلاً لو لقينا الشاحن في شنطة الإيد اللي ممكن يكون كان هناك تلقائي، فاهم ؟ دورت وجابته معاها عارف ليه ؟ لأنك إنت اللي كنت في العربية، أيوة كده صح! كده كل شيء بدأ يتفسر قدامي، و بدأت أفهم النقطة دي

لما شفت الشاحن مرمي على الأرض، أول ما شفته عرفت و افكرت
النقطة دي قبل ما تهفني على راسي.

- شاحن ؟ تصدق فاتت عليا النقطة دي خالص! و لا أخذت بالي
منها.

- طب مش مهم يا علاء، كمل بس كمل.

- المهم سافرت على طنطا، وقابلت فتحي سليم، و لما صحيت تاني
يوم الصبح مكانش في البيت، قررت إن اليوم هو أنسب ميعاد لتنفيذ
الجريمة، راجعت كل خطوة، كلمت رضا، و بعدين كلمت رضوى كنت
هادي جداً يومئها، تصدق إني قمت عملت شاي، و وقتها كلمت نسمة.

- نسمة ؟

- آه كلمتها (بضحك) أيوة كلمتها و اتفقنا سوا، دي قريبتى يا
مغفل!

- أيوة! أيوة! صح هي صاحبة الوش اللي شفته في صور فرحك عند
عمتك وفضلت أقول الوش ده شفته فين؟ فين؟ هي فعلاً بس كانت أصغر
و أرفع؛ أنا فعلاً غبي!

- ده أمر مفروغ منه ، إتصلت بيها من عند فتحي تحسباً لأى شيء
وأهو دليل إثبات، كنت مديها فكرة عن الموضوع هي و جوزها و كان
لازم إن يكون قدامي دليل إثبات قوي على إني موجود عند حد، ولقيت
نسمة أنسب الناس اللي ممكن أثق فيها للدرجة دي، مش عشان قريبتى
بس، عشان مبلغ محترم جداً جداً ليها هي و جوزها، اللي هيشاركنا
التمثيلية دي كلها؛ على فكرة نسمة دي محترمة جداً وزى أختي و متربين

أنا وهي و جوزها من صغرنا، ضحت بسمعتها عشاني، كانوا رافضين الموضوع من الأول لكن زي ما قلت لك، المبلغ الكبير هيامن لهم مستقبل مكنوش يحلموا بيه، و أهى مشيت تمثيلة الطلاق، وبرضه أنا مخططها عشان السبكة، و دلوقت رجعوا لبعض وسابوا مصر كلها، تعرف، بدأت الموضوع من فترة مع رضوى اللي كانت مستعدة تشك فيا وخلاص، و أنا نمّيت الشك ده، و ختمتها بالحجز في فندق في الغردقة في شم النسيم اللي فات و حجزت هناك فعلاً بس مش غرفتين بس أنا كنت حاجز ثلاثة ، أنا وهي وجوزها لكن بإسمه هو كان الحجز، لكن سبت ورقة الحجز المتصورة باسمي أنا ونسمة بس فاهم؟ عارف لما وصلنا في المرحلة دي في القضية كنت بدعي طول الوقت إن سهى تجيب سيرة إن رضوى قالت لها على موضوع إننا قضينا اسبوع في الغردقة و أهو دليل يثبت على العلاقة اللي بينى وبين نسمة، و لو كان حصل و ما قالتوش، أنا كنت هنهار قدامك -في تمثيلية طبعاً- واعترفلك على الحقيقه كلها وأقولك إنى افكرت إنى قضيت معاها أسبوع في الغردقة بس في الوقت اللي أحس إن الموضوع دخل في الخطر.... ما أنا بقولك كل خطوة فكرت فيها، كنت بفكر في السوء الأول، و بحط احتمالات للنجاة، وبفترض الأحسن مع برضه احتمالات الفشل، المهم طبعاً كان لازم على نسمة إنها تنكر في الأول أشد الإنكار و تسبّ و تلعن، و تتكلم عن رد شرفها، مرة، و اتنين، و ثلاثة، لدرجة إنكم تصدقوا و تقتنعوا بكلامها مليون في المية، وخصوصاً لما تبين صور الشيكات اللي معاها، إنها كانت علاقة عمل، و فعلاً كان الموضوع يتعلق بصفقه لاب توب وزعته على بعض المعارف، وكتبت لها شيكات على نفس الفرع اللي فيه سهى عشان تبليغ رضوى على موضوع الشيكات، و رضوى طبعاً بلعت الطعم و

إتأكدت أكثر من حكاية أسبوع الفسحة إن فيه علاقة بيني وبين نسمة، وقتها الشك هينقلب ليقين، كنت بتعمد أوقات أخليها تتصنط، و كنت بعرف إنها بتتصنط على المكالمات اللي بيني وبين نسمة، و طبعاً ما أقولكش كنا بنقول إيه، و بعد الإنكار و الجهد في القسم و النيابة والمحكمة بعدين يا سهى تفكر، يا أما أنا اللي أقولك على موضوع الغردقة، و لما نوصل للنقطة دي، و تكتشف نسمة إننا فعلاً اتقفشنا تنهار تدريجياً و تعترف، وقتها الكل هيقتنع إن كل الكلام بتاعها ده كذب، و انها بتداري عشان الفضيحة، و لما تقول إني فعلاً كنت عندها وقتها، النيابة نفسها هتقتنع، لأنها أنكرت بنفسها في الأول، وخصوصاً لما التحريات هتثبت أصلاً عن أسبوع الغردقة لما تسأل الفندق.

- الله يخرب بيوتكم! إنتو إيه شياطين؟ المهم كلمت نيلة نسمة وبعدين؟

- غيرت هدومي، و كنت مستولي على عربية، ما تقولش سارقها قول بس كان لازم أستولي على عربية ميكروباس بمواصفات معينة، إنها تكون مقفولة، و تكون من طنطا، أهو ألفت النظر لفتحي سليم شوية، كنت مخبئها في جراج في مصر لحين إتمام المهمة، المهم، رجعت على مصر سريعاً و رحت للعربية، و كنت شايل أفرول الشغل وشوية الحاجات اللي هستخدمها في الجريمة، المهم لبست الأفرول و رحت على البيت وطلعت عند رضوى وتعمدت إن جارتنا تشوفني و أنا طالع، بس من غير ما تلمح وشي كويس، قعدت في البيت شويه وقلت لرضوى إن أمها بتموت لأن الحالة متأخرة جداً، و إنها عايزة تشوفها، و طلبتها بالإسم، و

طبعاً شوية صعبانية، على شوية محايلة، على، على... المهم دخلت
حضرت شنتتها وشنطة سفر...

- قولي رضوى مستغربتش إنك بهدوم الشغل؟ أو إنك جيت على
الرغم من إنك قلت إنك هتقعد هناك؟

- لأ طبعاً استغربت بس قلت لها إني رجعت على الشغل لأنني حببت
أتأكد مين هناك قالو لي إن رامي مراشش وكان لازم أرجع بسرعه عشان
في مشكله كبيرة حصلت في الشغل وفعلاً رحت ولما رحت الشغل
إتصلت بجوز أمها و قال لي إن أمها بتموت، فاضطريت إني أسيب الشغل
بسرعة و آجى أخذها ونسافر على طنطا حتى إني قتلها استلفت عربية
واحد صاحبي لما سألتني أمان فين عربيتك، المهم، أخذت شنطة السفر
الكبيرة و نزلت تحت البيت على ما تخلص لبس، تعمدت أني أقف في
جنيّة البيت، عشان الست المجنونة جارتنا تشوف واحد لابس أفرو
الشغل، نزلت رضوى، و اتحركنا بالعربية لحد مكان معين أنا محدده، كان
أرض خرابة و هتتبنى دلوقتي برج، وكنت عامل حفرة قريبة من المكان ده
ومع إن العمال المفروض إنهم كل يوم في الأرض دي وهيكتشفو الجثة،
ماهو كان لازم الجثة تبان ما أنا كان ممكن أدفنها في صحرا ولا أرميها في
النيل، كان لازم تبان على الأقل عشان الميراث، متنساش إني عليا ربع
مليون جنيه لنسمة، آه نسيت أقولك معلش، أنا كنت سحبت الرصيد كله
على فكرة، و لو كنت قرئت الشيك اللي إدهولك كنت هتلاقي ميعاد
السداد كمان سنة و أنا بيضهولك على ضهره، ده غير تمن الأرض.

- أى أرض ؟

- أرض رضوى اللي عليها المشكلة.

- هو إنت لقيت العقد؟

(بدأ في التملل عندما ذكرته بالعقد، لا أدري لم تذكرت سليمان نجيب في فيلم الآنسه حنفي عندما يُذكر له لفظ الوصل، كانت فكرةً بلهاء في غير محلها بالمرّة و أنا على شفا حفرةٍ من الموت)

- مش وقته، المهم وقفت في المكان اللي كنت محدده و دارسه، وقلت لها ثانيه واحدة لأن العربية فيها شيء في العجلة، ونزلت وشديت بوجيه و رميته عشان متدورش أما يبجوا يكشفوا عليها ثاني يوم وطلعت ثاني في العربية، و من غير ما أراجع نفسي طلّعت سكينه وضربتها ضربتين، خلصوا عليها في دقيقتين، تصدق كنت بيعط و أنا بضربها!

- الله على مشاعرك الرومانسية! إنت قد إيه(مينفعش أكتبها) إنت إنسان مرهف الحس أوي، و بعدين يا حساس الجيل (نسيْتُ تماماً الوضع الماساوي الذي كنت فيه، كنت أشعر أنني في مكتي و أنني أجادل علاء كالعادة ..)

- كان وقتها لازم أطلع سكين ثاني و فعلاً ضربتها بيه في أماكن ثانية بس بعد خمس دقائق تقريباً على ما طلّعت عدّة اللعب.

- عدّة لعب!!!!

- أيوة يا مغفل! حبوب رامي، أخذت اتنين من دولابه واحدة دست عليها برجلي في أرضيه العربية، و الثانية سبتها سليمة، و الدليل الثاني اللي المفروض كان يبرأني من وقتها.

- ألا و هو؟

- عينة الشعر.

- أيوة صحيح! لما مش هو، مش رامي اللي عمل العملة المهبية دي
إزاي تطلع نفس العينة متطابقة؟

- مش بقولك مغفل! كان سهل أوي وأنا بفتح دولابه في الشغل إني
أطلع شعرتين أو ثلاثة من فرشاة الشعر بتاعته، و عن طريق سلاكة أسنان
حطيتهم في ضوافر رضوى، وبعدين لما خلصت المهمة دي، خرّجت
السكين الثاني و اللي كان أطول باتنين سم و ضربتها بيهم، و طبعاً كنت
قلعت الجوانتي اللي أنا لابسه عشان أطبع بصماتي عليها، و أما ضربتها
بالسكين اللي عليه بصماتي ده لقيتها هي و السكين في مشمع بلاستيك،
كان متجهز في العربية ونزلت بيها وقربت ناحية الأرض وحطيتها هناك
كإني كنت هدفنها و مستني الخفير يتنيل يصحى عشان يشوفني من بعيد،
و فعلاً عملت صوت جامد بباب العربية طلع يجري من العشة بتاعته، و
أنا عملت إني إفتاجات وجريت طبعاً فتحت الباب ومركبتش و لا حاولت
إني أجرب العربية لأنها مش هتدور ويمكن كان يمسكني وتبقى مصيبة!

- كمل، كمل!

- إتصلت بالشرطة و قلت لهم أنا بواب عمارة، و شفت من شوية
واحد بيدفن جثته في مكان قدامي، ولما زعقت رمى الجثة وجهه يركب
عربيته بسرعة مدارتش سابها وطلع يجري، و قلت إنه كان لابس تقريباً
حاجة زي أفرول أزرق، و إديته العنوان وقفلت، و بعدين أخذت تاكسي
ورحت لبيت رامي، و وقتها كان في الشغل و خرج فعلاً يتفرج على
الماتش، آه نسيت أقولك أنا كنت قايل لرضوى تشيل كل ذهبها وفلوسها
وتجيبهم معاها لأن البيت ممكن يتسرق و إحنا مسافرين قالت لي وقتها ما
تشيله في الخزنة قلت لها إن مفتاح الخزنه مش لاقيه و احتمال تكون

البت اللي بتنصف الشقة كل أسبوع لقيته وعملت نسخة عليه، و يمكن تكون عملت للشقة كمان، فهاتيه معاكي احتياطي؛ المهم، أخذت الذهب بتاعها من الشنطة وخبيته في بيت رامي، طبعاً في مكان هو نفسه ميعرفوش و لا يعرف يوصله، كنت متوقع إن لازم في وقت من الأوقات البوليس هيجي يدور و يلاقيه.

- طيب إفرض في الوقت ده رامي فعلاً ما كانش راح يتفرج على الماتش وفضل في الشغل، إيه اللي يخليك متأكد من ده، النقطة دي ممكن تنسف كل تخطيطاتك.

- برافو عليك! ما إنت أوقات بتفهم أهو! قبل ما أوصل على بيت رامي اتصلت بواحد من العمال اللي هناك وقلت له يدور على رامي لاني عايزه في حاجة، قالي إنه خرج برا المصنع يشوف الماتش .

- يعني موضوع الاعتراف المزور اللي إنت قلته، و وثيقة التأمين، والبصمات، و السكيتين، و مكان وجودك، ناقص إيه تاني ؟

- مافضلش، كل اللي أنا عملته ده لأن حبي ليها إنقلب لكره، لرغبة في التدمير، زي ما قلبت حياتي، حبيت أنا كمان أدمرلها حياتها، و كان لازم أستفاد في نفس الوقت، و بدأ فعلاً موضوع العقد أتكلم فيه معاها، إتحايلت عليها فعلاً لحد أما سجلنا الأرض، و المفروض اللي حصل ده كله عشان العقد، و المفروض إن العقد الأصلي النيلة ده كان في الخزنة، و كنت لما آخده هبيع الارض بالتوكيل اللي لسة معايا لغاية دلوقت، كنت هطلع بسبعة مليون جنيه، و لا حد هيعرف يجيني تاني، لغاية أما لقيت ياسر بيتصل بيا بيهددني، لأنني كنت السبب في وقفه عن العمل، أعمله إيه هو اللي حب يلبسهالي بموضوع إنه أخفى التقرير وقتها افكرت القرف

ده، و كان لازم أكمل الفصل الثاني في المسرحية دي؛ إتصلت بيه وطلبت إني أشوفه عشان نتفق سوى على موضوع العقد، عارف، كنت شاكك إنه أصلاً هو اللي سرق العقد منك يا دغف لما فتحت الخزنة؛ قلت له إني لقيت العقد و قلت إنه لو كان لقاه كان هيرفض يقابلني، أو يتحجج بأي حجة، إنما زي ما يكون ما صدق لما قلت له هنتفق و اخرج من الموضوع، و كل واحد مننا ياخذ نصيبه بالحسنى، و فعلاً حددت يوم الاثنين، نفس اليوم اللي أخذت فيه التاشيرة بتاعة فرنسا، قلت لعمتي إني نازل أقابل ياسر لأنه طلب إني أقابله في شيء مهم بيتعلق بالقضية، المهم نزلت، و رحت لياسر قدام بيته، فضلت أزمر عشان البواب يعرف إني جيت، أما يتسأل عليا من الشرطة لما أختفي، و طلبت منه لما جه إنه يطلع لياسر يقوله علاء اللي إنت اتصلت بيه مستنيك تحت عشان المشوار اللي إنت عايزه معاك، طلع البواب و نزل معاه ياسر، قلت له إركب هنقعد في مكان و نتفق على كل حاجة، ركب جمبي وطلعنا على المقطم، كان الجو بدأ يليل، وقتها عملت نفسي تعبان وقلت له تعال كمل عشان أنا تعبت، و فعلاً جه يكمل سواقة لحد أما قلت له استنى ثانية وقف، و ما انتظرتش ثانية واحدة، كان في مخي إني أطلع مطواة كانت معايا، و أضربه بيها في رقبتة، لكن لما لقيت مسدسه في جيبه و قريب أوي مني خطفت المسدس منه وكان جاهز، و هو مالحقش يفكر يعمل إيه، و طلقة واحدة بس و تعمدت إني أجيبها في نص وشه بالضبط عشان أشوهه عشان لما حد يتعرف على الجثة يقول إني أنا ده ما إنت عارف نسبة الشبه اللي بيننا و فعلاً الرصاصة طيرت نص وشه، يا أخي تصدق! شكله كان بشع جداً، اللهم احفظنا! فتشت في هدومه عشان آخذ محفظته و بطاقته و أحط محفظتي، المهم نزلت طلعت جركن البنزين من

العربية وفرغته جواها و ولّعت فيه بالعربية، و أخذت محفظته ومسدسه، وجريت بسرعه قبل ما أي حد يشوفني، آه هي الحطة متطرفة بس ما أنا مش ضامن، الحريق ممكن يجذب حد، و بكدة لما يكتشفوا الجثة المشوهة اللي في عربيتي و معاها أوراق كل الظن هيتجه إن ياسر هو اللي عمل فيا كده و خصوصا لما يشرحوه ويلاقو إن عيار الطلقة تمانية ونص ملي، نفس عيار مسدس ياسر الميري؛ وفعلاً حصل كل ده وبنفس التخيل والتصور اللي أنا مخطط له، الأيام اللي فاتت كنت مستني تنقل القضية بموتي و يشيلوا الحراسة اللي كانت على باب الشقة، و فعلاً الحراسة اتشالت، و كان لازم أجي آخذ العقد و أخلص، المشكلة بقي إنني دوّرت عليه في كل مكان، المصيبة إنني مش عارف راح فين!

- ياااااه! قد إيه إنت طلعت إنسان حقير! شفت ربنا! أهو كل عمايلك دي على فاشوش، شفت مين فينا المغفل، كل دول ضحايا عشان الأرض؟ إن شاء الله مش هتلاقيه! هتلاقي رضوى قطعه و الا ولعت فيه بحق جاه النبي!

- محصلش يا خفيف، لأن في اليوم اللي إنت جتلي فيه أول يوم هنا في البيت و كان البيت مبهدل، فاكرو؟ كنت فتحت الخزنة و لقيت العقد فعلاً، و دلوقت مش متهب، مش عارف راح فين! ولو مكنتش خايف اني اظهر بشخصيتي الحقيقيه كان ممكن اطلع بدل من الشهر العقارى بالتوكيل بس انا مستغرب راح فين...؟ كنت متأكد انه في البيت وعشان كذا مروحتش..هدور عليه تاني وتالت ولو حكمت هшил بلاط الشقة كله!

- طيب آخر سؤال، إنت مالك طيب كده، و ليه اعترفت بكل حاجة ببساطة أوي كده ليه؟

- هههههه، لأ عيب السؤال ده يطلع منك إنت! لسبب بسيط يا أحمد، إن ياسر بيه جه هنا، و كان بيدور على العقد و لما إنت جيت قتلك يعني ممكن يكون استدرجك هنا، و خصوصاً لما يلاقوا نفس نوع المسدس اللي أنا اتقتلت بيه في العربية، المسدس اللي عياره ثمانية ونص ملي و اللي هو مسدس ياسر الميري، أنا آسف يا أحمد حقيقي، أنا مش ممكن أسيبك بعد البؤين الحلويين اللي قلناهم الساعة اللي فاتت! مهما تحلفلي أو توعدني! مينفعش، أخلص منك و بعدين أفضل أدور لو اضطريت إني أبات هنا!

(كنت قد بدأت بالهذيان عندما قام علاء و بدأ يمسك المسدس و نهض واقفاً هذه المرة، ليبدأ أخذ وضعية الاستعداد للقتل، و هو يضع كاتم الصوت في فوهة مسدس ياسر)

- علاء، تفتكر إني لو فضلت أفكرك بأي حاجة، أو حتى قعدت أتحايل عليك إنك متموتيش؟؟؟ و الا كلامي ممنوش أصلاً أي لازمة؟

- من غير زعل، و ما تاخدهاش على محمل شخصي، كلامك ما ممنوش أي لازمة، أيوة هتقول إننا كنا أصحاب، و كنا إخوات، و كنا، و كنا، أنا معاك، بس دلوقت حياتك قصاد حياتي، تفتكر أختار حياة مين فينا ؟ إنت أساساً لو كنت مكاني كنت هتعمل إيه ؟ ما كنتش هتموتني ؟

(أغمضت عيني و بدأت بالنطق بالشهادتين في رعب، كان يتوالى أمامي شريط حياتي المصور، كنت أسمع عن الأشخاص المقبلين على حافة الموت، كانت تمر لحظات حياتهم ك فيلم سينمائي، أبصرت علاء

بدلاً من الاقتراب مني يتعد ليقف على مدخل الطريقة المؤدية إلى الصالون، ليقف أمامي و لكن مبتعداً، ربما خوفاً من الدماء التي ستسيل مني؛ كنت أهذى و أنا انطق بالشهادة)

- عارف يا أحمد، أوقات كثير كنت بحسدك، كان عندك أصحاب كثير، وكل الناس بتحبك، و لما قلت لنفسي أبعد عنكم كلكم كنت مرتاح، إنما رجعت ثاني لما قرّرت إني اعمل اللي عملته ده، كنت بتابع أخبارك على طول، كنت محامي شاطر، و أديني خليتك أشطر وا ... إفتح عينيك! أنا عايز أشوفك و أنا بموتك! إتحايل عليا يمكن أحن عليك وما اموتكش.. (كان بدأ يتحول إلى الجنون وهو ينطق بهذه العبارة)

- (ظللت مغمضاً عيني و تأكدت وقتها أن غريزة القتل لدى علاء أصبحت إدماناً و لابد أن يرضي غزيرته بأي شكل كان، إن الإنسان ما أن يرى الدماء التي أسألهما حتى يتحول إلى قاتل، و لا تقف الدماء عند هذا الحد بل يصبح أسيراً لهذه العادة، لتتحول الغريزة إلى رغبة تنهش جسد صاحبها، حتى يقدم لها قربانا من دماء ضحاياها) ... واستطردت، إنت أحقر إنسان شفته في حياتي، عايز تضرب إضرب وخلصني، مش وقت مواعظ إقتلني و إرتاح، على الأقل هيرضيني إني عرفت حقيقتك قبل ما أموت.. وعاء....

وقتها سمعتُ صرخة ألمٍ مفزعة و جسداً يهوي إلى الأرض، وقتها فتحت عيناى عن آخرهما لأجد علاء متهاوياً على أرضية الطريقة، مضرجاً بدمائه يشهق آخر أنفاسه في حشيرة مخيفة، و قد برز نصلٌ حادٌ من قلبه، أغمد من الظهر حتى نفذ إلى القلب لتجحف عيناه بشكلٍ مربع و

هو يمد يده تجاهي، و من خلفه فوجئت بالعجوز، و قد كانت عصاها من غرزت في قلب علاء.

جينا (بتوتر) - عشان تبقى تصدقني، محبتش أبلغ البوليس، كنت عايزة أعرف فيه إيه، كنت عايزة اسمع، أنا هنا بقالي أكثر من نص ساعة، لما لقيتك طلعت و إتأخرت، فتحت الباب، دخلت بالراحة و سمعته و هو بيكلمك، عشان تبقى تصدق يا بقرة! عشان تبقى تصدق لما أقولك هتحصل مفاجأة.

أما أنا فقد عجزت عن النطق تماماً، اقتربت مني و هي تفك قيودي، كدت أن أقبل يديها و هي تفك الحبل الذي شلّ يدي، بل كدت أود أن أقبل قطها الذي كان وراءها وقفز جالساً إلى كرسي الصالون، ناظراً إليّ في خوف، هذا القط الذي كان سمه لا زال في جيبتي، كانت لا تزال تهمس بكلماتٍ غير مفهومةٍ و هي تفك قيودي ولكنني استرسلت:

- أصدق! أصدق إيه! ده أنا طلعت بقرة، وجاموسة، وحمار، إنت طلعتي ست العاقلين!

- من أول يوم و أنا مش مرتاحة للبنّي آدم ده، و أقولك الكلام ده تقوللي لأ، أقول في المحكمة إني شايفاه هو يوميه في الجنينه تقول لأ وتطلعني مجنونة ومبشوفش!

- أنا آسف! والله العظيم أنا آسف! أنا فعلاً حمار! سامحيني!

- رضوى الله يرحمها كانت دايماً بتشتكي منه، بعد أما بقى يغير عليها بجنون، كانت أوقات كثير بتقوللي إنه فعلاً عصبي ومجنون، متصدقش الكلام اللي كان بيقوله ده، ده إنسان مش طبيعي بالمرة، كثير كانت

بتقولي إنها بدأت تخاف منه، وخائفة إنه ممكن في أي وقت يعمل فيها حاجة، قبل الوفاة بأسبوع حصلت خناقة كبيرة بينهم، وقالت لي أخلي معايا مفتاح الشقة ومفتاح الخزنه بتاعها و اللي فيها كل أوراقها المهمة، كانت في الفترة الأخيرة يا عيني شاكة في كل اللي حوالها، من ياسر، وجوز أمها، وقالت لي زي ما يكون قلبها حاسس، إن لو حصل ليها أي حاجة لازم أفتح الخزنة، و أشيل كل الورق الموجود في ظرف أخضر، وفعلاً لما رضوى اختفت أنا استنيت إن علاء خرج من البيت قبل ما يتقبض عليه و فتحت الشقة و الخزنة ،و أخذت الظرف كله، ومليته بورق مالوش لازمه كان جوا الخزنة.

- يعني العقد معاكي كل ده؟؟؟؟ ماقلتتهوش ليه في المحكمة؟

- كنت هقول ليه ؟ عشان أطلع حرامية و مجنونة و العقد علاء ياخده ويستولى على الأرض، الأرض اللي قتل رضوى عشانها ؟ والا عشان ياسر ياخده ويديه لعمه اللي طول عمره كان ذالها و مقوي أمها عليها ؟ للأسف رضوى كانت مخبية العقد و طلبت مني أني أشيله مع الورق الثاني اللي كان معايا من قبلها .

- و إيه بقى موضوع الورق الثاني ده ؟ و كان معاكي من الأول ؟

- عقد كانت عملاه ليا رضوى قبل وفاتها بأربع أيام بايعة فيه الأرض عشان لو حصل لها حاجة محدش يستفيد من الأرض و قالت لي أشيله معايا، أما لو ماحصلش لها أي حاجه تبقي ورقة بس، ملهاش لازمة معايا.

- مش فاهم ! عايزة تقولي إن من الأول رضوى كانت عاملة ليكي عقد بيع صوري للأرض ؟ كإنيك حامله بس للأرض ؟ طب ما ده يلغي

أصلاً العقد اللي كان في الخزنة، و يصبح مالوش أي لزمة، طب
مطلعتهموش ليه و انتهى الأمر؟

- أولاً كنت بغيظ علاء، ثانياً على حسب رغبة رضوى، ..ثالثاً وده
الأهم، إني خفت فعلاً والله خفت إن ممكن يقتلني لما يعرف اللي حصل،
وهي يا حبيبتي زى ما يكون قلبها حاسس، ومش عايزة أي حد من أسرتها
ياخد ميراث منها، فعلاً محدش كان يستاهل.

- إنتِ عارفة حته الأرض دي تسوى كام يا مدام جوجو؟.

- ميهمنيش تسوى كام، هو أنا يعني كنت دفعت فيها مليم! هي اللي
أصرت على كده و رحنا أنا وهي سجلنا العقد قبل الوفاة بيومين، و هو أنا
هعمل بيها إيه هشوف أي مشروع خيري أتصدق بيها وخلص.

- إنتِ فعلاً عندك حق.

- أنا طول عمري عندي حق (قالت هذه الجملة، وهي تسحب
طرف عصاها المدبب من قلب علاء، تاركةً ثقباً في القلب مباشرة، و
تمسح عصاها بقطعه قماشٍ كانت موضوعةً على المنضدة) عارف يا
أحمد، أنا مش عارفه ربنا هيسامحني و الا لأ؟ أديك سمعت إنه قدّ إيه
كان شرير، و قدّ إيه قتل ناس، و إنتِ سمعت و كان هيقتلك إنتِ كمان،
و الرب بعثني في اللحظة دي عشان على الأقل ألحق أنقذ روح...
أبصرت و كانها ترى دمي لأول مرّة) إيه ده! ده إنتِ راسك مفتوحة، تعالى
أما أشوفلك حل تحت في الشقة.

- حل إيه بس يا مدام جوجو! مش لما نشوف حل في المصيبة
دي! هنعمل إيه ؟ لازم نبّلع البوليس.



- بوليس! يا ربي! أنا مش حمل بهدلة الأقسام، و البوكسات..، و العربيات، و النيابة، و الكلام ده، أنا اموت! واسيب فوس... (لم تكمل جملتها وبدأت في البكاء لدرجةٍ دفعتنى لأرّبت على كتفها)

- طيب هنعمل إيه بس! منقدرش نسيب البلوة دي هنا!

- هو إنت مش كنت شايف إنه كان يستحق القتل؟ وكنت بدافع عنك!

- ممكن تهدي طيب وتبطل عياط! أنا شايف إنه كان يستحق القتل ألف مرّة! و أنا مدين لك بحياتي، مش مرة، لأ مرتين! أنا ممكن أعمل أي شيء عشان خاطرك، بس ده! هتبقى مشكلة في إننا ما نبلّغش، و برضه مشكلة في إننا نبلّغ، و خصوصاً بعد موضوع العقد اللي كان معاكي ده، هيبقى فيه دافع أصلاً إنك تموتيه حتى لو شهدت معاكي، أنا صراحةً محتار.

- بص يا أحمد أنا بموت، و الله بموت! الجلطة بتكوّن بسرعة أوي، والدكتورة في المستوصف بتاع الكنيسة اللي في آخر الشارع قالت لي إن الجلطة بتزيد خطورتها يوم بعد الثاني، و إن المرة الجاية أخطر، و أخطر، و ما ينفعش أصلاً أعمل أي عملية، و قدامي فترة مش كبيرة، و سواء مت دلوقت و الا كمان سنة، مش مهم فالموت هو من يأتي دائماً، أنا مش خائفة منه، لأ أنا بستعد له من دلوقت، و لو حصل و البوليس جه وأخذني، يرضيك أقضي بقية أيامي في السجن بعيد عن بيتي ده ؟

- إنت بتكلمي بجد؟؟

- صدقني، أنا مش بكذب! تقدر توصل الكنيسة وتسال هناك، عموماً
إعمل اللي ضميرك يقولك عليه.

- أنا مش عارف أقولك إيه، مش عارف! إنت هتخليني أعمل شيء
عمري في حياتي ما اتخيلت إني أعمله.

- خلاص! أنا قلت لك الكلام اللي عندي (كانت تجلس بجوار
قطها و كان يتطلع إليها في حزنٍ عجيب، و هي لا زالت تبكي، و بدأ في
التمسُّح بها و النظر إلي كأنه يستعطفني أنا الآخر)

- طب لو مبلِّغناش، تقدرني تقولي هنعمل إيه؟ ما احنا مش هينفع
نسيبه هنا! و لا أنا أعرف أشيله من هنا .

- بص أنا كان عندي زمان ... كان عندي كلب، عاش معايا كتير مع
قطي ده، و لما مات معرفناش أنا وعمك نوديه فين، أو هندفنه بالحجم ده
فين، فكلمنا طبيب بيطري قال ممكن نحلله بمحاليل مركزة، دي بتدوب
أي جثة خلال ساعات، آه كانت طريقة بشعة، بس كنت بحس إنها أفضل
من الرمي تحت التراب، أنا عندي على السطح في أوضة فوق فيها بانيو
كبير، أوضة كانت زمان أوي بتاعة البواب، حطينا كلبنا هناك، و بعد ثلاث
ساعات مكنش له أي أثر وبعدين نفتح بلاعة البانيو، تنزل المحاليل في
المواسير، و الجراكن بتاعة المحاليل موجودة فوق، نسيبه هناك ست
ساعات، و مش هيكون له أي أثر و محدش أصلاً معاه مفتاح السطح
غيري.

إشمئزيت من الفكرة نفسها، و لكن نظرة العجوز المتوسلة، هي وقطها
كانت بمثابة من نومني مغناطيسياً، لم أشعر بنفسي إلا و أنا ألف علاء في
السجادة جاذباً إياه إلى السطح، قبل بزوغ الشمس، و وصلتُ أخيراً إلى

غرفة الإعدام، و كانت تسبقني حتى أضاءت النور، شرعت في مساعدتي بأي شكل، لماذا كنتُ أخاف على العجوز من أي أزمةٍ حالياً؟ أَلقيت علاء في البانيو بعد جهد، و أغلقت البالوعة بسدادة البانيو المربوطة بسلكٍ معدنيٍّ في مسمارٍ مثبتٍ بحافة البانيو من أعلى، أخذت الجراكن، كنت لا ادري ما أفعل، كانت حواسي معطلة، و لكنها تنفّذ المطلوب، و عقلي فقط هو الذي يرفض، لكنني وضعتُ سؤالاً لنفسِي، ماذا لو لم تاتِ العجوز في اللحظة المناسبة ؟

أَلقيت بكل ما تعلمته من حقوق الإنسان، و شرعية القوانين، و العقوبات ، والصدقة مع علاء في مرقده الأخير، وملأت البانيو بثلاث جراكن من محلولٍ مركزٍ لا أدري إسمه، و خرجتُ سريعاً عندما وجدت المحلول يصدر فقاعاتٍ دليلاً على إتهامه للحم علاء، أغلقتُ الباب بعد أن خرجت العجوز، و كانت تسبقني، و لدهشتي أخذتني من يدي وذهبتنا إلى شقتها، و كالعادة، أخرجت شنطة إسعافها لتنظف لي الجرح، لكن كانت هذه المرة كانت تختلف تماماً عن المرة السابقة، كانت تنظر إليّ بنظرةٍ حنونةٍ جداً، و كأني ولدها الذي لم تنجبه، و هي تربّت على رأسي عندما أتألم من الربط، و حتى قطعها الذي فكرت في سمّه، كان يرقد تحت أقدامِي في أمان و كأنه أيضاً يتألم من أجلي، كان الصداع حاداً في رأسي، و النجوم واضحةً كالعادة...

جينا - دلوقت بقي هنعمل فنجانين قهوة تركي عشان الصداع يضيع.

قامت العجوز إلى المطبخ ولم يتبعها قطعها هذه المرة بل ظلّ ينظر إليّ و بشجاعةٍ بالغة، ربتُ على راسه متوقفاً أن يهجم عليّ، و لكنه لم يتحرك، بل تخيل إليّ أنه كان يبتسم، بل أقسم أنه ابتسم، و كانت الابتسامة غير



مريحة بالمرّة! ابتسامة تدل على الخبث أو ... لا أدري، فالذي يجعلني لا زلت أرى النجوم واضحةً تتلألأ من قوة الضربة، يجعلني أشعر وكأنه ابتسم، لا بل ابتسم فعلاً! بل و بدأ يتحدث إليّ بهمس بكلمات لم أشعر بها! تركته يتحدث، و حدث نفسي :

لم أكن أتصور في يوم من الأيام أنني قد أشارك في جريمة قتل، و لكن الظروف هي ما دفعني إليها كما سبق، رغماً عني، كان لا بد من أن أساعد تلك المرأة التي أنجذتني من الموت المحقق، كنت الآن لأكون في عداد الأموات لولا تدخّلها في الوقت المناسب، كان علاء فعلاً يستحق الموت بعد كل الضحايا الذين قتلهم بدم بارد، كنت أشعر أنني لن أندم أبداً على ما فعلته كمساعدة لتلك العجوز.

كانت الساعة تشير في الصلاة إلى السادسة إلا ربع، عندما دخلت العجوز بصينية القهوة قائلةً وهي تبتسم:

- إيه يا فوستاك! صدعت عمو بكثر كلامك.

تناولت منها الصينية، و لم أعر لجملتها أيّ انتباه، و تناولت يدها لأجلّسها على الكرسي، اندهشت هي الأخرى لهذا الحنان من جانبي.

- أنا فعلاً مديونلك بحياتي يا أمي.

- ياااااااااااا! أوّل مرة حد يقولي كده في حياتي بعد فوستاك!

- فوستاك!!!!

- آه فوستاك، ده ابني الوحيد.



- خلاص نبقي اخوات (و ابتسمت) أنا فعلاً مدين لك بحياتي،
وأتمنى إنني أقدر أرد لك الجميل ده في يوم من الأيام، و اعتبريني ابنك
من دلوقت، و أي شيء تطلبه، أنا دائماً تحت أمرك.

- أي حاجة ؟ أنا مش هطلب منك غير إنك ترد الجميل، و إنت
بقلبك الأبيض ده قادر على كده.

- أنا تحت أمرك.

- بص يا أحمد، أنا زي ما قلت لك، قدامي شهر، و أنا مش خايفة
من الموت، أنا خايفة بس على القط ده، لأن مالوش غيري، و لا أنا ليا
غيره، و أخاف عليه إنه يتبهدل من بعدي أو حد يرميه في الشارع، إحنا
كبرنا سوى، أخاف يتعب بعد أما أموت (قفز القط بجوار العجوز لتربت
على رأسه وهو يصدر مواء خفيفاً كأنه شعر أنها تتكلم عنه، أو يترجأها ألا
تقول مثل هذا الكلام، أخذت تربت على ظهره و هما ينظران إلى بعضهما
البعض)

- طب إنت عايزاني أعمل إيه؟

- عايزاك تاخده معاك.

- أنا؟ آخده ؟ بس أنا عمري ما ريت قط! أو حتى عصفور! و إنت
عارفة إن مكنش فيه أي علاقة بيني و بينه .


- متخافش، في الفترة الجاية أنا هخليه ياخد عليك، و تاخذ عليه، و
بعدين زي ما قلت، متنساش إن فوستاك ده حبيبي، و ابني الوحيد، و
برضه وريثي الوحيد الى هيورث كل حاجه (و ابتسمت ابتسامة غامضة)

- أصل بس أنا...



- بلا أصل بلا فصل، يلا قوم رَوِّح و إرجع تاني على الغدا عشان أنا
هعزمك على الأكل هناكل سمك مع فوستاك، ههههه، ماشي يا حبيبي
(لقطها بالطبع) هخليكم تاكلوا في طبق واحد (و ضحكت أنا هذه
المرة)

كانت الساعة تشير إلى السابعة و النصف عندما ذهبتُ إلى المنزل، و
لكن قبل النوم، كان لابد من اتصالٍ هام كان عليّ القيام به، فكان عليّ
الاتصال بعاصم، أحبت أن اعتذر له و ذلك لأنه كان هناك شيء هام
عليّ أن أقوم بتأليفه، و التظاهر بأنني نسيت إخباره بأن علاء في آخر حوارٍ





أناتشيد الموت

لم أكن متوقعاً في يوم من الأيام، أن نجتمع سوياً في هذه الغرفة بداخل إحدى الفيلاّت في الضواحي الجديدة؛ كان هناك خلاف دائم بيننا منذ أول لقاء بيننا، بل وصل الأمر إلى محاولتي قتله ذات يوم : كان يجلس أمامي صامتاً بجوار المدفأة، مندهشاً من نظراتي إليه، ومن تعلّمي الشديد به في السنوات الأخيرة، كنت أعلم أن هذه الأفكار تدور في رأسه أيضاً، كنت أشعر بذلك، وكنت أعلم أن هناك حوار ما سيدور بيننا خلال الساعات القادمة؛ كنت مندهشاً من سرّ تعلّقنا ببعضنا البعض إلى هذه الدرجة، حتى هو تعلّق بي بصورة لم يكن ذاته يتصوّرهما في يوم من الأيام...!!! هبطت إلى جواره صامتاً، وتذكّرت ما حدث، و رَمَت على ظهري متذكراً قول أمه: ده ابني الوحيد.